

**ЎЗБЕКИСТОН РЕСПУБЛИКАСИ ОЛИЙ ВА  
ЎРТА МАХСУС ТАЪЛИМ ВАЗИРЛИГИ**

**Фарғона давлат университети**

**ЎЗБЕК АДАБИЁТШУНОСЛИИГИ КАФЕДРАСИ**

**ҲОЗИРГИ АДАБИЙ ЖАРАЁН**  
**фанидан**

**МАЪРУЗАЛАР МАТНИ**

(бакалавриатнинг ўзбек филологияси йўналиши учун)

**ФАРГОНА - 2011**

## **1-МАВЗУ: КИРИШ. ФАННИНГ ЎЗИГА ХОС ХУСУСИЯТЛАРИ АДАБИЁТЛАР:**

1. И.А.Каримов. Юксак маънавият – енгилмас куч. Т., 2008.
2. И.А.Каримов. Адабиётга эътибор – маънавиятга, келажакка эътибор. Т., 2010.
3. Н.Каримов, С.Мамажонов ва б. XX аср ўзбек адабиёти тарихи. Дарслик. Т., 1999.
4. Адабиёт назарияси. 2 томлик. Т., “Фан”, 1978-1979.
5. Адабий турлар ва жанрлар. 3 жилдлик. Т., “Фан”, 1991-1993.
6. Аристотель. Поэтика. Ахлоқи кабир. Т., “Янги аср авлоди”, 2004.
7. Т.Бобоев. Адабиётшунослик асослари. Т., “Ўзбекистон”, 2002.
8. И.Султон. Адабиёт назарияси. Дарслик. Т., “Ўқитувчи”, 2005.
9. Д.Қурунов. Адабиётшуносликка кириш. Дарслик. Т., “Фан”, 2007.
10. Мустақиллик даври адабиёти. Адабий-танқидий мақолалар. Т., 2006.

### **РЕЖА:**

1. “Хозирги адабий жараён” фанининг обьекти. Мақсад ва вазифалари.
2. Хозирги адабий жараённинг тараққиёт манбалари, омиллари.
3. Хозирги адабий жараённинг асосий тенденциялари ва хусусиятлари.

Биз ўрганмоқчи бўлган “Хозирги адабий жараён” фани тўла маънода мустақиллик меваси ҳисобланади. Ўз номидан ҳам кўриниб турибдики, бу фан Ўзбекистон республикаси мустақиллиги эълон қилинган 1991 йилдан то ҳозиргача бўлган давр ҳақида маълумот беради. Шунинг учун уни дастлаб “Мустақиллик даври адабиёти”, “Истиқлол даври адабиёти”, “Энг янги ўзбек адабиёти” деган номлар билан ҳам аталди. Икки асрни туташтирган, XX асрнинг сўнгги ўн йиллиги билан шиддатли XX1 асрнинг илк декадасини ўзига хос олтин кўприк билан боғлаган бу адабий жараён ғоятда мураккаб даврни босиб ўтди.

“Хозирги адабий жараён” фанининг обьекти XX асрнинг 90-йилларидан XX1 асрнинг шу кунгача бўлган даврда яратилган адабий-бадиий асарларни ўз ичига олади. Аслида 20 йил боботарих учун нон ушоғидек қисқа муддат ҳисобланади. Аммо ана шу кичик муддат мустақиллик ишқи билан ёнган ўзбек халқи ҳаётида жуда катта ишлар амалга оширилган олтин давр бўлиб қолди. Бу кичик мухлат ҳудди атом зарраси каби мамлакатимизнинг сиёсий, иқтисодий, маданий ва маънавий-маърифий жабхаларида ижобий маънодаги кучли портлашларни вужудга келтирди. Бундай ижобий ўзгаришлар ўзбек халқининг маънавий потенциали туганмас заҳираларга бойлиги ва яшовчанлиги туфайли рўёбга чиқди. Бу ўсиш, ўзгаришларнинг туб асослари ва сабабларини билиб олиш учун Сиз муҳтарам Президентимизнинг адабиётлар рўйхатида берилган “Юксак маънавият – енгилмас куч”, “Адабиётга эътибор – маънавиятга, келажакка эътибор” номли асарларини пухта ўрганишингиз, конспектлаштиришингиз шарт.

“Хозирги адабий жараён” фанининг бош мақсади ана шу 20 йиллик давр адабиётининг асосий хусусиятлари, бу йиллар ўзбек адабиётида пайдо бўлган мухим концепциялар (лот. қарашлар, фикрлар тизими, дунёни тушуниш, англаш усули) ва асосий тенденциялар (лот. ўйналиш, ҳаракат, интилиш, майл)ни аниқлаш, бу даврда яратилган асарларни ўрганиш ва таҳлил қилишдан, вазифаси эса бадиий асарни тушуниш малакасини шакллантириш, ҳозирги давр адабиётининг энг янги фазилатларини тарғиб этиш кўнилмасини ҳосил қилишдан иборатдир. Албатта, “Хозирги адабий жараён” фанини сўнгги 20 йиллик адабиёт билан чеклаб қўйиш уни тор тушунишдан иборат бўлур эди. Чунки истиқлол ғояси, эрк мавзуси адабиётнинг доимий йўлдоши бўлиб, у эрамиздан олдинги VI асрдаёқ пайдо бўлган (бу ҳақда қаранг: Й.Солижонов. “Ҳақиқатнинг синчков қўзлари” 125-134-бетлар).

Адабиёт сўзи ҳар доим эрк ва озодликка чакириқ бўлиб янгради. Лоақал XX аср бошларида жадид адабиёти намояндаларининг асарларини эсланг. Ёки совет тузумининг дастлабки босқичида Фитрат, Ҳамза, Қодирий, Чўлпонларнинг фарёдига қулоқ солинг! II жаҳон уруши йилларида ижод қилган “совет” адиллари F.Ғулом, Ойбек, Ҳ.Олимжон, М.Шайхзода, М.Осим кабиларнинг нега тарихий мавзуга мурожаат

қылғанликларининг туб сабабини аниқланг! 70-йилларда коммунистик мафкура мустамлака қиличини қайраб, сал кўтарилиган бошни, овоз чикарган тилни кесиб турган пайтда Э.Воҳидовнинг “Руҳлар исёни”, А.Ориповнинг “Хангома”, О.Матжоннинг “Ҳаққуш қичқириғи”, Р.Парфининг Туркистон хақидаги ёниқ асарлари не-не машаққатлар билан дунёга келиб, халқимизнинг зимиston кўнгилга озодлик нурини олиб киргани, кўзини очгани адабиёт сўзининг ўлмаслигидан, унинг ҳар доим эрк бонгини чалиб турганлигидан дарак бермайдими?! Буларсиз ҳозирги адабий жараённи тасаввур этиш мумкин эмас.

Демак, ҳозирги адабий жараён ўзининг шу кунги босқичига қуйидаги манбалар ва омиллар асосида эришди:

### **Манбалар**

1. Кўп асрлик ўзбек адабиётининг энг яхши анъаналарини ўрганиш, тадбиқ этиш, ижодий ёндашиш ва янгилаш туфайли;
2. Буюк Шарқ адабиётининг барҳаёт илдизларидан баҳрамандлик, Farb адабиёти билан ҳамкорлик;
3. Халқ ҳаётини чуқур ўрганиш ва реал ифодалаш, ҳақиқат ва адолат устиворлиги учун курашиш;
4. Халқ оғзаки ижодига хос буюк оптимистик ғоянинг барҳаётлиги.
5. Бошқа халқлар адабиёти билан доимий ижодий ҳамкорлик, ўрганиш ва таъсир этиш;

### **Омиллар**

6. Ўзбек тилига Давлат тили мақомининг берилиши;
7. Ўзбекистонда СССР таркибида яшаб туриб, Президентлик лавозимининг вужудга келиши;
8. Мустақилликнинг эълон қилиниши:
  - а) мадхия (18.11.91);
  - б) байроқ, герб (18.11.91);
  - в) БМТга аъзо (2.03.92);
  - г) жаҳон ҳамжамиятига аъзолик (2.06.91);
  - д) миллий валюта-сўм (08.94).

Адабий жараённи даврлаштириш ҳар доим адабиётшунослик фанининг энг муҳим ва мураккаб масалаларидан бири бўлиб келган. Кўп асрлик тарих ва тажрибага эга бўлган ўзбек мумтоз адабиётини, қарийб бир асрлик даврни қамраб олган “Миллий уйғониш даври ўзбек адабиёти” ва “Янги ўзбек адабиёти”ни даврлаштириш ҳануз тўла-тўқис амалга оширилмаган бир пайтда эндиғина 20 йиллик адабий жараённи даврлаштиришга уриниш бироз эриш туйилади. Бироқ ўтган 20 йил давомида мамлакатимизнинг сиёсий-ижтимоий, иқтисодий, маданий-маърифий ва маънавий ҳаётида шу қадар улкан ўзгаришлар, ютуқлар, айни чоғда, йўқотишлар юз берди, бу мустақиллик даври адабиётининг шаклланиши, ривожланиши ва тез суръатлар билан янгиланишига туртки берди. Шуни ҳисобга олиб, “Ҳозирги адабий жараён”ни қуйидаги даврларга бўлиб ўрганишни тавсия этамиз:

1. Шаклланиш ва изланиш даври адабиёти (XX асрнинг сўнгги ўн йиллиги);  
2. Янгиланиш даври адабиёти (XXI асрнинг 1-декадаси);

Ушбу тараққиёт босқичларининг ўзига хос хусусиятлари, фазилатлари ва қусурларини кейинги дарсларимизда йўл-йўлакай тушунтириб борамиз.

Энди “Ҳозирги адабий жараён”нинг асосий тенденциялари ҳамда концептуал хусусиятларини аниқлаб олайлик. Асосий йўналишлар (тенденциялар):

1. Ҳозирги адабий жараённинг илк босқичида ўзбек ижодкорлари янгича услуг ва маҳорат сирларини эгаллаш мақсадида бевосита Farb адабиётига мурожаат қилдилар. Қисқа муддатда жаҳон тан олган Камю, Кафка, Ницше, Жойс, Маркес сингари санъаткорларнинг асарлари таржима қилинди. Бу адабиётнинг ривожланиши учун икки томонлама фойда берди. Бир томондан, ўзбек адабиёти хазинаси янги дурдона асарлар

билан бойитилди. Адабий янгиликка муҳтож ўқувчининг эҳтиёжи қондирилди. Иккинчи томондан, ёзувчининг ўзи асарни таржима қилиш жараёнинда ижод сирларини ўрганди, маҳорати ортди. Ана шу ўрганиш оқибатида ўзбек адабиётига абсурд, онг оқими тасвири кириб келди.

2. Ўзбек адабиёти бағрида модернизм усули бўй кўрсата бошлади. Аслида адабиётда пайдо бўладиган турли “изм”лардан чўчимаслик керак. Бу ҳар бир адабиётнинг маълум бир давридаги изланиш, янгиланиш жараёнидир. Агар у ижобий натижা берса, кашфиёт даражасидаги асарлар яратилиши мумкин. Айни пайтда бепарво ҳам бўлмаслик лозим – ҳали суги қотмаган ёш қаламкашлар ўртасида тақлидчилик пайдо бўлиши хавфи бор. Ҳозир ўзбек адабиётида модерн шеърияти, модерн насли вужудга келди. Абдували Қутбиддин, Фахриёр, Баҳром Рӯзимуҳаммад каби шоирлар, О.Мухтор, Х.Дўстмуҳаммад, Н.Эшонқул сингари адаблар бу йўналишда муваффақиятли ижод қилмоқдалар.

3. Модернизм адабиётимизни нечоғли бойитмасин, қанчалик ранг-баранг қилмасин, яна буюк Шарқ адабиёти анъаналари, мумтоз адабиётимизнинг ҳаётбахш илдизлари, қадимги ёдгорликлар, миф ва афсоналар, асотирлар ҳамда ривоятларга қайтиш, таяниш, қизиқиш кучайди. Шарқ адабиёти анъаналарига таяниш, аввало, миллый ўзликни англашга олиб келди. Шарқ адабиёти анъанасига кўра бадиий асарда тасвирланган шахс ўз манфаатини аждодлари манфаатлари ҳамда қадриятларидан устун қўймайди. Унинг Ғарб адабиётидан фарқи ҳам айнан шундадир, яъни Ғарб адабиётидаги қаҳрамонларнинг аксарияти ота – боболари тутган йўлдан бормайдилар.

4. Қалам аҳлига ижодий эркинлик берилди. Натижада адабиётнинг барча тур ва жанрларида ҳаётни рўй-рост, бутун мураккаблиги билан тасвирлашга, ижтимоий-маънавийadolatsizlik, хўрлик ва қуллик шароитида яшаган, маънан мажруҳ бўлган инсон тасвирига эътибор кучайди. Ч.Айтматов айтганидек, “адабиёт ҳамиша инсонпарварликка хизмат қилиб келган”лигини амалда исботлашга кириши.

5. Йигирма йилларки, мустақиллик байрами арафасида энг яхши ёзувчиларни “Ўзбекистон қаҳрамони”, “халқ шоири” ёки “халқ ёзувчиси” унвонлари, орден ва медаллар билан мукофотлаш одат тусига кирди. Энг яхши асарлар республика Давлат мукофоти билан тақдирланмоқда.

Савол: 1. “Ўзбекистон қаҳрамони” унвонига ўзбек адабиётидан кимлар мушарраф бўлди? (А.Орипов, С.Аҳмад, Э.Воҳидов, Т.Қайинбергенов, Иброҳим Юсупов).

2. “Ўзбекистон халқ шоири” унвонига сазовор бўлган водийлик ижодкорларни сананг (Т.Низом, Ҳ.Саъдулла, О.Ҳакимов, И.Мирзо).

Ўзбек адабиётининг тараққиётида муҳим рол ўйнаган асосий концепциялар қуйидагилардан иборат:

1. Мустақиллик йилларида чорак кам бир асрлик “совет даври адабиёти”га турлича қарашлар, уни инкор этувчилар пайдо бўлди, Ғ.Ғулом, Ҳ.Олимжон, А.Қаҳҳор, Уйғун каби адаблар социалистик тузум, коммунистик фирмә маддоҳлари сифатида айбланди. Уларнинг ижоди вульгар-социологик нуқтаи назардан талқин этилди. “Инқилоб куйчиси” номини олган Ҳамзага очиқ ҳужум бошланди. Кейинроқ бундай номақбул қарашларга барҳам берилди ва совет даври ижодкорларининг мероси холисона ва ҳақиқат нуқтаи назаридан ўрганила бошланди (бу ҳақда: Й.Солижоновнинг “Ҳақиқатнинг синчков кўзлари” китобидаги А.Қодирий, Ғ.Ғулом, Ойбек ҳақидаги мақолаларини, “Зулматдан нур қидирганлар” номли китобларини ўқинг).

2. Мустақиллик даври адабиётида инсон омилига алоҳида ва янгича қараш бошланди. Маълумки, шўро адабиётида бош қаҳрамон фақат камбағал тоифадан олинар, у ўта ақлли, тадбиркор, кўрқмас, фақат ижобий фазилатларга эга қилиб тасвирланарди. Унинг ички дунёсидан кўра ташқи олами, хатти-харакатлари, ижтимоий-сиёсий фаолиятини ёритишга кўпроқ эътибор бериларди. Мустақиллик йилларида яратилган асарларда бундай бир ёқламаликка барҳам берилди. Эндиғи қаҳрамонларни том маънодаги инсон – ҳам сурати, ҳам сийрати, ҳам фазилати, ҳам иллати билан мукаммал тарзда тасвирлашга эътибор кучайди.

3. Одамларнинг маънавий дунёсидаги ўзгаришлар туфайли бадиий адабиётга илгари қўрилмаган (тўғриси, таъқиқланган) янги ҳодиса – руҳоний кайфият – ислом маънавияти кириб келди ва халқимизни комиллик сари етаклашда муҳим рол йўнади. Мухлислар бундай янгиланишини хайриҳоҳлик билан кутиб олди. Албатта бу соғинч эҳтиёжини қондириш дастлаб ўзбек ижодкорлари зиммасига катта масъулият юклади. Чунки бу эҳтиёжни муаллиф ёки асар қаҳрамонларининг “Бисмиллоҳир раҳмонир раҳим”, “худо - Оллоҳ” дейиши ёки номоз ўқишини тасвирлаш билангина қондириб бўлмасди. Дастлаб шундай камчиликлар ҳам рўй берди. Лекин тажриба ва билим ортган сари инсоннинг диний-ахлоқий руҳияти, ботиний дунёсини очишга кўпроқ эътибор қаратила бошланди.

4. Ижодий эркинлик туфайли адабиётда таъқиқланган мавзуу ва муаммо қолмади. Ҳозирги пайтда ижодкор хоҳлаган соҳа тўғрисида ёзиши мумкин. Фақат у халқни ёмонликка ўргатмаса, жамиятга, умумий мақсадларимизга қарши қўймаса бас. Ҳозир шундай хавф сезилмоқда. Айрим ёзувчилар нуқул жиноятчилик, бузғунчилик, ахлоқий тубанлик, ур-иикит, ўғрилик, одам ўлдириш каби инсониятга ёт мавзуларни ёритишга ружу қўймоқдалар.

5. Ҳаётда бадиий адабиётнинг маънавий ҳаётдаги ўрни ва тарбиявий ролини оширишга алоҳида эътибор берила бошланди. Муҳтарам Президентимизнинг қатор нутқ ва маърузаларида, сұхбатларида, хусусан, “Юксак маънавият – енгилмас куч”, “Адабиётга эътибор – маънавиятга, келажакка эътибор” номли рисолаларида, адиблар билан ўтказган бир неча учрашувларида, ёзувчилар уюшмаси фаолиятини янада яхшилаш ва “Ижод” фондини ташкил қилиш тўғрисидаги қарорида бу масалага алоҳида урғу берилади.

#### **Мустақиллик даври адабиётининг асосий хусусиятлари:**

1. Адабиёт яккаҳоким мағкура тазиқи, адабий сиёsat зуғумидан халос бўлди.
2. “Бугунги адабий жараён ўз инон-ихтиёри, ички қонуниятлари асосида эркин , табиий ривожланиш йўлидан бормоқда” (У.Норматов. “Тафаккур” жур. № 1, 2009).
3. Мустақиллик йилларида Шўро даврида камситилган миллий адабий қадриятларни тиклаш, тарихни ҳаққоний, холис ёритиш, хусусан, тасаввуф ва жадид адабиётини ўрганиш имконияти туғилди.
4. Жаҳон адабиёти билан юзма-юз ижодий ҳамкорлик юзага келди. Жаҳон аренасига чиқиши йўллари излана бошланди.

#### **Назорат саволлари:**

1. “Ҳозирги адабий жараён” фани қайси давр адабиётини ўрганади?
2. Фаннинг мақсади ва вазифаси нимадан иборат?
3. Адабиётда тенденция ва концепция деганда нимани тушунасиз? Уларни сананг.
4. Ҳозирги адабий жараённи қандай тараққиёт босқичларига бўлиб ўрганиш мумкин?
5. Модернизм ҳақида маълумот беринг.
6. Мустақиллик даври адабиётининг асосий хусусиятларини санаб беринг.

## **2-МАВЗУ: ҲОЗИРГИ ЎЗБЕКЛИРИКАСИННИГ ТАРАҚКИЁТ ТАМОЙИЛЛАРИ**

#### **АДАБИЁТЛАР:**

1. Мустақиллик даври адабиёти. Т., F.Фулом номидаги АСН, 2006.
2. О.Шарафиддинов. Ижодни англаш баҳти. Т., “Шарқ”, 2004.
3. Б.Саримсоқов. Бадиийлик асослари ва мезонлари. Т., 2004.
4. И.Фафуров. Шеърият – изланиш демак. Т., АСН, 1984.
5. И.Фафуров. Мангу латофат. Т., “Шарқ”, 2008.
6. У.Ҳамдам. Янгиланиш эҳтиёжи. Т., “Фан”, 2007.

## **РЕЖА:**

1. Лирик шеърият ҳақида маълумот.
2. Ҳозирги ўзбек лирикасининг тараққиёт йўли.
3. Лирик шеърда фикр, туйғу ва руҳият.
4. Лирикада қахрамон ва образ.

Грекча “лира” сўзидан олинган лирика бадиий адабиётдаги уч асосий турнинг бири бўлиб, унда ифодаланаётган воқелик шахснинг ҳис-туйғулари, кечинмалари, идроки орқали акс этади, яъни муаллиф – шоир ташқарида рўй бераётган воқеа, нарса ёки ҳодисага қалб кўзи билан қарайди, уни қалб призмаси орқали акс эттиради. Лирика ҳаётни инсоннинг ҳис-туйғулари, фикри ва кечинмалари орқали ифодалайди. Бу лириканинг бошқа адабий турлардан фарқини қўрсатувчи энг муҳим хусусиятидир. Мана шу етакчи хусусият адабиётдаги бадиий тасвирга оид жуда кўп масалаларнинг ўзига хос шаклда ҳал этилишини талаб қиласди.

Инсоннинг ички кечинмалари орқали биз лирик шеърда ҳам одамни, ҳам уни шу ахволга солган ҳолатни, муҳитни тасаввур қиласмиш. Лирика аввало, қисқаликка интилади. Шунга қарамай, унда бадиий асарнинг барча унсурлари мавжуд бўлиб, ҳаётнинг барча қирралари акс этади. Масалан, лирик шоир ўзининг аниқ индивидуал кечинмаларини типиклаштириб, умумлаштириши, айни чоғда ўзининг шахсий муносабатини билдириб, индивидуаллаштириши ҳам мумкин. Шу нуқтаи назардан шоир Рустам Мусурмоннинг “Баҳор соғинчи” деб аталган қуидаги шеърини таҳлил қилиб кўрайлик:

### **Баҳор соғинчи**

Арчалар “ҳечқиси йўқ”қа йўйишар  
Қишининг куч-куvvatдан кетганлигини  
Ўриклар барибир сотиб қўйишар  
Баҳорнинг билдирмай келганлигини.  
Қорлар қоялардан ўзин ташлайди,  
Тоғларнинг энг чуқур дараларига.  
Чечаклар эмаклаб чиқа бошлайди  
Қишининг бўйсунмаган қалъаларига.

Лолалар очилар бирдан ловуллаб,  
Қорларнинг бошпаноҳ ўлкаларида –  
Қип-қизил шаън оқар ерга шовуллаб,  
Баҳорнинг баҳодир елкаларидан ... (“ЎзАС”, 1.03.96.)

Кўриб турганимиздек, бу шеърда аввало, одамнинг кучли ҳис-ҳаяжони бор, ана шу ҳаяжонни ифодалаб бера олган фикр бор, баҳорни соғинган шахснинг муносабати бор. Бу хусусий муносабат айни чоғда умумлашма хусусиятга эга. Унда рух бор, рухни қитиқловчи туйғу бор. Кайфият бор, кайфиятни аллаловчи оҳанг бор. Туйғулар қарама-қаршилиги бор, манзара бор, ҳаракат бор, мумтоз лирика анъаналарига содиклик бор (2-мисра “Девони луғатит-турк”ни эслатади), образлилик бор (ғиж-ғиж), деталлар мавжуд. Шеърнинг қофияланиш тартиби оҳангнинг барқарорлигини таъминлаган (а-б-а-б).

Лирикада руҳий ҳолат биринчи ўринда туради. Чунки ташки оламдаги воқеа-ҳодисалар, нарсалар ижодкорнинг дикқат эътиборини тортиб, қалбу шуурига ўрнашиб қолади, унга тинчлик бермайди, унинг ҳаёти ва фаолиятидаги ўй суриш, мулоҳаза юритиши мувозанатини бузади. “Санъаткорнинг қалбини забт этган, унинг оромини, ҳузур-ҳаловатини бузган руҳий ҳолат лирик кечинма, деб аталади” (Б.Саримсоқов). Лирик кечинма турли ҳолатларда рўй бериши мумкин. Ҳар қандай ҳолатда ҳам у тугал эстетик қимматга эга бўлган асар сифатида маҳсулот беради. Шунга кўра лирик кечинмани иккига бўлиш мумкин: 1. Оний ва 2. Хотира лирик кечинма. Оний лирик кечинма вақтингчалик бўлиб, бир пайтда лип этиб пайдо бўлади-да, эстетик қиммат берувчи маҳсулот (шеър ёки сатр) бериб ўчади ва йўқолади. Хотирага асосланган лирик кечинма эса яшовчан бўлади.

Лирик шеър одатда ҳажмининг кичиклиги билан ажralиб туради. Бунинг сабаби унинг шоир (лирик қаҳрамон) кўнглида оний лаҳза мобайнида кечган ҳис-туйғу, ўй-фикрни ифодалашга йўналтирилганлигидир. Айни чоғда ҳозирги шеъриятда ҳажман бирмунча катта шеърлар ҳам учрайдики, улар кўпроқ хотира лирик кечинмалар маҳсулидир. Лирик шеър қаҳрамони ҳам инсондир. Унда кўпинча шоирнинг ўзи лирик қаҳрамон сифатида намоён бўлади. Воқеликни лирик қаҳрамон кечинмалари орқали акс эттириш лириканинг бош хусусияти ҳисобланади. Лирикада ҳам бадий фантазия муҳим рол ўйнайди. Бунда шоир воқеликни ўз орзу-истаги, хаёлида тасаввур қилган ижтимоий идеаллар билан боғланган ҳолда тараннум этади. Буни шеъриятда эҳтиросли лирика, пафос дейилади.

Лирик шеър ўзининг сермаънолиги, фикран теранлиги, ҳис-туйғу ва эҳтиросларнинг самимиyлиги, бойлиги, шаклан ранг-баранглиги, сербёёклиги, жозибадорлиги, ғоятда мусиқийлиги билан ўқувчига манзур бўлади. Лирика энг қадимги адабий тур ҳисобланиб, унинг 20 дан зиёд жанри мавжуд. Кейинги йилларда жаҳон шеърияти тажрибаларидан ўрганиш туфайли жанрлар янада кўпайди. Бу ҳозирги ўзбек шеъриятининг бойиши ва янгиланаётганидан дарак беради.

Ҳозирги ўзбек лирикасининг ўсиш, ўзгариш, янгиланиш тамойилларини чорак кам бир асрлик “совет шеърияти” билан таққослаб ўрганилса, унинг ўзига хослиги яққол намоён бўлади. “Ҳамма нарса инсон учун, инсоннинг баҳт-саодати учун” деган ғоят баландпарвоз шиорни байроқ қилиб олган Шўро ҳукумати амалда уни бажармади. Адабиёт намояндлари халқнинг кўнглини ифодалаш ўрнига ташқаридаги воқеа-ходисаларни (м., узоқ Африкадаги якка шахснинг юрти озодлиги учун исён кўтарган ва бу йўлда курбон бўлганини кўкларга кўтариб, мадхиялар ёзилди-ю, ўзимизда шундай ҳодиса юз берса, ими-жимида йўқ қилиб юборилди), тинчликни (аслида “совуқ уруш” авжига чиқкан, ССР – АҚШ муносабатлари тараплашган эди), коммунизмни улуғлаш, шарафлаш, “тенглар ичида тенг ҳуқуқли инсон” баҳтини баланд пардаларда кўйлаш билан овора эдилар. Шуниси борки, бунинг ҳакиқат эканлигига ижодкорларнинг ўзи ҳам ишонарди, зўр бериб ўқувчисини ҳам ишонтиришга уринарди. Халқ ўз шоирларини тингларди, унинг кўзига қарамас, бош кўтармай меҳнат қиласди.

Яхшики империя парчаланди, 1991 йилда Ўзбекистон мустақилликка эришди. Аммо мамлакатнинг тўла озод бўлиши учун ўз байроғи, ўз мадхияси, ўз герби, ўз валютасига эга бўлиши камлик қиласди. Булар мустақилликнинг дастлабки қадамлари холос. Ҳақиқий мустақиллик халқнинг онги-шуурига, маънавиятига сингиши зарур. Шундагина у мустаҳкам ва бардавом бўлади. Бунинг учун адабиёт, энг аввало, шеърият тозаланиши, янгиланиши, маддоҳлик, баландпарвозлиқ, юзакилиқ, қуруқ панд-насиҳатдан воз кечиши лозим эди. Шеърият одамларнинг кўнглига кириши, осонгина, бирданига рўй бергандек туйилган мустақилликнинг аслида илдизлари чуқур эканлиги, кўп асрлар гоҳ ошкора, гоҳ пинҳона шаклда давом этган қонли курашлар эвазига кўлга киритилганлигини англатиш керак эди. Бу эса дастлаб осон бўлмади. Чунки қарийб 75-80 йил узлуксиз давом этган ва афкор омма онгига сингдирилган зўравонлик сиёсати, партиявий бошқарув, коммунистик мафкура асоратидан осонгина қутилиш, уни қисқа муддатда уч-тўртта қонунлар қабул қилиш ёки митинглар ташкил этиб, оташин нутқ ирод қилиш билан ўзгартириш мумкин эмасди. Чинакам истиқлолнинг машаққатли, суронли, аммо шарафли ва нурли одимлари бошланди.

Мустақилликнинг илк даврида ижод аҳли уч тоифага бўлинди. Иккита уюшма бир-бирини инкор этиб, фош қилиб, “кимўзар”га фаолият кўрсата бошлади. Мияси коммунистик мафкура билан тўлиб тошган кекса авлод ҳамма нарсани инкор қилишга, Шўролар даврини қўмсашга, унинг сиёсатини қайтаришга киришди. Ўрта авлод на у ёқка, на бу ёқка қўшилолмай, бир неча муддат гарангсиб турди. Жим туришни раво кўрди. Айримлар ижодни ҳам тарқ этди ва тўғри қилди. Чунки ўша мавқеи билан истиқлол адабиётидан ўрин ололмасди. Ёш авлод эса ўзини эмин-эркин ҳис қилиб, оғзига келганини қайтармай айта, ҳатто бақира бошлади. Бу ҳол дастлаб шеъриятда енгил-елпилик,

юзакилик, шаклбозлика олиб келди. Бу авлод худди XX асрнинг 20-йилларидағи пролеткультчилар сингари ўзигача яратилған адабий меросни қабул қиласлика, “совет шоири” бўлганларнинг барчасидан воз кечишга уринди.

Лекин булар вақтингчалик шов-шувлар эди. Аслида шеърият инсон кўнглига йўл излаётган эди. Бу мустақиллик даври ўзбек шеъриятининг муҳим ўзгаришларидан биридир. Энди шоир ўз нигоҳини ташқаридан, атрофда рўй бераётган турли воқеа-ҳодисалардан узиб, ўз кўнглига қаратади ва ундаги зиддиятларни, талотўпларни образли тарзда тасвирлашга киришди. Ш.Рахмон, Х.Даврон, М.Юсуф, И.Мирзо, С.Сайид, З.Мирзо, Х.Аҳмедова, Х.Рустамова, И.Отамурод каби ўнлаб шоирлар ижоди, аввало, ўз “мен”и билан ажралиб туради.

Булар орасида, айниқса, И.Отамурод кўнгил (кангул)га алоҳида эътибор беради, уни образ даражасига кўтаради. Мана, шоир кўнгилга қандай мурожаат қиласиди:

Канглум, ким ҳам сенинг ҳаддинг сиғдирап,  
Канглум, ким ҳам сенинг кўтарар ройинг?!  
Биргина ўзингсан ўзингга яар,  
Биргина ўзингсан ўзингга сойим. (“Тавр”, 28-29-б.).

Шоир ўзининг “Ичкари ... ташқари” номли достонида тўғридан тўғри кўнгил ва ҳаёт – ички ва ташқи дунё изтиробларини, зиддиятларини ифодалайди. Улар доимий ҳаракатда, бир-бирини тафтиш қиласиди, излайди, инкор қиласиди:

Ичкари ташқарига чиқмоқ истаюр,  
Истаюр ташқариди тўлувни.  
Ташқари ичкарига кирмоқ истаюр,  
Истаюр ичкарида бўлувни.

Ичкари – кўнгил, ташқари – ҳаётдан ўзига жавоб истаса, ташқари – ҳаёт ичкари – кўнгилга кириб уни тавоф килишни истайди. Шоир назарида “Ичкари – хўрсиник, ташқари – хандон. Ичкари сукунат, ташқари – ғовур. Ташқари – ғусса, ичкари – хувайдо. Ташқари – надомат, ичкари – гулгул”dir. Хуллас, Икром – кўнгил шоири, кўнгил асири, кўнгил билан иш кўрадиган, у билан сухбатлашадиган шоир. У янги сўз тўқишини, ясашни яхши кўради. Шоир ўзининг ҳар бир шеърига ёки сатрига биронта ноёб, кутилмаган сўз киритиб, уни учқунлатиб қўймаса, кўнгли ўрнига тушмайди. Зукко адабиётшунос И.Фафуров таъкидлаганидек, “Икром шу каби сўз издиҳомлари ичиди яшайди. Лекин ноёб сўзлар, ибораларни қўллашда поэтик меъёрни сақлаш бу ҳам бадиийлик ҳамда эстетик диднинг жуда муҳим элементи. Бусиз бадиият талафотга гирифтор бўлади” (И.Фафуров. Мангу латофтат. Т., “Шарқ”, 2008, 287-бет).

Мустақиллик даври адабиётида шоирларнинг ўз нигоҳини ташқаридаги муаммолардан узиб, ичкарига – ботинга қаратиши шу давр шеъриятининг туб янгилиги ҳисобланади. Бундай шарафга ўзбек шоири қарийб чорак кам бир аср мобайнида мустақиллик шарофати туфайли эриша олди. У ўзи хоҳлаганча кўнгил розини тўкиб солишига, у билан баҳслашиш, яқиндан сухбатлашиш баҳтига муюссар бўлди. Бундай шеърларда фуқарони қандайдир буюк ишларга даъват этадиган оташин чақириклар йўқ, ижтимоий масала йўқ. Бирок улар айнан биз ҳақимизда, кўнгилимиздаги адоксиз сиру синоат ва изтироблар ҳақидадир. Шу жиҳати билан бизга яқин ва қадрдондир. Масалан, З.Мирзонинг “Нур қуқунлари”, Ҳ.Аҳмедованинг “Умид сояси”, Р.Рахмоннинг “Хасталик дафтари” деб аталган китобларини мутолаа қилинг: нуқул ҳижрон, дард, ўлимни куйлади. Гарчи булар умуминсоний туйғулар бўлса-да, 20-30 йил олдин уларнинг дунёга келиши даргумон эди. Бундай шеър муаллифлари албатта тегишли жазосини оларди.

Бироқ шуни ҳам таъкидлаш ўринлики, истиқлол даври шеърияти факат кўнгилнинг интим кечинмаларини куйлаш билан чекланиб қолаётгани йўқ. С.Сайид, И.Мирзо, М.Мирзо, У.Азим, А.Суюн, Турсун Али каби шоирлар ижодида ижтимоий масалалар ҳам баланд пардаларда куйланмокда. Аммо бу ижтимоий масалалар айrim шоирлар томонидан баландпарвоз сўзлар орқали ҳиссиз, куруқ ҳолда ифодаланаётгани ҳам сир эмас. Фикрим исботсиз бўлиб қолмаслиги учун битта мисол келтирай:

Бу дунёда миллатлар кўп, эллар кўп,  
Эллатлар кўп, тақдирлар кўп, йўллар кўп,  
Бир ён чаман, бир ён сахро, чўллар кўп,  
Ўзинг менинг ягонамсан диёrim,  
Дурлар ичра дурдонамсан диёrim.

(К. Синдаров. Ўзинг менинг ягонамсан. Т., 2008. 3-б.).

Ха, адабиётшунос У.Ҳамдам айтганидек, айрим шоирлар катта масалаларни ифодалашда “кичрайиб”, “майдагап” бўлиб қолаётирлар.

Хуллас, истиқлол даври шеърияти лирик қаҳрамоннинг баркамоллиги сари дадил одимламоқда. У ўз йўлида учраётган майда-чуйда камчиликларни юксак поэтик образлар яратиш билан енгиб боради.

#### **Назорат саволлари:**

1. Лирика нима? У қандай хусусиятларга эга тур?
2. Лирик кечинма ва унинг моҳияти ҳақида гапиринг.
3. Лирик тур жанрларини сананг.
4. Истиқлол даври лирикасининг совет даври шеъриятидан фарқини айтинг.
5. “Кўнгил шеърияти” деганда нимани тушунасиз?
6. Субъективизм иллати нима?

### **3-МАВЗУ: ҲОЗИРГИ ЎЗБЕК ШЕЪРИЯТИДА МАВЗУ ВА ҒОЯ БИРЛИГИ**

#### **АДАБИЁТЛАР:**

1. Мустақиллик даври ўзбек адабиёти. Т., АСН, 2006.
2. И.Фафуров. Шеърият изланиш демак. Т., АСН, 1984.
3. И.Фафуров. Мангу латофат. Т., “Шарқ”, 2008.
4. У.Ҳамдам. Янгиланиш эҳтиёжи. Т., “Фан”, 2007.
5. Й.Солижонов. Ҳақиқатнинг синчков кўзлари. Т., А.Навоий номидаги Ўзбекистон миллий кутубхонаси нашр. 2009.

#### **РЕЖА:**

1. Бадиий асарда мавзу ва ғоя ҳақида.
2. Ҳозирги шеъриятнинг мавзу доираси.
3. Лирик қаҳрамон, лирик образ ва ғоя бирлиги.

Бадиий адабиёт учта муҳим элементдан ташкил топади. 1-тил, 2-мавзу, 3-сюжет. Бу рақамларни яна давом эттириш мумкин (характер, конфликт, ғоя, қаҳрамон, тасвир, усул қаби). Аммо мавзусиз асар юзага келмайди, худди умуртқасиз организмга ўхшаб қолади. Рус адаби М.Горький айтганидек, “Мавзу муаллиф тажрибасида бунёдга келган, ҳаётнинг ўзи кўрсатиб берган, аммо ҳозирча муаллиф тасаввурида ҳали тўла-тўқис шаклланмаган бир ҳолда сақланиб, образлар орқали гавдалантиришни талаб қилиб, ёзувчida ишлашга майл уйғотадиган ғоядир” (М.Горький. Адабиёт ҳақида. Т., 1962. 241-б.). Мавзуни асар ғоясидан ажратиб бўлмайди, агар мавзу муаллиф тасвирилаётган нарса, воқеа, ҳодиса бўлса, ғоя ана шу ифодаланаётган мавзу орқали айтилмоқчи бўлган фикрdir, ёзувчининг хulosасидир. Шу маънода мавзу – бу ёзувчи томонидан асарда қўйилган ва аниқ ҳаётий материаллар асосида ёритилган муаммодир. Мавзу ва ғоя асарнинг ғоявий – тематик бирлигини таъминловчи асосдир. Мавзу тушунчаси асарнинг бутун моҳиятидан келиб чиқади, ғоя эса ёзувчининг миясида етилган асосий фикрdir. Бу фикр маълум бир воқелик орқали бадиий образлар ёрдамида ўкувчига етказилади. Бадиий асар мавзусини одатда воқелик белгилайди. Мавзунинг ёритилиши кўп жиҳатдан санъаткор маҳоратига боғлиқ. Бир мавзу турли адилар томонидан турлича ёритилиши мумкин. Ўқувчини қизиқтирадиган, даврнинг муҳим ва долзарб мавзулари ҳақида ёзиш, мавзу танлай билиш ижодкорнинг талантига боғлиқ.

Энди мавзу ва ғоя бирлиги масаласини ҳозирги ўзбек шеърияти мисолида кўриб чиқайлик. Шу нарса қувончлики, мустақиллик даври ўзбек адабиётида мавзу чекланмаган, шўролар пайтидагидек таъқиқланган мавзу йўқ. Ижодкор хоҳлаган мавзу бўйича асар яратиши мумкин. Фақат унинг ғояси умумбашарий тарбиявий аҳамиятга эга бўлсин. Инсонни ёвузликка эмас, эзгуликка чорласин. Ижодий эркинлик берилганлиги туфайли ҳозирги ўзбек шеъриятининг мавзу кўлами кенг ва ранг-барангдир. Адабиётшунос У.Ҳамдам “бугунги ўзбек шеърияти мавзуларининг ишланиш кўлами ва даражасига қараб” қуйидагича тасниф этишни таклиф қиласди:

- ишқий интим мазмундаги шеърлар;
- интим мазмунли шеърлар (буларнинг фарқи шундаки, бирида оҳ-воҳ, тушкунлик кўп; иккинчисида – умидбахшлик кучли; яна қўнгилнинг турфа интилишлари, фақат ёр эмас, она, юрт, дўст ва ҳ.к.).
- мадхия – бағишлош шеърлар;
- ухровий мазмундаги шеърлар (биз буни руҳоний шеърлар деб атаганмиз, яъни дунёнинг ўткинчилиги. Яратганга илтижо, тавба – тазарру – Й.С.);
- тарихий мазмундаги шеърлар;
- панд – насиҳат шеърлар;
- Ватан ва унинг мустақиллиги ҳақидаги шеърлар;
- ўлим мавзусидаги шеърлар;
- бошқа ҳар хил мавзудаги шеърлар:

Албатта, олимнинг ўзи айтганидек, бу тасниф ғоят шартли бўлиб, уни янада кенгайтириш ҳам, қисқартириш ҳам, баъзиларининг ўрнини алмаштириш ҳам мумкин. Бу мавзулар орасида ишқий ҳамда интим мавзудаги шеърлар салмоғи жуда баланд, ҳатто кейинги 20 йиллик ўзбек шеъриятининг асосий қисмини эгаллайди. Аммо уларнинг кўпчилиги ўта субъективлиги, тушкун кайфиятда ёзилганлиги, ўқувчини муҳаббатнинг ҳаётбахшлиги, куч-кудратига ишончини оттиришга ўргатиш ўрнига, нуқул ҳижрон, ёлғизлик, бевафолик, йўқотиш, сарсонлиқдан иборат оҳу-нолаларни ифодалаётгани ҳам сир эмас (бу ҳақда қаранг: Й.Солижонов. Ҳақиқатнинг синчков кўзлари. 158-168-б.). Бинобарин, севги, вафо ва вафосизлик, ҳижрон ва ўлим сингари умуминсоний мавзулар ҳамма даврда ҳам бўлган, ҳар бир давр кишиси севиш, севилишга, йиғлаш ёки қулишга, табиат гўзалликларидан баҳраманд бўлишга, булар тўғрисида ўлашшга, ёзишга ҳақлидир. Бироқ ушбу мангууликка дахлдор туйғулар, барқарор фикрларни бачканалаштириб, сохталаштириб, нуқул кўз ёши билан сугориб ифодалашга ҳар доим ҳам яхшиликка олиб келавермайди.

Истиқлол даври шеъриятининг бош мақсади Ватанга садоқатли баркамол авлодни тарбиялаш, ҳалқнинг миллий онгини шакллантириш, ўзлигини танитиш, эркин рухни ўстиришдан иборатдир. Ҳозирги пайтда шеър ҳақидаги тасаввур ҳам, шеъриятга муносабат ҳам тубдан ўзгарди. Истиқлол шеърияти ҳам шакли, ҳам мазмуни жиҳатидан бошқачароқ сифат касб эта борди. Унда ижтимоий тафаккур юки ортди. Бу борада ижодкорларнинг ўрта авлодига мансуб тоифа ибрат кўрсатаёттир. Э.Воҳидов, А.Орипов, О.Матжон, Р.Парфи, У.Азим, Х.Даврон, Ҳ.Худойбердиева, уларнинг изидан бораётган С.Сайид, И.Мирзо, М.Мирзо, А.Қутбиддин, З.Мирзо, Ҳ.Аҳмедова, Ҳ.Рустамова, Г.Бегим сингари ўнлаб шоирлар ибрат кўрсатмоқдалар. Шуниси мухимки, уларнинг шеърлари замоннинг чирсиллаб турган воқеаларидан холи эмас, айни чоғда қадим мумтоз шеъриятимиз анъаналаридан ажralиб ҳам қолган эмас.

Бироқ шуни ҳам яширмаслик жоизки, мустақиллик даври адабиётининг илк босқичи (1990-2000)да ғоядан, ғояпарастликдан узоклашиш сезилди. Бу адабий ҳодисанинг икки томони бор: бири фойдали, иккинчиси заарли. Ғоядан воз кечишнинг фойдали томони шунда эдики, ўзбек шеърияти истиқлол йилларида совет давридаги сингари ғояпарастликдан қутилди. Маълумки, ўзбек “совет” шоирлари коммунистик партия сиёсатини улуғлашга, шиорларни байроқ қилиб олишга, коммунизмни мадҳ этишга мажбур эди. Инсоннинг кўнгли, ташвиши билан мутлақо иши бўлмасди. Энди

шөөрият хукмрон ғоядан, ягона етакчи мафкурадан қутилгач, бир муддат нимани күйлашни, қандай ғояни илгари суришни билмай гарангсиб қолди. Боиси, адабиёт пайдо бўлганидан бери, айниқса, чорак кам бир аср давом этган совет мустамлакачилиги даврида турли даражада, хар хил шаклларда зимдан куйлаб, интилиб келган асосий орзуси (эрк мавзуси) – мустақиллик қўлга киритилган, юрт озодликка эришган, миллий ғурур тикланган, хуллас, муаммолар ҳал қилинганди. Ватан озод бўлди, мақсадга эришилди. Хўш, энди нимани күйлаш, қандай ғояни илгари суриш керак? Ғоясизлик шундан келиб чиқди.

Аммо бу ғоясизлик узоқ давом этмади. Маълум бир тараффуддан сўнг шоир ўз “мен”ига мурожаат қилди. “Мен”нинг ичи – кўнгил - дардга тўла эди, у жуда занглаган, диққинафас бўлган эди. Ўзига эътибор берилганидан қувонибми, ўксинибми, ох-воҳ қила бошлади. Оғзига келганини айта бошлади. Уни ҳамма ҳам эшитавермади, чунки ҳар кимнинг ташвиши ўзига етарли эди. Умумнинг дардини тушуниш, кўйлаш учун кўнгилни занглардан, ғуборлардан тозалаш керак эди. Кўнгилга эришилган мақсаднинг улуғлигини, мустақилликнинг шукухини, уни мустаҳкамлаш туйғусини, миллатнинг эртанги қайғусини, буюк давлат яратиш орзусини сингдириш зарур эди. Бора-бора бунга эришилди ҳам. Бинобарин, шеърият XXI аср бошларидан тўла маънода янгиликка юз ўғирди, унда том маънодаги ижобий, ўзгаришлар рўй бера бошлади. Кўз ўнгимиизда юз очаётган бу нафис олам – мустақил юрт фуқаросининг ўзлиги, ҳалқнинг шаклланаётган ва тобора янгиланаётган миллий онги, маданияти, қадриятларининг тикланиш, маънавияти, миллий истиқлол ғояси сингдирилган мафкура билан чамбарчас боғлиқ эди.

Шеър бу – инсоннинг қалби, рухи эканлиги амалда исботлана бошлади. Қалб билан рух эса илоҳиятга тегишли, унга ёндашdir. Яхши шеър ёзилмайди, балки туғилади, воқеъ бўлади. Бу ғайб илми билан боғлиқ бир сирли ҳолатдир. Дарвоке, ҳақиқий шоир ҳам бирорнинг йўл-йўриғи билан эмас, яратганинг амри билан ижод қиласди. Шунга амал қилиш асносида шоирлар ва шеърлар саралана бошлади. Бинобарин, шеър яратиш бақироқлик маҳсули эмас, балки ибодат эканлигини, ижод бу саждага боз қўйишдек муқаддас ҳолат эканлигини, худди оятлар меҳр билан шивирлаб ўқилгани сингари шеър ҳам сухбатдошни ёнингга чакириб, “Дилингдаги сирни дўстингга очмоқ каби қутлуғ маросим” (Х.Даврон) эканлигини англаган шоирлар ажралиб чиқди. Улар Ватан, миллат, ёр, инсон, ер, вафо, баҳт, қайғу тўғрисида бу сўзларни ишлатмай ҳам шу қадар эҳтирос билан ёздиларки, уларни ўқиб, ҳаяжондан ўзингизни босолмайсиз, муҳаббат ифоридан бошингиз айланади.

Шундай шоирлардан бири ҳамюртимиз Турсун Алидир. Унинг шеърлари асосан Ватан мавзуига бағищланади. Аммо уларнинг аксариятида “Ватан”, “диёр”, “юрт” деган сўзлар, одатдаги оташин ва ёлқинли хитоблар, ох тортиш, кўксига уриб бақириш учрамайди. Шоир бу туйғуларини секингина, оҳиста, босиқлик билан айтади (шунинг учун ҳам китобнинг номи “Сокин ҳайқириқ” деб қўйилган). Ажабки, мана шу сокинлик бағрида Ватанга муҳаббатнинг ўчмас ва қудратли олови, туйғуни портлатувчи атом зарраси, кайфиятни осмон қадар кўтарувчи пўртана яширган. Масалан:

Уйимдан узоқда  
бироқ  
яшайман уйимда.

Шундай сатрларни шу ва бошқа шоирлар ижодидан топинг ва тахлил қилинг.

Шу билан бирга бу давр шеъриятида “Ватан! Мен сени севаман! Сенсиз менга ҳаёт йўқ!” деб бақираётган шоирлар ҳам кўпайди (аслида у жуда bemalol, begam-betashvish яшаётган бўлади). Қуруқ дабдаба, айюҳаннос солиш, бақириш – кучсизлик белгиси эканлигини унутмаслик зарур. Ватанга муҳаббат, ёрга садоқат сингари улуғ тушунчалар ҳакида қуруқ сафсата сотувчи шоирлар назаримда, банк ходимларига ўхшайди: кунига қўлидан беҳисоб пул ўтади-ю, унга эга бўйлмайдилар. Чунки бу пуллар ўзиники эмас-да! Пулнинг хиди на тўйдиради, на сархуш қиласди; на рангининг юки қолади. Ҳозирги шоирлар орасида қандайдир “шеърбозлар” кўпайиб кетганга ўхшайди. Улар ҳамма

нарсадан шеър яратишга, ўкувчини ҳайратда қолдиришга уринаётгандек оҳанжама усулларда, баландпарвоз сўзларда “шиғир” битишга уринмоқдалар. Ваҳоланки, уларнинг таъсир кучи кам, гўё қофоз гуллардан ясалган гулдастага ўхшайди. Шалдироқ овоз чакиради-ю, хиди йўқ, кўриниши ғоят гўзал-у, таровати йўқ.

Шукурки, баҳтимизга “бадиий ижод ҳақиқий диёнат ва пок диний эътиқод сингари муқаддас иш” (Л.Толстой) эканлигини амалда исботлаётган Э.Воҳидов, А.Орипов, Ҳ.Худойбердиева, О.Хожиева, У.Азим, И.Отамурод, И.Мирзо, С.Сайийд сингари ўнлаб шоирларимиз бор. Улар ҳақиқий шеър инсоннинг том маънодаги руҳиятини акс эттирувчи кўзгу бўлиши учун астайдил курашмоқдалар. Улардан бири:

Шунчаки ёзмоққа қўнгил тўлмайди,

Шунчаки ёзмоққа бормайди қўлим.

Шунчаки ёзганга чидаб бўлмайди,

Шунчаки ёзмоқ бу – шоирга ўлим! (Ҳ.Худойбердиева) дея ҳайқирган бўлса, яна бири:

Ҳақ гап учун ҳар бир ишга қўнади эл,

Тўғри сўздан кўпаяди, тўлади эл.

Дордан кўркиб ёлғон айтиб турганим йўқ,

Шоирлари ёлғон айтса – ўлади эл (У.Азим) дея жўр бўлиб, ёлғон шеърият лашкарига қарши майдонга чиқади. Бошқасига эса дилидаги дардини, оташин мухаббатини оҳистагина:

Мен куйиниб севаман, нетай,

Мен куйиниб сўзлайман холос деб изҳор этган бўлса (Р.Парфи), яна бир шоиримиз “Ўзим ўз қалбимнинг Колумби” бўлиб кашф этишим, бунинг учун дараҳт сингари ёнишим керак деб қасам ичади:

Дараҳтлар ёнмоқда бугун дунёда,

Ёниб, ўзгаларни уйғотмоқ не баҳт!

Дўстларимдир барча ёнаётгандар,

Юрагимдир ёнаётгандарахт! (О.Матжон).

Ана шундай оташнафас шоирларимизнинг ҳалол ва беминнат меҳнати туфайли истиқлол даври шеъриятининг мавзу кўлами кенгайди, ғоявий юки ортди. Гап факат мавзу ва муаммоларнинг кенгайланлигидагина эмас. “Ана шу мавзу ва муаммоларнинг ифода тарзи, бадиий таҳлил этиш санъати, услублар ранг-баранглиги, ҳалқ йўлидаги баҳшиёна, ҳалқ достонлари, термалари йўлидан тортиб, олис Япон шеъриятидаги танка, хокку шаклларидағи асарларигача пайдо” (Б.Назаров) бўлганлигига, яъни шеъриятнинг ҳам мазмунан, ҳам шаклан кенгайланлигидадир.

Хулоса қилиб айтганда, ҳозирги ўзбек шеърияти мавзу ва ғоя жабҳасида донғил йўлга чиқди. Бу йўлда унинг эгаллаши лозим бўлган манзиллари ҳали олдинда...

### **Назорат саволлари:**

1. Мавзу ҳақида маълумот беринг.
2. Ғоя нима? Ғоясизлик ва ғояпарастлик-чи?
3. Истиқлол даври шеъриятининг мавзу кўлами бўйича таснифни айтинг.
4. Ҳозирги ўзбек шеъриятининг асосий мавзуси ва бош ғоясини аниқланг.
5. Кўнгил шеърияти деганда нимани тушунасиз?
6. Ҳозирги ўзбек шеъриятининг камчилиги нимада кўринади?
7. Ҳозирги ўзбек шеъриятининг етакчи шоирларини айтинг ва улар ижодидан мисол келтиринг.

## **4-МАВЗУ: ЛИРИК ШЕТЬРДА ШАКЛ ВА МАЗМУН БИРЛИГИ АДАБИЁТЛАР:**

1. Мустакиллик даври адабиёти. Т., 2006.
2. И.Фауров. Мангу латофат. Т., “Шарқ”, 2008.
3. У.Ҳамдам. Янгиланиш эҳтиёжи. Т., “Фан”, 2007.
4. Б.Саримсоқов. Бадиийлик асослари ва мезонлари. Т., 2004.
5. Й.Солижонов. Ҳақиқатнинг синчков кўзлари. Т., 2009.

### **РЕЖА:**

1. Бадиий адабиётда шакл ва мазмун муаммоси.
2. Бадиий асарда шакл ва мазмун бирлиги.
3. Мазмун ва шакл унсурлари.

Шакл ва мазмун категорияси адабиётшуносликнинг муҳим масалаларидан бири саналади. Бу масала Аристотелдан то ҳозиргача бўлган олимларнинг дикқат-эътиборида туради, баҳс-мунозара га ундаиди: уларнинг қайси бири муҳим? Шакл аввал пайдо бўлганми ёки мазмунми? Маълумки, ҳаётда ҳамма нарса ўз шакли-шамойили билан яратилган. Биз ниманики кўрсақ, дастлаб шаклига эътибор берамиз. Масалан, мана бу шохлари тарвақайлаб, барги тўкилаётган, илдизлари ерга чукур кирган, танаси ғадир-будир, пўстлоғи қалин, осмонга бўй чўзган “нарса”ни “дараҳт” деймиз. Бу умумий ном бўлиб, хаёлимизга дарҳол “қанака дараҳт?” деган савол урилади. “Чинор” деймиз. Демак, кўз олдимиздаги шаклнинг мазмунини англатувчи тушунча пайдо бўлди. Давом этамиз: “Чинор” кўп минг йиллик дараҳт, ёғочи мустаҳкам, қурилишбоп, қимматбаҳо. А.Мухторнинг “Чинор” романи бор” ва х.к. Қаранг, биргина шаклга караб туриб қанча фикр (мазмун) пайдо бўлди. Агар чинор арралаб ташланса, у шаклл сифатида ҳам, мазмун сифатида ҳам йўқолади. Кесилган дараҳт энди “тўнка”, “ғўла”, “саржин” бўлади. Демак, шакл ўзгариши билан мазмун ҳам ўзгариади.

Бундан шу нарса англашилади, мазмун билан шакл ўзаро диалектик бирлика намоён бўлади. Уларни бир-биридан устун қўйиб ҳам, ажратиб ҳам бўлмайди. Шакл ва мазмун бир-бирисиз яшолмайдиган категориялардир. Уларнинг аҳамияти айниқса, бадиий асарда аниқ кўзга ташланади. Бадиий адабиётда шакл ва мазмуннинг ўрни, уларнинг диалектик алоқадорлиги, бир-бирини тақозо этиши, мазмун ва шакл мутаносиблиги адабиёт қонуниятидир. Қаердаки, уларнинг мутаносиблиги бузилса, бадиий асарнинг яхлитлигига путур етади. Чунки адабий асар ўз тузилишига кўра яхлит организмни, мураккаб механизмни ташкил этади. Бу организмда ўнлаб ғоявий-бадиий унсурлар жойлашган бўлади. Булар мавзу, ғоя, образ, сюжет, композиция, тил, характер, конфликт, жанри, методи, услуби ва х.к.лардир. Уларнинг биронтасисиз бадиий асарни тасаввур қилиб бўлмайди. Бу адабий унсурлар бадиий асар тўқимасида ўз ўрнида бўлиши шарт. Бу унсурларни шартли равишда мазмун ва шаклга даҳлдор деб ажратиш мумкин. Сиз бундай таснифни “Адабиётшуносликка кириш” фанидан ўрганиб оларсиз. Бизнинг вазифамиз уларга муносабат билдириш эмас, балки ҳозирги адабий жараёндаги шеъриятнинг шаклидаги янгиликлар, ўзгаришлар, шаклнинг мазмунни ифодалашдаги ўрни, мутаносиблиги ёки номутаносиблигини аниқлашдан иборатдир.

Одатда тузумнинг ўзгариши, жамиятнинг эврилиши, яшаш тарзининг янгиланиши бадиийлик мезонларининг ҳам ўзгариши ва янгиланишига, образлар, ғоялар, мавзуларнинг ифодаланишида ўзгача шаклларнинг пайдо бўлишига олиб келади. Чунки адабий жараён пўртанавор ҳодисаларни янгича шаклда намоён этишга ишқибоз бўлади. Бу, айниқса, шеъриятда очик кўринади. Адабиётга кириб келган ёшлар фаолликни қўлга олади. Улар кекса авлоднинг ижодий йўлини “эскирган” санаб, янгича йўл излай бошлияди.

ХХ асрнинг 30-йилларида шундай ҳодиса юз берганди. Янги совет тузумининг социалистик қурилишларини янгича шаклда куйлашга ишқибоз шоирлар етишиб чиқди. Уларни кейинчалик “футуристлар”, “символистлар”, “формалистлар”, “натуралистлар” деган турли номлар билан аталди. Улар мазмундан шаклни устун қўйдилар.

Шаклбозлика берилган шоирлардан бири Ш.Сулаймон социалистик тузумнинг “тигант қурилишлари”ни (аслида йўқ эди!) ифодалаш учун турли-туман символларга мурожаат қиласди:

Тоғлар-ла, тошлар-ла,  
Хей, тоғлар-ла, тош-ла.  
Бакирди,  
Ҳайқирди,  
Ҳайқирди бир овоз.  
Саф рост.  
- Тўплан!  
Ҳайқирди, бақирди,  
Бақирди миллионлар.  
- Тайёр, чоғлан!  
Шиор, кун шиори:  
Кураш, ўзиш,  
Электр, радио,  
Добролют... химия, флот,  
Санъат, техника, ўт...

Кўриниб турибиди, шоир бу шеърида мазмундан ҳам, шаклдан ҳам узоклашади, кераксиз, тутуриксиз сўзларни қўллайди. Мантикий жиҳатдан бир-бирига боғланмаган “Электр, радио, добролют (?), химия, флот, санъат, техника, ўт” каби атамаларни қалаштириб ташлайди. Умуман, шоирнинг нима демоқчи эканини билиб бўлмайди. Шуниси борки, Ш.Сулаймон гоҳ “сарбаст”, гоҳ “эркин”, гоҳ “сочма шеър” номлари остида эълон қилган шеърларида ҳам шаклбозлиқдан қутилмади.

Адабий ҳаётда янгича шакл қўллаб, даврга жўровоз бўлишни истаган шоирлардан яна бири Умаржон Исмоилов эди. Бу шоир ҳам ўз фикрини ифодалашда шаклбозлика берилиб кетади, футуристик (лот. келажак), символистик элементларни ишлатади. Шеърларида ишлаб чиқариш оҳангларини бериш учун ритмни бузади, сунъий сўзларни қўллайди. Масалан, “Турксиб ашуласи” шеърини “паровоз ғилдираги оҳангига ўқиш”ни маслаҳат беради ва шундай сатрлар яратади:

Ўртоқ, а-а-а—арш!	Ижтимоий
Йўл-лар-ни - оч,	Хаёт учун
Тур – муш – лар соч	пахта элитар.
Турк – турк, сиб – сиб,	Ур –р – руф тиккил,
Омоч оғир, сўқа – сўқир,	Қўлинг енгил.
Тр – р – ракторга	Тук-тук, тик-тик,
Дехқон ўтири!	Тук-тук, тик-тик.

Албатта бу шаклбозлик узоқ давом этмади. Бироқ, бу мисоллар даврдаги ўзгаришлар шаклларнинг турлича қўринишини рўёбга чиқаришга имконият яратади деган фикрни исботлайди. Ўтган асрнинг 80-90-йилларига келиб ўзбек адабиётида ҳам шакл борасида янгиланишлар, турли экспериментлар вужудга кела бошлади. Ижодкорлар ўртасида табақаланиш юз берди. Зимдан ҳаёт ва адабиётга муносабат дид ҳамда савия ва эстетик қарашлараро кураш ва зиддиятлар кучайди. Ҳатто ёзувчилар уюшмаси иккига ажralиб, алоҳида фаолият юрита бошлади. Бунинг оқибатида нафақат кекса авлод билан ёшлар ўртасида, балки тенқурлар ўртасида ҳам муносабат нозиклашди. Бу шеъриятнинг шакли ва мазмунининг ўзгаришга ҳам жиддий таъсир қилди. Мазмун ва гояни ифодалашда янгиликка эришишга интилаётган ижодкор турли қийинчилкларга учрайди. Уни енгиб чиқиш учун турли усусларга кўл уради, ютоқиб янгича шакл излай бошлайди.

Истиқлол даври адабиётининг ilk босқичида хусусий матбуот ва нашриётларнинг пайдо бўлиши ва умуман, жамиятда, фикрлашда ошкоралик, эркинлик турли даражадаги паст-баланд, қинғир-қийшиқ, кўпинча, ўта саёз асарлар оқимининг пайдо бўлишига олиб келди. Баъзи қаламкашлар тўғридан-тўғри Farb адабиётига тақлид қила бошладилар.

Тақлидчилик эса ижодкорни ҳеч қачон рўёбга чиқармайди. Даврнинг ўзи шоирлардан янги шеърий шаклларни талаб қила бошлади. Бу талабга биринчи бўлиб Э.Воҳидов, А.Орипов, Р.Парфи, Ҳ.Худойбердиева, О.Матжон, О.Мухтор, А.Обиджон каби шоирлар жавоб бердилар. Масалан, инсоннинг хижрон ва вафо соғинчини босиқ оҳангларда куйлашга мослашган ғазал жанри Э.Воҳидов учун замоннинг ўта сиёсий, исёнкор масалаларини кескин публицистик оҳангда баён этишга хизмат қилди. Ёки А.Ориповнинг чуқур дард билан суғорилган шеърлари истиқлол мазмунининг кучи билан бир қадар қисқа ва кескин шаклга кирди. О.Матжон юрт озодлиги, ҳалқ тафаккуридаги тўлғоқларни ифодалаш учун “Хамса” шаклларига мурожаат қилди. А.Обиджон эса шеъриятда мазмун ва шаклнинг мутаносиблигини ўзининг уста Гулмат тилидан айтилган ғазаллари, бир сатрдангина иборат “игнабарг шеърлар”и, икки мисрадан ташкил топган “фард”лар (ракамлар билан белгиланган) шаклида баён қилди. Сиз унинг ижодини амалий машғулотда ўрганганингизда ихчам шаклларда кучли киноя орқали замон иллатлари фош этилганига, яъни мазмуннинг кичкина хумга солинган олтин сингари ярқираб туришига эътибор беринг. Шоир жуда катта ижтимоий мазмунни “игнабарг шеърлар”ида бир сатрга, “фардлар”ида икки мисрага, “Уч чаноқлар”ида уч қаторга сиғдира олишнинг устидан муваффақиятли чиқа олди. Уларни ўқиган ўқувчи чуқур ўйга толади, фикрлайди, хулоса чиқаради. Бунинг учун унинг ўзи ҳам катта билим захирасига эга бўлиши талаб этилади. Масалан, мана бу сатрларни шарҳланг-чи:

Қармоқ солсам, кулфат илинди.

\* \* \*

Ухласа, сал ҳалол яшайди.

\* \* \*

Ёлғон тарих шол қилди мени.

\* \* \*

Қарз олсанг, соқовдан ол.

\* \* \*

Итни итга тишлатиб, вақти ҷоғдир итбоқар,

Бўлди мажруҳ икки ит, ўзи соғдир итбоқар

\* \* \*

Кириб олдинг хонамга,

Ҳеч бўлмаса боламга

Сўйла менинг тилимда

\* \*

Очсам тарих китобин,

Хўжайин чўзиб олтин,

Дер: “Қилсанг-чи майшат!”

Бу ихчам шаклларда баён этилган мазмунни изоҳлаш, тушунтириш учун қанча вакт, неча қофоз керак. А.Обиджоннинг шакл ва мазмун борасида ўтказаётган экспериментлари фоят муваффақиятли чиқаётганини, А.Қодирий айтганидек, “Сўз қолип, фикр унинг ичига куйилган ғишт” бўлишига эришаётганини, “сўз сўйлаш ва улардан жумла тузишда узоқ андиша”га риоя қилаётганини таъкидлаш ўринлидир.

Фарида Афрӯз, Фахриёр, Баҳром Рўзимуҳаммад, Шермурод Субҳон, Абдували Кутбиддин каби шоирлар ҳам янги шакллар излаш, унга мутаносиб маънони сиғдира олиш борасида жиддий изланишлар олиб бораётирлар. Масалан, Ф.Афрӯз ҳам кўплаб уч мисралик шеърлар яратди ва уларни ўқувчисига “тасбехлар” деб тақдим этди. Адабиётшунос Қ.Йўлдошев эса шоира Ф.Афрӯз тасбех жанрига асос солди деб айтди. Шу олим А.Суюннинг “Эй дўст!” туркумидаги беш мисралик шеърларини “қайирма” жанри деб эълон қилди. Бу шаклларнинг илдизлари ўзимизнинг кўхна Шарқ адабиётида ҳам мавжудлигини инобатга олсақ, уларга алоҳида жанр деб баҳо бериш ортиқчалиги сезилиб қолади.

Шакл борасида кўпдан бери турли экспериментлар ўтказаётган шоирлардан бири Фахриёрдир. Адабиётшунос Қ.Йўлдошев айтганидек, аввало, “Фахриёрнинг шеърларини ўқиш ҳам, уқиш ҳам, таъсирланиш ҳам унчалик осон эмас” (“Ёниқ сўз”, Т., “Янги аср авлоди”, 2006). Чунки у ўз тафаккурида пайдо бўлган ўй, нарса ва ҳодисаларни, ҳистойгуларни турли шаклларда ифодалашга уринади. Шоир биринчи галда бой ўзбек тилидаги сўз шаклларига (“Суйгулим, суй, гулим, суйгу лим” каби), геометрик формулаларга эътибор беради, шеърда айтмоқчи бўлган мазмунни чизма шакллар воситасида ифодалайди. Унинг шакл борасидаги изланишларига синчиклаб қаралса, мумтоз Шарқ шеъриятидаги ҳарфлар санъати (“жоним”даги “жим”...), Гарб адабиётидаги каллиграфия санъати, график усул, кубизм йўналиши таъсир этганлигини англаш қийин эмас. Сиз амалий машғулотларда шу санъатлар билан боғлаб таҳлил қилсангиз, шаклнинг мазмунни ифодалашдаги ўрни ва ролини очган бўласиз.

Хуллас, оташнафас шоир Чўлпон устози Фитратга бағишлиланган шеърида “Сен сўзга ипакдан кўйлаклар кийгаздинг” деб ёзганида шоир шеърларининг мазмунни шаклига ниҳоятда мос келишига ургу берганди. Бинобарин, ҳар қандай фикр, мазмун ўзининг гўзал шаклига муҳтождир. Шундагина у ўқувчи қалбидан муносиб ўрин олади ва узоқ яшайди.

#### **Назорат саволлари:**

1. Шакл ва мазмун ҳақида маълумот беринг.
2. Шакл элементларини аникланг.
3. Мазмун элементларини аникланг.
4. Шаклбозликка берилишнинг оқибати баҳайрми?
5. Шеъриятдаги футуризм, символизм, хаттотлик санъати, географик фигуранлар ҳақидаги тушунчангиз?
6. Ҳозирги шеъриятдаги мавжуд шакллар ва уларнинг мазмунга мутаносиблиги ҳақида гапиринг.

### **5-МАВЗУ: ЛИРИК ШЕЪРИЯТДА МЕТОД ВА УСЛУБ АДАБИЁТЛАР:**

1. И.Султон. Адабиёт назарияси. Дарслик. Т., “Ўқитувчи”, 2005.
2. Т.Бобоев. Адабиётшунослик асослари. Дарслик. Т., “Ўзбекистон”, 2002.
3. Д.Куронов. Адабиётшуносликка кириш. Дарслик. Т.. “Фан”, 2007.
4. Д.Куронов, З.Мамажонов, М.Шералиева. Адабиётшунослик луғати. Т., “Академнашр”, 2010.

#### **РЕЖА:**

1. Адабиётда метод ва услугуб масалалари.
2. Ижодий методнинг ўзига хослиги.
3. Адабий ижодда услугуб унинг ранг-баранглиги.

Барча луғатларда метод грекча (юн.) сўз бўлиб, тадқиқот, тадқиқ усули деб изохланган. “ЎзМЭ”да (5-т) бунга қўшимча равишда “билиш ёки тадқиқот йўли, назария, таълимот” каби маънолар қўшилади. Барча манбалардаги изохларни бирлаштириб туриб, методга қуйидагича таъриф бериш мумкин: метод деганда ҳаётни эстетик нуқтаи назардан ўрганиши ва ўзлаштириши, уни бадиий жиҳатдан ифодалаши ва баҳолаши, адабиёт ва санъатнинг бадиий ижодга хос бир-бiri билан узвий боғланган бир қанча барқарор хусусиятлар, асосий принциплар ҳамда тасвирлаши воситалари, воқеликни амалий ва назарий томондан чукур эгаллаши учун йўл-йўриклар, усуллар мажмусаси тушиунилади.

Демак, ижодий метод борлиқ ҳодисаларини танлаш, умумлаштириш ва баҳолаш принциплариидир. Ёзувчи асар ёзиш давомида ижодий методнинг қуйидаги тамойилларига амал қиласди: а) метод воқеликни акс эттириш усулидир; б) ҳаётни типиклаштириб тасвирлайди; в) асар гоясини ташувчи образларни ўзаро қиёслайди ва ривожланишда кўрсатади; г) ёзувчи ҳаётий воқеларни танлайди ва баҳолайди; д) санъаткор воқеликка

ижодий ёндашади, яъни қайта қуради. Янада аникроғи, акад. И.Султон айтганидек, ижодий метод масаласи, даставвал, санъаткорнинг ҳаётга, воқеликка муносабати масаласидир. Шунга кўра, у ёки бу давр адабиёти методини ўрганишда шу даврда яшаган ва ижод қилган сўз санъаткорларининг ўз замони ҳодисаларига қандай муносабатда бўлганилигига эътибор бериш керак. Шу нуқтаи назардан, метод адабиётнинг маълум бир тараққиёт босқичида ҳаёт тақозосига кўра устивор йўналишга эга бўлиши мумкин. Масалан, ўтган асрнинг 30-йилларидан бошлаб умумсовет адабиётида ягона метод қарор топди ва у “социалистик реализм” деб аталди. Бунгача адабиётда классицизм, романтизм, реализм каби методлар мавжуд эди.

Классицизм (лот. намунавий) XVII аср бошида Францияда дунёга келган бўлиб, антик адабиёти ва санъатининг энг яхши томонларини ўзлаштириб, ҳаётдаги энг ибратли воқеа-ҳодисаларни тасвирлашга мойил методдир. Классицизм методида яратилган драмаларда ҳаёт ҳам, қаҳрамонлар ҳам ўта назокатли, маданий ва бой қилиб қўрсатилган. Классицизм Европа мамлакатлари ва Россияга XVIII асрнинг 30-йилларida кириб келди. Рус классицизми Фарбий Европа классицизми методидан рус давлати қудратининг тобора ортиб, мустаҳкамланиб бориши билан боғлиқ бўлган миллий-ватанпарварлик ғоясини кўпроқ тасвирлашга эътибор бериши жиҳатидан фарқ қиласди. Европа ва рус адабиётида XIX аср ўрталарида классицизм ўрнига кириб келган романтизм методи ҳаётнинг ўзидан кўра кўпроқ турмуш ҳақидаги орзу-умидларни тасвирлаш принципига асосланади. Кўплаб манбаларда метод деб берилган романтизм атамаси Д.Қуронов, З.Мамажонов, М.Шералиеваларнинг “Адабиётшунослик луғати”да “адабий йўналиш” деб берилади.

Қандай аталишидан қатъий назар, классицизм ва романтизмга хос хусусиятлар буюк Шарқ, хусусан, ўзбек мумтоз адабиётида X-XII асрларда ёқ намоён бўлган. Бунинг учун Юсуф Хос Ҳожибининг “Кутадғу билиг”, Адаб Аҳмад Юғнакийнинг “Хийбат ул-ҳақойик”, Фирдавсийнинг “Шоҳнома”, А.Навоийнинг “Хамса” сингари асарларида илгари сурилган ғоя ва тасвирланган қаҳрамонларни эсланг ва таққосланг (изоҳлаб бераман).

Лотинча “мавжуд, бор нарса, ҳақиқий” деган маъноларни англатган реализм методининг адабиётга қачон, қаерда кириб келганини, унга ким биринчи бўлиб асос соганини аниқ (конкрет) ҳал этишга эҳтиёт бўлган маъқул. Чунки адабиёт дунёга келган кунидан бошлаб, ҳаётда юз берган воқеа-ҳодисаларни ҳаққоний (реал) тасвирлашни одат қилган. Албатта, ёзувчи фотограф вазифасини бажармайди, яъни у ҳаётдан нусха кўчирмайди. Агар ҳаётда қандай бўлса, шундай акс эттирса, у натурализм бўлади. Ёзувчи ўзи тасвирламоқчи бўлган воқеа-ҳодисаларга, одамлар қиёфаси ва табиатига керак ўринларда бўёқ беради, тўқима эпизодлар киритади, манзаралар чизади. Буларнинг барчасини ғоявий ниятига мослаб тасвирлайди ва шубҳасиз, ҳаёт ҳақиқатидан чекланмаган ҳолда бажаради. Воқеликни ҳаётга монанд тарзда акс эттириш қадимдан мавжуд экан, демак реализм методининг илдизлари ҳам қадим замонларга бориб тақалади. Буни турли даврлар адабиётида ҳаётга ҳаққоний муносабат билдиришнинг даражасига қараб берилган баҳо (сифатлаш)лар ҳам исботлайди. Шунга кўра адабиётшуносликда антик (ёки мифологик) реализм, уйгониш даври реализми, маърифатпарварлик реализми каби атамалар ҳам ишлатилган. Реализм бадий адабиётнинг доимий ва мангу йўлдошидир.

Ўтган асрнинг 30-йилларига келиб, адабиётни ўз сиёсатига бўйсундиришга уринган совет ҳукумати социалистик реализм методини ўйлаб топди ва уни адабиётнинг ягона ижодий методи деб эълон қилди. Бу метод талабига кўра асар қаҳрамони албатта, қашшоқ синф вакили бўлиши, онги инқилобий воқеалар ёрдамида ўсиб бориши, агар бошқа миллат вакили бўлса, рус инқилобчисининг ёрдамида шаклланиши, раҳбар даражасига кўтарилиши, ўз душманларини қийинчиликсиз енгиши, фаровон ва баҳтли турмушга эришиши керак эди. Шу қолипга солинган кўплаб асарлар ҳозир рўйхатдан ўчиб кетди (айrim мисоллар айтиб бераман).

Хайриятки, соцреализм методининг умри нисбатан қисқа бўлди. XX асрнинг 70-80-йиллариданоқ у ҳаёт ҳақиқатини рўй-рост, тўлақонли ва ҳаққоний ифодалаш талабларига

жавоб беролмай қолди. Э.Воҳидов, А.Орипов, О.Матжон, Р.Парфи, Ҳ.Худойбердиева шеър ва достонларида социалистик реализм талабларига мос келмайдиган талай янгиликлар рўёбга чиқди. 90-йилларга келиб бу метод тамомила барҳам топди.

Истиқлол адабиётида метод эркинлиги мавжуд. Ижодкор ўз кўнглидаги гапни истаган метод, оқим ёки йўналишда айтиш эркинлигига эга. Шу боис ҳозирги шеъриятда том маънодаги реализм билан бирга романтизм ҳам, модернизм ҳам, абсурд ҳам, экзисентал ижод намуналари ҳам, сентиментал шеърлар ҳам кўплаб яратилмоқдаки, бу ўзбек адабиётини фақат бойитмоқда. Аммо бу бойликнинг саргини саракка, пучагини пучакка ажратиш фойдалидир.

Француз табиатшуноси Бюффон Жорж – Луи Леклеркнинг таъбири билан айтганда, “услуб бу одамдир”. Демак, у ижодга оид ҳамма нарсани ўзига қамраб олади. Услубни белгиловчи хусусиятлар адабий асарнинг шаклидан тортиб мазмунигача бўлган барча нарсани ўзида мужассамлаштиради. Услуб бу ижодкорнинг ўзлигини намоён этадиган адабий ҳодиса бўлиб, у:

- 1) муаллиф дунёқарашини;
- 2) танлаган ижодий методини;
- 3) ғоявий ниятини;
- 4) ижодий фантазияни;
- 5) истеъдод салоҳиятини;
- 6) типиклаштириш маҳоратини;
- 7) ҳаётий материални қалб призмасидан ўтказа олиш қобилиятини;
- 8) эстетик идеал ва уни асарнинг бадиий тўқимасига сингдира олишини;
- 9) адабий жанрни аниқлаш ва унинг имкониятларидан фойдалана олиш;
- 10) баёнга хос нутқ типини танлай билиш ва сўздан фойдаланиш санъатини эгаллай олиш;
- 11) ифода усулини танлай билиш;
- 12) мазмунга мутаносиб шакл топа билиш каби кўплаб фазилатларни ўз ичига олади.

Ҳар бир ижодкорнинг ўз шахсий (индивидуал) услуби ва маълум бир даврда шаклланган умумий адабий услуб бўлиши мумкин. Масалан, Навоий услуби, А.Қаҳхор услуби, Э.Воҳидов ёки У.Азим услуби, Уйғониш даври адабиёти услуби, жадид адабиёти услуби каби. Адабий услубнинг шаклланишида маълум давр ижодкорларининг умумий мақсадида муштарак хусусиятлар мухим ўрин тутади. Масалан, жадид адабиётига хос умумий услубий йўналишни олиб кўрайлик. Маълумки, жадид боболаримизнинг бош мақсади ҳалқни маърифатли қилиш, шу йўл билан Туркистон мустақиллигига эришиш эди. Мана шу мақсад уларнинг ижодий услуби муштараклигини белгилашда мухим рол ўйнади. Улар қандай жанрда асар яратишмасин (асосан драма ва ҳикоя), уларда жаҳолат ва маърифат ўртасидаги курашни оталар ва болалар можароси асосига курадилар. “Демак, услугуб фақат ижод жараёни, конкрет ижодкор билангина эмас, маълум даражада адабий жараён билан ҳам боғлиқ категория экан” (Қаранг: Д.Қуронов, З.Мамажонов, М.Шералиева. Адабиётшунослик луғати. - 2010). Ҳозирги адабий жараёнда услубнинг ҳар икки кўриниши ҳам (умумий ва хуссий) мавжуд. Мустақиллик ва уни мустаҳкамлаш ғояси Ўзбекистонда ижод қилаётган барча қаламкашларни бирлаштириди. Айни чоғда Ватан, ватанпарварлик, юрт озодлигини куйлаётган шоирлар улкан бир симфоник оркестрга бирлашган созандаларга ўхшайди. Биласиз, оркестрда иштирок этаётган созандаларнинг ҳар бири алоҳида чолғу асбоби билан қатнашадилар. Ҳар бир сознинг овози ўзига хос эшитилади (бу ижодкор услубининг индивидуаллиги) ва бир пайтнинг ўзида симфоник оҳангни бойитади (бу умумий услугуб). Албатта бу оркестрнинг умумий оҳангига тушмаётган чолғу асбоблари ҳам бор. Бундай ижодкорлар ўз услубини шакллантириш ва оригиналликка эришиш йўлида жиддий ишлашларига тўғри келади.

Ҳозирги ўзбек шеърияти услубларнинг ранг-баранглиги билан мухим аҳамият касб этмоқда. Бу борада Э.Воҳидов, А.Орипов, С.Сайид, И.Отамурод, И.Мирзо кабиларнинг

услуби ўзига хослиги билан ажралиб туришини алоҳида таъкидлаш ўринлидир. Масалан, Ўзбекистон халқ шоири Э.Воҳидов Ватан мустақиллигини ҳам аруз, ҳам бармоқ вазнида, ҳам ҳазил, ҳам ҳажвий шеърларида ўта босиқлик ва содда услугуда куйлади. Эркни улуғлар экан, Э.Воҳидов мумтоз адабиётимиздаги кўхна булбул тимсолига мурожаат қиласди ва унинг янги қиррасини очади:

Бир-бирига навбат бермай қўшиқ айтди булбуллар,  
Шукур бўлсин, боғимизга яна қайтди булбуллар.

Ниҳоятда босиқлик билан айтилган бу содда мисралар ўқувчини ҳам маҳзун ўйга толдиради, ҳам ифтихор туйғусини үйғотади, ҳам унинг янги маъноларини ўйлашта ундейди (Сиз шу айтилганлардан улгу олиб, амалий ва семинар машғулотларида шоирлар услугбини аниқланг).

Энди хозирги ўзбек шеъриятида Ватан мавзусининг ёритилишидаги услугбнинг умумийлиги ва индивидуаллигига битта мисол келтирай. Ўзбекистон халқ шоири С.Сайиднинг “Бевафолик” номли шеърида шундай сатрлар бор:

У не янглиғ халқ бўлгайдир, миллат бўлгай,  
Элнингким ўз пешвосига вафоси йўқ.  
Биз Ватанни она деймиз, лекин нечун  
Фарзандининг онасиға вафоси йўқ.

Ниҳоятда куюнчаклик ва дард билан айтилган фикрлар Сизга Чўлпоннинг “Халқ” шеъридаги унинг қудратига бўлган буюк ишончни, А.Ориповнинг “Қачон халқ бўласан, сен эй оломон!?” сатрини, Э.Воҳидовнинг “Ўзбегим” қасидасини, М.Юсуфнинг “Халқ бўл, элим” шеъридаги куюнчакликни эслатмадими?

Хуллас, метод ва услуг ҳақида кўп гапириш мумкин. Улар бир-бирини тақозо этади, тўлдиради, бойитади ва давом эттиради. Санъаткор қайси методда ижод қиласин, кўнглидаги ғоявий ниятини ўзига хос услугда ифодалашга масъулдир. Шундагина унинг асари мангуликка дахлдор бўлади.

### **Назорат саволлари:**

1. Метод нима? Унинг таърифини айтинг.
2. Метод тамойилларини сананг.
3. Классицизм методининг моҳияти нимада?
4. Романтизм қандай метод?
5. Реализм методига таъриф беринг.
6. Нима учун социалистик реализм методининг умри қисқа бўлди?
7. Услуб деганда нимани тушунасиз?
8. Услуб фазилатларини сананг.
9. Адабий услуг билан шахсий услугбнинг умумийлиги ва фарқи нимада?
10. Ўзингиз севган шоирлардан бирининг индивидуал услубини аниқланг.

### **6-МАВЗУ: ЛИРО-ЭПИК ТУР РИВОЖИ АДАБИЁТЛАР:**

1. Адабий турлар ва жанрлар. З жилдлик. 1-жилд. Т., “Фан”, 1992.
2. Адабиёт назарияси. 2 томлик. Т., “Фан”, 1978-1979.
3. И.Султон. Адабиёт назарияси. Дарслик. Т., “Ўқитувчи”, 2004.
4. Т.Бобоев. Адабиётшунослик асослари. Дарслик. Т., “Ўзбекистон”, 2000.
5. Д.Куронов, З.Мамажонов, М.Шералиева. Адабиётшунослик лугати. Т., “Академнашр”, 2010.

### **РЕЖА:**

1. Лиро-эпик тур ҳақида маълумот.
2. Лиро-эпик тур жанрлари ва улар структурасидаги ўзгаришлар.
3. Замонавий ва тарихий мавзудаги достонлар.

#### 4. Шеърий романлар ҳақида.

Лиро-эпик тур атамаси Аристотель “Поэтикаси” сида ҳам, В.Г. Белинский асарларида ҳам алоҳида адабий тур сифатида тилга олинмаган. Табиийки, улардан сўнг яратилган барча манбаларда ҳам бу тур ҳисобга олинмайди. Уч адабий турнинг эпос деб номланган турида ҳикоя, қисса ва романлар қаторида достон (поэма) жанри ҳам тилга олинади. Масалан, Сизга тавсия этилган илмий адабиётларнинг барчасида шундай таснифга дуч келасиз. У ҳолда нега биз тўртинчи адабий тур сифатида лиро-эпик асарларни кириятимиз?

Маълумки, ҳар бир адабий тур ўз шакли-шамойилига эга: лирика-шеърий, эпоснаср, драма эса – ҳаракат ва диалог асосида дунёга келади. Ҳам шеърий, ҳам насрый ёзилган, баъзан диалоглар ҳам аралашиб қоладиган асарлар қайси турга киради? Бу масала кўп асрлар давомида адабиётшуносларни ўйлантириб келаётган бўлса-да, хеч ким уни кўтариб ҳал қилишга журъат этмади. Ҳатто профессор Б.Саримсоқов “Тўртинчи адабий тур” сифатида лиро-эпик асарларни эмас, паремия турини таклиф қилади (қаранг: Б.Саримсоқов. Бадиийлик асослари ва мезонлари. Т., 2004). Гарчи адабий турлар қаторида лиро-эпик тур номи ишлатилмаса ҳам айрим дарслклар, қўлланмалар, монография ва тадқиқотларда бу атама ишлатиб келинади. Биз бадиий адабиёт тараққиётини, ундаги сифат ўзгаришларни, жанрлар моҳияти ва структурасини инобатга олиб, лиро-эпик турни алоҳида рўйхатга олишни, уни жанрлар асосида тасниф этишни ва ўзига хос хусусиятларини ўрганишни лозим топдик. Адабиёт тарихидан яхши хабардор мутахассислар учун лиро-эпик тур бор ва у яшайди.

Демак лиро-эпик тур ўз курилиши ва тасвирлаш обьектига кўра бошқа гурухга хос асарлардан фарқ қилади. Бу турга оид асарлар воқеликка асосланган бўлиб, лирик чекинишлар билан баён қилинади. Лиро-эпик турга қуйидаги жанрларни киритиш мумкин:

1. Масал.
2. Баллада.
3. Достон (поэма).
4. Шеърий роман.

Адабиётшунос Д.Куронов “Адабиётшуносликка кириш” дарслигига кичик эпик шакллар сифатида латифа, масал, ҳикоят, ривоят, эртак, афсона, бадиа, этюд, очерк, эссе кабиларни ҳам рўйхатга олади. Албатта, уларни шартли тарзда қабул қилиш мумкин. Аслида латифа, афсона, эртаклар фольклорга, ҳикоят, ривоят, бадиа, очерклар эпик турга мансубдир. Эссе эса адабий танқидчилик жанри сифатида тан олинган. Буларни олимнинг ўзи ҳам тан олади ва шартли равишида “уларни турдан ташқари формалар деб тушуниш тўғрирок бўлади” дейди. Шундай қилиб, лиро-эпик тур жанрлари сифатида юкоридаги 4 хил асарларни ўрганиш мақсадга мувофиқдир.

Масал ўзбек адабиётидаги энг қадимий ва кенг тарқалган жанрлардан биридир. Унинг илк намуналари А.Навоийнинг “Ҳайрат ул-аброр” достонидан ўрин олган “Шеру Дуррож”, “Кабутар”, “Ёлғончи”, Гулханийнинг “Зарбулмасал”идаги “Тошбақа билан Чаён”, “Маймун билан Нажжор”, “Туя билан Бўталок” кабилардир. Бу жанрларга хос асарлар ундан ҳам олдинроқ Юнон адипи Эзоп томонидан ҳамда “Калила ва Димна”, “Қобуснома” каби ёдгорликларда яратилган.

Хўш, масал нима? У қандай хусусиятларга эга? А.Зуннунов ва Н.Хотамовнинг ўрта умумтаълим мактаблари учун чиқарилган “Адабиёт назарияси” номли қўлланмасида масал ҳақида қуйидагича ёзилган: “Масал лиро-эпик асарларга (!) мансуб жанрлардан бири бўлиб, асосан шеърий шаклдаги, мажозий характерга эга қисқа сюжетли асардир. Масалларнинг тарбиявий аҳамияти ғоят катта бўлиб, инсон характерига хос хусусиятлар ҳайвонлар, ўсимликларга кўчирилади”. О.Носиров, С.Жамолов, М.Зиёвиддиновларнинг “Ўзбек классик шеърияти жанрлари” (1979) номли китобида “Масал арабча сўз бўлиб, ўрнақ, мақол, ҳикоят маъноларини билдиради. Масалда турмуш ва ундаги воқеалар,

инсонлар ҳаёти киноявий образлар орқали тасвир этилади. Унда аксар ҳолларда ҳайвонлар, қушлар, баъзан эса нарса-предметлар образи яратилади” деб таъриф берилган.

“ЎзМЭ”да масал ҳақида шундай ёзилган: “Масал (араб. намуна, мисол) – дидактик адабиёт (?) жанри. Таълимий характердаги, аксарият кичик шеърий, баъзан насрий шаклдаги асар. Масалда инсонга хос хусусиятлар, жамиятга хос ижтимоий ҳодисалар, муносабатлар қушлар, ҳайвонлар орасидаги муносабатлар ва табиат ҳодисалари воситасида акс эттирилади. Мазмуни мажоз асосига қурилади, комикликнинг ва киноянинг, ижтимоий танқид мотивининг устунлиги масалга ҳажвий рух бағишлади” (5-ж., 498-б.). “Ўзбек тилининг изоҳли луғати”да эга қуидагича қисқа изоҳ берилади: “Масал (а. намуна, андоза, ўхшашлик; рамзий ҳикоя). 1. Кишиларга ўгит бўладиган, хulosали, кичик мажозий ҳикоя” (2-ж., 549-б.).

Бу таърифу изоҳларга қўшимча ва аниқлик киритиб, уларни тартибга соламиз-да, масалга қуидагича таъриф берамиз: “Масал лиро-эпик турнинг фаол ва қўҳна жанрларидан бири бўлиб, бундай асарларда икки ёки ундан зиёд персонаж шитирок этади (уларнинг бири-муаллиф). Асар баёни кинояга асосланади. Сиртдан қарагандা баён этилаётган ҳодиса уч қисмдан ташкил топгандек (кириш, асосий воқеа ва ҳулоса) туюлса ҳам сюжети бир тугун асосида ривожланади ва ечим топади. Масалдаги персонажлар мажозий характерга эга бўлади”.

Масал XX аср ўзбек адабиётида шоир, драматург, маърифатпарвар олим А.Авлоний томонидан янгиланди ва ривожлантирилди. Адаб дастлаб рус масалнависи И.А.Крилов асарларини таржима қилди ва ўзининг “Мактаб гулистони” номли асарида эълон қилди. Ўзи ҳам кўплаб ибратли масаллар яратди (бу ҳақда қаранг: Й.Солижонов. Зулматдан нур қидирганлар. Ўкув қўлланма. Т., 2007. 24-30-б.).

Лиро-эпик тур жанрларидан яна бири Ғарбий Европадан кириб келган баллададир. Бу атама французча-лотинча сўз бирикмасидан тузилган бўлиб, **бал ва ода**, яъни **базмда айтилган қўшиқ, рақс тушибоқ** деган маъноларни англатади. Баллада драматик, трагик, қаҳрамонона воқеа-ходисаларни романтик метод асосида, кўтаринки услубда акс эттирувчи поэтик жанрdir. Унинг илк намуналари Францияда яратилган. XIV-XV асрларда француз классик шеъриятида 28 мисрадан ташкил топган лирик шеърлар баллада деб аталган. Балладанинг структурал қурилиши қатъий қоидаларга бўйсунади. Баллада тўрт бандга бўлинади. Унинг уч банди 8 мисрадан (24 мисра), охирги банди 4 мисрадан иборат бўлиши шарт. Ана шу 4 мисралик охирги банд “бағишлов” деб аталади. Биринчи банднинг сўнгти мисраси қолган ҳамма бандларда такрорланиши шарт. Балладанинг дастлабки уч банди а-б-а-б= б-с-б-с; “бағишлов” банди эса б-с-б-с тарзида қофияланган. Италия ва Англиядаги баллада бироз структурал ўзгаришларга учради.

Баллада ўзбек адабиётига XX асрнинг 20-30-йилларида кириб келди ва жиддий структурал ислоҳотлар (ўзгаришлар)ни бошидан кечирди. Аввало, ўзбек адабиётида баллада ҳажман кенгайди. Бундан ташкари XX асрнинг 30-40-йилларида баллада кўпроқ қаҳрамонона воқеаларни тасвирлашга бағишланган (Ҳ.Олимжоннинг “Жангчи Турсун”, “Роксананинг кўз ёшлари”, М.Шайхзоданинг “Капитан Гастелло”, “Муҳаммад тўпчи” каби) бўлса, 80-90-йиллар ва мустақиллик даври адабиётида мазмунан ҳам ўзгариб кетди. Масалан, У.Азим, Х.Даврон, М.Юсуф, Э.Шукур, Т.Жўра каби шоирлар “баллада” деб тақдим этган асарлар юкоридаги талабларнинг биронтасига жавоб бермайди. Жанр сифатида фақат номи қолди холос.

Лиро-эпик турнинг энг йирик жанри достон (поэма)дир. Бундай асарларда баён қилинаётган воқеа лирик қаҳрамон муносабати орқали ифодаланади. Чунки достон мазмуни асосида лирик йўналишда ёритилган сюжет ётади. Сюжет элементларини қай тарзда жойлаштириш, яъни асар шаклини лойиҳалаштириш муаллиф маҳоратига боғлиқдир. Истиқлол йилларида яратилаётган достонлар ўзининг шакли-шамойили билан ҳам, мазмуни ва ғоявий йўналиши билан ҳам ўзига хос хусусиятларга эга бўлмоқда. Бу давр достончилигига инсон қалбини чуқурроқ тадқиқ этиш, лирик кечинмалар қўламини кенгайтиришга эътибор кучайди. Уларда воқелик қамрови кенгайди, замонавий рух

кучайди, мазмун ва шакл бирлиги янада мустаҳкамланди. Лирик қаҳрамоннинг тафаккур оламидаги эврилишлар мукаммалроқ ифодалана бошлади. Сиз достон жанрининг тарихи, унинг ўзига хос жанр хусусиятлари, тараққиёт босқичлари тўғрисида юқори курсларда сабоқ оласиз. Биз эса хозирги адабий жараёндаги достонларнинг фазилатлари, улардаги айrim етишмовчиликлар хусусида тўхталаийлик.

Кейинги йилларда адабий ҳаётда юз берган ижобий ўзгаришлар, хусусан, тарихий мавзуга муносабатнинг янгиланиши достон жанрига ҳам хосдир. Халқимиз тарихидаги оқ доғларни йўқотиш, қора доғларни ювиш ниятида кўпчилик ижодкорлар ўтмишда муҳим ўрин тутган, аммо адабиёт саҳифаларига киролмаган тарихий сиймолар ҳақида достонлар яратишга киришдилар. Бу йилларда, айниқса, Амир Темур ва темурийзодалар фаолияти мавзуси достонларда кўп ишланди. Мавзунинг қаҳрамонона моҳиятини инобатта олган ҳолда драматик достон шаклида яратилиши бу жанрнинг имкониятларини янада кенгайтирди. А.Ориповнинг “Соҳибқирон” драматик достони, М.Жалилнинг “Соҳибқирон”, А.Суюннинг “Сарбадорлар”, У.Азимнинг “Халил Султон” достонлари, Олимжон Бўриевнинг “Амир Темур” деб аталган шеърий романи Соҳибқирон бобомизнинг ўзбек ўқувчисига маълум бўлмаган қирралари тўғрисида маълумот беради. Шунингдек, Ш.Курбоннинг “Темур Малик”, “Сўз йўли” (Навоий ҳақида), М.Юсуфнинг “Кўхна қудук”, “Қора қуёш”, Э.Самандарнинг “аждодлар қиличи” (Ж.Мангуберди ҳақида) сингари достонлари ҳам улуғ аждодларимизнинг ҳаёти ва фаолиятига бағишлиланган.

Замонавий мавзуда ҳам кўплаб достонлар дунёга келди. Бундай мавзудаги достонлар руҳига истиқлол ғояси сингдирилганлиги, чуқур миллийлик билан сугорилгани аҳамиятлидир. А Суюннинг “Иморат”, “Ўзбекистон”, И.Отамуроднинг “Узоклашаётган оғриқ”, “Тағazzул”, “Ёбондаги ёлғиз дарахт”, Ш.Курбоннинг “Укажонлар, сингилжонларим”, “Бир қалб манзараси”, Т.Сулаймоннинг “Эргаш Жуманбулбул эл кезади”, Т.Низомнинг “Чўлпон”, “Оқ гул”, “Хумо”, О.Мухторнинг “Буюк бир муҳаббат”, Т.Аҳмаднинг “Фигон” номли достонлари шулар жумласидандир. Агар А.Суюн билан Т.Сулаймоннинг достонлари баҳшиёна усулда ёзилгани билан ажralиб турса, О.Мухтор асари теран публицистик руҳнинг кучлилиги билан эътиборни тортади. Тўғри, бу достонлар орасида ҳали юксак бадиийлик даражасига кўтарилимагани, шакл ночорлиги туфайли мазмуннинг мукаммал ифода этилмаганлиги, қаҳрамонларнинг руҳий кечинмалари тўлароқ очилмаганлари ҳам учрайди. Шунингдек, тарихий мавзуда ёзилган достонларда недурки, мустақиллик бизга тарихимизни ёритиш имконини берди деган фикр билан ҳақиқатдан чекиниш, тарихий шахслар образини идеаллаштиришга уриниш ҳоллари учрайди. Булар, шубҳасиз, достончилик тараққиётининг такомилига маълум даражада путур етказади.

Лиро-эпик турнинг ҳажман энг катта, шаклан ранг-баранг, мазмунан бой жанри шеърий романдир. Шеърий роман достонга нисбатан камхосил, аммо структарси жихатдан илдизи чуқур. Гарчи шеърий роман атамаси бизга Фарбий Европа ва рус адабиёти орқали (А.С.Пушкиннинг “Евгений Онегин” асари) кириб келган бўлса-да, бу жанр талабларига жавоб берадиган асарлар ўзбек адабиётида X-XI асрлардаёқ дунёга келган. Фирдавсийнинг “Шоҳнома”, Юсуф Хос Ҳожибининг “Кутадғу билиг”, Адид Аҳмад Юғнакийнинг “Ҳийбат ул-ҳақойик” сингари фанда достон сифатида қабул қилинган асарлар катта ижтимоий-маърифий воқеликка асосланганлиги, персонажларга бойлиги, сюжет курилишининг мураккаблиги билан шеърий роман дейишга арзиди. А.Навоий “Хамса”си ҳам тўла маънода шеърий роман бўла олади.

Ўзбек адабиётида шеърий роман номи билан эълон қилинган биринчи асар Мирмуҳсиннинг “Зиёд ва Адиба”сидир (1959). 70-йилларга келиб Ҳ.Шариповнинг “Бир савол”, М.Алининг “Боқий дунё”, С.Акбарийнинг “Кўкан бобо” каби шеърий романлари дунёга келди. Янги аср бошида яратилган Олимжон Бўриевнинг “Амир Темур” асари ҳам шу ном билан аталган. Шеърий роман яратишда шоир Б.Бойқобилов ҳаммадан ўзиб кетди. У мустақилликнинг дастлабки 10-йиллигида дастлаб “Навоийнома”, кейинроқ “Янги Хамса” деган ном остида 5 та (“Нотинч Хуросон”, “Шукухли карвон”, “Сокин Хуросон”,

“Қонли Хуресон”, “Ҳайрат ул-Ахрор”), “Дебоча” ва “Хотима”дан ташқари 7 фаслдан ташкил топган “Ўзбекнома” (844 бет) “шеърий роман”ларини тақдим этди. Аммо улар адабий жамоатчилик томонидан чин маънодаги шеърий роман сифатида тан олинмади.

Шунга қарамай, лиро-эпик йўналиш адабий тур сифатида яшамоқда ва юқоридаги тилга олинган жанрлар озми-кўпми дунёга келиб, адабиётимиз хазинасини бойитмоқда.

#### **Назорат саволлари:**

1. Лири-эпик тур мавжудми? Турнинг ўзига хослигини айтинг.
2. Турнинг жанрларини сананг ва масал ҳақида маълумот беринг.
3. Баллада нима? Ўзбек адабиётида қандай ўрин тутади?
4. Достон жанри ҳақида гапиринг.
5. Тарихий мавзудаги достонларни айтинг.
6. Замонавий мавзудаги достонлар ҳақида фикр билдиринг.
7. Шеърий роман қандай бўлади?

### **7-МАВЗУ: ҲОЗИРГИ ЭПИК ТУР ВА УНИНГ ЎЗИГА ХОС ХУСУСИЯТЛАРИ РЕЖА:**

1. Эпик тур ҳақида маълумот. Унинг ўзига хос хусусиятлари.
2. XX аср охири ва XXI аср бошларида ўзбек адабиётида эпик тур такомили.
3. Ҳозирги ўзбек насрига Фарб адабиётига хос хусусиятларнинг кириб келиши ва уларнинг аҳамияти.

#### **АДАБИЁТЛАР:**

1. Ўзбекистон Миллий энциклопедияси. 6, 9, 10, 11-т. Т., 2002-2006.
2. А.Тимофеев, Н.Венгров. Краткий словарь лит-ведческих терминов. М., “Учитель”, 1963.
3. Н.Хотамов, Б.Саримсоқов. Адабиётшунослик терминларнинг русча-ўзбекча изоҳли луғати. Т., “Ўқитувчи”, 1979.
4. Адабиёт назарияси. 2 томлик. Т., “Фан”, 1978-1979.
5. И.Султонов. Адабиёт назарияси. Дарслик. Т., “Ўқитувчи”, 1981, 1986, 2005.
6. Т.Бобоев. Адабиётшунослик асослари. Т., “Ўзбекистон”, 2002.
7. Д.Куронов. Адабиётшуносликка кириш. Т., “Фан”, 2007.
8. Аристотель. Поэтика. Ахлоқи кабир. Т., “Янги аср авлоди”, 2004.
9. Й.Солижонов. Ҳақиқатнинг синчков кўзлари. Т., А.Навоий номли ЎМК, 2009.
10. Д.Куронов, З.Мамажонов, М.Шералиева. Адабиётшунослик луғати. Т., 2010.

Адабиёт ҳаёт кўзгуси, ҳаёт дарслиги дейилади. Чунки у кишилик жамияти ҳаётида рўй берган каттами-кичикми, ҳар қандай ўзгариш ва эврилишларнинг акс-садоси тарзида намоён бўлади, уларни бадиий асарларида акс эттиради. Ҳатто адабиёт ўз ғоялари, мавзуси, яратган қаҳрамонлари, бадиий тасвир йўналиши билан ўша ўзгариш ва эврилишларни (ҳатто инқилобий тарзда) тайёрлашда бевосита қатнашади ҳам. Бунинг учун биз XX аср бошларида жадид адабиёти намоёндалари илгари сурган маърифатпарварлик, истиқлол ғоялари билан 20-30-йиллардаги шўро адабиёти вакилларнинг асарларида ифодаланган социологик курашлар, ҳайбаракаллачилик, совет хукуматига садоқат ғояларини таққослаб кўрайлик. Ёки II жаҳон урушига нафрат, Ватан туйғуси... Дастробаки босқичда омма жадид адабиёти таъсирида ўз қадрини англаш, ҳуқуқини таниш ва ҳимоя қилишга киришиб, жасорат билан миллий озодлик кўзғолонига отланган бўлса (1916 йил), кейинги йилларда янги социалистик ҳаёт улуғланган деклоратив асарларини ўқиб, лаққа тушди. Бошида қилич ўйнатса ҳам, дорга осиб, қамоққа олиб, отиб ташласа ҳам лом-мим демади. Уруш даврида партиянинг кулига, хизматкорига айланган адабиётнинг “СССР сенинг Ватанинг, уни ҳимоя қил!” деган чақириғига “лаббай” деб жавоб берган халқимиз миллион-миллион фарзандларидан жудо бўлди ва бу билан фаҳрланди. Бу адабиёт, сўз санъатининг кучли таъсир воситаси эканлигини исботлайди.

Ўтган асрнинг 80-90-йилларидан бошлаб, адабиётда яна халқни уйғотиш истаги пайдо бўлди. Бу вазифани адо этишда эпик тур ҳам лирик тур билан ёнма-ён ва қадам-бақадам ҳамкорлик қилди. Хўш, эпик турнинг ўзига хос хусусиятлари нималардан иборат?

Бизга маълум илмий манбаларнинг барчасида “Эпос” номи билан тилга олинган эпик тур кенг маънода – “воқебанд бадиий асар, бадиий адабиётнинг ҳикоявий бир тури”; тор маънода – “халқ эпоси, оғзаки яратилган ва халқнинг қаҳрамонона ўтмишини, орзу-умидларини ифодаловчи катта эпик асарлар” деб таърифланади (Н.Хотамов, Б.Саримсоқов. Адабиётшунослик терминларнинг русча-ўзбекча изоҳли луғати. Т., “Ўқитувчи”. 1979. 356-357-б.). “Эпоснинг спецификаси” ҳақида “Адабиёт назарияси” китобининг II томида шундай дейилади: “Том маънодаги эпоснинг (ёки эпик асарнинг) мазмун ва шаклини даврнинг умумий дунёкараши ва халқ рухининг объектив ҳолати ташкил этади” (192). “Адабий турлар ва жанрлар” китобининг 1 жилдидаги “Эпос марказида воқеа туради; эпосда воқеа (инсон эмас) ҳукмронлик қиласи. Воқеа, тарих, муҳит, объектив шароит инсондан устунбўлиб, у жамиятнинг тақдирини белгилаб беради. Мазкур воқеалар силсиласига урушлар, қўзғолонлар, инқилоблар, ҳаёт ва тарихнинг турли-туман кичик ва улкан фактлари ҳамда ҳодисалари киради” деб ёзилган (8).

Чиндан ҳам эпик асар, аввало, воқеликнинг объектив акс этишидир. В.Г.Белинский ҳам эпик турнинг бу бош хусусиятини алоҳида таъкидлайди: эпосда “воқеа-қаҳрамон-воқеадир”. Эпик асарда ижодкор оддий ҳикоячи сифатида воқелик ортига яширинади. Аммо бу эпик асарда бадиий кечинма бўлмайди дегани эмас. Профессор Б.Саримсоқов айтганидек, “Агар лирикада шахс ва унинг ҳис-туйғуларидан воқеликка қараб борилса (яъни шеърда ҳис-туйғу устивор бўлса – Й.С.), эпосда воқеликдан шахсга қараб борилади” (Б.Саримсоқов. Бадиийлик асослари ва мезонлари. Т., 81-бет.)

Эпосда воқелик устивор бўлар экан, унда воқелар тизими турли кўринишларда тасвиранади. Буни сюжет дейилади (лирикада эса сюжет мавжуд эмас). Сиз сюжетнинг таърифини, унинг турлари, таркиби ва элементларини “Адабиётшуносликка кириш”, “Адабиёт назарияси” фанидан ўрганасиз, ўқиб оласиз. Ана шу воқеалар тизими, яъни сюжет ва уларнинг муайян тартибда ўзаро боғланиши композиция деб номланади. (лирикада композиция фикр тартибига асосланади). Воқеалар танланиб, уларни муайян тартибда ва изчилликда бериш учун қаҳрамонлар киритилади. Эпик асарда лирикадан фарқли ўлароқ, персонажлар кўпчиликни ташкил этиши мумкин. Улар иштирок этиши, муаллифнинг ғоявий ниятини ифодалашига кўра 3 тоифага бўлинади: 1. Бош қаҳрамонлар; 2. Асосий қаҳрамонлар; 3. Эпизодик қаҳрамонлар. Бош ва асосий образлар характер даражасига кўтарилиши талаб этилади. Асар қаҳрамонлари воқеалар тизимини ҳаракатга келтиради ва динамикасини таъминлади.

Эпик асар воқеалари ва уни ҳаракатга келтирувчи кучлар ўзаро тўқнашув – конфликт асосида ривожланади. Конфликт бадиий асарда мотор вазифасини бажаради. Персонажлар ҳаракати ва фаолияти маълум замон ва маконда рўй беради. Буларнинг барчаси бадиий ижод учун зарурий шартлар ҳисобланади. Ушбу шартлар таъминлангач, ижоднинг энг қийин ва оғир босқичи – бош мақсадни аниқлаш жараёни бошланади. Ёзувчи онгини, қалбини чулғаб олган, уни безовта қилган ғояни ифодаловчи барча нарсаларни бадиий адабиётнинг 1-элементи ҳисобланган сўз орқали тасвиrlаб ёки ифодалаб бериш қолади. Бу адибдан алоҳида маҳорат талаб қилинадиган жараёндир. “Мана шу жараёнларнинг барчасида ижодкорга эпик кечинма ҳамроҳлик қиласи” дейди профессор Б.Саримсоқов. Бу эпик кечинма ўз табиатига кўра бир маромда, узок давом этади (лирикада шиддатли, тез, драмада ҳаракатчан; босқичма-босқич). Асарнинг бошидан охиригача давом этадиган бу узлуксиз жараённи Б.Саримсоқов “секин-аста портлашга олиб борадиган минага” ўхшатади. Бу такқоснинг тўғрилигини З.Қуролбой қизининг “Тафаккур”, У.Ҳамдамнинг “Узоқдаги Дилнур” ҳикоялари мисолида исботлаш мумкин.

Эпос ҳам худди лирика сингари ўзбек адабиётида жуда қадимдан бошланган. Халқ оғзаки ижодидаги қаҳрамонлик достонлари, ёзма адабиётдаги “Шоҳнома”, “Хамса” каби асарлар гарчи шеърий усулда ёзилган бўлса-да, халқ ҳаётининг катта воқеаларини қамраб олиши билан характерлидир. XV-XVI асрдан бошлаб насрий баён вужудга келди. Эпик турнинг илк намуналарини Н.Рабғузий, А.Навоий, Пошшо Ҳожа, Бобур кабилар яратди. XX аср бошларига келиб эпик тур лирика билан бемалол мусобақа бошлади ва асрнинг 2-ярмига келиб баъзи соҳаларда ундан ўзиб ҳам кетди.

Академик И.Султон юқоридаги уч адабий турнинг фарқини янада аниқроқ тушуниб олиш учун бир хил мавзу ва материалда ёзилган уч хил асарни мисол қилиб келтиради. Буларнинг бири М.Шайхзоданинг “Ўртоқ Навоий” шеъри (бу аслида баллада деб аталади), иккинчиси Ойбекнинг “Навоий” романи, учинчиси Уйғун ва И.Султоннинг “Алишер Навоий” драмасидир. Шоир ўз шеърида А.Навоий ҳаётининг объектив ва кенг манзарасини олмайди, балки ўзининг улуғ шоирга, унинг атрофидаги кишиларга муносабатини акс эттиради. Унда Навоий яшаган давр ва шоир тақдирни ҳакидаги ўйлар, ҳис-ҳаяжон ва кўтаринкилик устун туради. “Навоий” романида эса XУ аср ҳаётининг кенг ва объектив тасвири берилади. Унда ёзувчи Ойбек Навоий ва унинг атрофидаги кишилар ҳаёти, характерлари ва турли тақдирларни батафсил ҳикоя қиласи, замон ва макон, табиат тасвирига кенг ўрин ажратилади. Ҳирот ва унинг теварагида рўй берадиган ҳодисаларни худди четдан кузатаётгандек тасвирлайди. Маълумки, драматик турда автор қатнашмайди, унинг нутки реплика ва ремаркалар зиммасига юклитилади. Шу туфайли бундай асарда ифодаланаётган воқеа ҳамда кишилар характеристи фақат уларнинг хатти-ҳаракатлари ва сўзлари орқали ифодаланади. Бундай асар саҳнада қўйиш учун мўлжалланган бўлади.

Бу уч асар ҳажми ва баъзи ташқи аломатлари билан ҳам бир-биридан фарқ қиласи. Роман ҳажман катта асар, драма ҳам ҳажман романдан катта эмас. Унда рўй берган воқеалар кўпи билан уч соатга мўлжаллаб ёзилади. Шеър эса ҳар иккаласидан ҳам кичик бўлиб, вазнга солингандир. Бундай асарда ҳис-туйғу ва кечинмалар устун ҳолда ифодаланади. Бу уч адабий турда “вакт ҳисси” (Гегель ибораси) ҳам бошқа-бошқадир. Лирик асарда “вакт ҳисси” инсонга хос ҳис-туйғу қачон ва қайси даврда рўй берган воқелик асосига қурилган бўлишидан қатъий назар ҳозиргина рўй бергандек ифодаланиши билан ажралиб туради. Масалан, Зулфиянинг “Баҳор келди сени сўроқлаб”, Ойбекнинг “Ныматак” шеърларини эсланг. Эпик турга хос бўлган асарда тасвирланган ҳаёт ҳар доим бўлиб ўтган воқеадек ҳикоя қилиншии билан характерланади. Ундаги баён ўтган замон феъли шаклида олиб борилади. Драмада эса тарихий воқеа ҳам, замонавий воқеа ҳам кўз олдимиизда худди ҳозир бўлиб ўтаётгандек намоён бўлади. Бу унинг тамошабин билан саҳна ўртасидаги масофага асосланганлигидир, айнан воқеани ҳозир кўриб турганлигимиздандир.

Эпик асарларда лирик ва драматик турга хос элементлардан ҳам унумли фойдаланилади. Эпик турга хос бадиий асарларнинг учта хусусиятини таъкидлаш ўринлидир. Булар: а) тасвирнинг объективлиги; б) воқеабандлик; в) кўламлилик (буларнинг ҳар бирига алоҳида таъриф берилади). Аслида адабий тур тушунчаси худди “мева” деган сингари мавҳум ва умумий тушунчадир. Меванинг олма, ўрик, нок, беҳи, ёнғоқ, гилос, олча сингари конкрет тушунчани англатувчи хиллари бўлгани каби эпик турнинг ҳам хилма-хил навлари учрайди. Рус тилидаги “род” сўзи ўзбек тилига “тур”, “хил”, “жинс” тарзида таржима қилинган. Шунингдек, В.Белинскийда “вид” сўзи ҳам учрайди. Бу сўз ўзбек тилига кўпроқ “жанр” деб ўгирилган. Биз эпик турнинг жанрларини уч катта гурухга бўлиб ўрганишни лозим топдик. Булар: 1. Кичик эпик асарлар; 2. Ўрта эпик асарлар; 3. Йирик эпик асарлар. Кейинги дарсларимизда уларнинг ҳар бирини жанрларга ажратган ҳолда кўриб чиқамиз.

Ўтган асрнинг 90-йилларидан кейинги 20 йиллик тараққиёт босқичи ўзбек адабиётидаги эпик тур такомилида муҳим аҳамият касб этади. Бу даврда, аввало, эпик тур жанрларнинг шакл ва мазмунида жиддий ўзгаришлар юз берди. Иккинчидан, янгича инсон концепцияси (қарашлар, фикрлар системаси, англаш, фикр юритиш усули; асосий

фикр)га муносабат шаклланди. Учинчидан, мавзу доираси кенгайди ва янгиланди. Тўртинчидан, жанрларнинг синтезланиши ҳодисаси рўй берди (хикояда қиссага хос, романда хикояга хос хусусиятлар). Бешинчидан, тарихга муносабат ўзгарди. Энди тарихий воқелик ёки тарихий шахсни давр ёки мафкура талабига кўра ифодалаш барҳам топди. Олтинчидан, ўзбек адабиётига эмин-эркинлик билан Ғарб адабиётига оид хусусиятлар онг оқими, абсурд, экзисенциализм, модерн йўналишлари кириб кела бошлади. О.Мухтор, М.М.Дўст, Х.Дўстмуҳаммад, Ғ.Хотамов, О.Отахонов, Т.Рустам, Н.Эшонқул, А.Йўлдошев, З.Қуролбой қизи, С.Вафо каби ўрта бўғин ва ёш ижодкорлар авлоди европача бадиий усусларни дадиллик билан олиб кирдилар ва эпик турнинг ҳам шаклан, ҳам мазмунан янгиланишига муносаб ҳисса қўшдилар. Биз бу адиблар асарларидаги Ғарб адабиётига хос фазилатлар, уларнинг қандай қабул қилиниши, моҳияти тўғрисида эпик турнинг алоҳида жанрлари бўйича ўтадиган маъruzаларимизда тўхталамиз.

Хўш, модернизм нима? У ўзбек адабиётига нима берди? “Модерн” сўзи “янги”, “модернизм” янгиланиш назарияси деган маънони англатади. Модерн тарафдорлари Аристотель давридан буён ҳукм сурган “тақлид” тушунчасига, яъни санъатнинг вазифаси акс эттирмоқ (инъикос қонуни), тақлид қилмоқ, янаям соддароқ килиб айтсак, ҳаётдан, табиатдан “нусха” кўчиromoқ деган тушунчага қарши чиқдилар. Уларнинг нияти тақлид қилиш эмас, балки ҳаётни, табиатни, унда умргузаронлик қилаётган инсонни тадқиқ этишдан иборат эди. Шу маънода модернизм оқими ўтмиш адабиётида яралган анъаналардан узилиб колган эмас, яъни у “йўқ”дан бор бўлмади. Адабиётнинг бош обьекти инсон экан, уни зоҳирлан эмас, ботинан ҳам тасвирлаш тарафдори бўлиб чиқдилар. Модерн адабиёти бўйича назариячи – адаб (Норвегия) Эспен Ховардсхолмнинг ёзишича, модернчи санъаткорнинг вазифаси “объектив воқеликни таърифлаш ёки тавсифлаш, акс эттириш(гина) эмас, балки ўзининг бадиий оламидан келиб чиқиб, ана шу воқелик билан муносабатга киришмоқ ва шу тарзда соф субъектив санъат асари яратмоқдир” (“Жаҳон адабиёти” жур, № 1, 2001).

Модерн ёзувчилари воқеликни қандай яратилган бўлса, шундайлигича қотиб қолган ва ўзгармас нарса деб қабул қилмайдилар. Балки оламдаги турфа хил рангларни “онг кислотасида эритиб, жўнлик қўйқаларидан” тозалайдилар ва соф ҳолда тасвирлайдилар. Бадиий онг шундайки, “унда бадиҳагўйлик (импровизация) ва хаёлот парвози тилдаги ифоданинг аниқлиги ҳамда қуюқлиги учун йўл очиб беради” (Э.Ховардсхолм). ўзбек насирида М.М.Дўст, О.Мухтор, Х.Дўстмуҳаммад, Н.Эшонқул кабиларнинг асарларида юқоридаги хусусиятларни учратиш мумкин. Бундай санъат асарларида китобхоннинг ўзига ижодий жараёнда билвосита иштирок этишга имконият яратилади, яъни санъаткор ўқувчига ҳамма нарсани айтиб, тушунтириб беравермайди, ақл ўргатмайди. Унинг фикр-ўйларига аралashiб, раҳнамолик қилавермайди. Шунингдек, ёзувчи қаҳрамоннинг хатти-ҳаракати ва ўйларига ҳам аралашмайди. Бу жиҳатдан Ж.Жойснинг “Улисс саргузаштлари”, М.М.Дўстнинг “Лолазор”, Х.Дўстмуҳаммаднинг “Бозор” романларини эсланг. Улардаги қаҳрамонлар Блум, Яхшибоев, Фозилбек бир пайтнинг ўзида нималарни ўйламайди, қаерларда юрмайди?! Санъаткор эса гўё ҳеч нарсани билмагандек тураверади, ўзини холис тутади. Шу хусусияти билан ёзувчи ўз китобхонини муаллиф билан ҳам ҳамкорлик қилишга, кечинмаларини баҳам кўришга чорлайди. Мабодо, китобхон асар муаллифи билан ҳамдарду ҳамкор бўлмаса, кечинмаларини бирга баҳам кўра олмаса, у ҳолда асарда гап нима ҳақида бораётганини тушунишга, ҳазм қилишга қийналади.

Хуллас, эпик тур мустақиллик йилларида янгича шакл ва янги мазмун касб этди. Унинг мазмунида синтезлашув ҳодисаси юз берди, тасвир кўлами кенгайди, бадиий нутқнинг янгича кўринишлари юзага келди. Бу фазилатларни алоҳида жанрлар мисолида кўриб чиқамиз.

### **Назорат саволлари:**

1. Эпос нима?
2. Эпик турнинг бош хусусияти нима билан белгиланади?
3. Эпик тур асарларига хос асосий элементларни айтинг.
4. XX аср охири, XXI аср бошларидағи эпик тур такомилининг ўзига хослиги нимада?
5. Модернизм нима? Ҳозирги адабий жараёнда пайдо бўлган модерн асарларни эсланг.
6. Эпик турнинг ўзига хос хусусиятлари нималарда кўринади?

## **8-МАВЗУ: КИЧИК ЭПИК ЖАНРЛАР**

### **АДАБИЁТЛАР:**

1. Л. Тимофеев, Н. Венгров. Краткий словарь литературоведческих терминов. М., “Учитель”, 1963.
2. Н. Хотамов, Б. Саримсоқов. Адабиётшунослик терминларининг русча-ўзбекча изоҳли лугати. Т., “Ўқитувчи”, 1979.
3. Адабиёт назарияси. 2 томлик. Т., “Фан”, 1978-1979.
4. И. Султонов. Адабиёт назарияси. Дарслик. Т., “Ўқитувчи”, 2005.
5. Т. Бобоев. Адабиётшунослик асослари. Дарслик. Т., “Ўзбекистон”, 2002.
6. Д. Куронов. Адабиётшуносликка кириш. Дарслик. Т., “Фан”, 2007.
7. Д. Куронов, З. Мамажонов, М. Шералиева. Адабиётшунослик лугати. Т., 2010.
8. Ўзбекистон Миллый энциклопедияси. 6, 9, 10, 11-жиллари. Т., 2002-2006.
9. Й. Солижонов. Ҳақиқатнинг синчков кўзлари. Т., 2009.

### **РЕЖА:**

1. Кичик эпик жанрлар ҳақида маълумот.
  - а) памфлет;
  - б) фельетон;
  - в) очерк;
  - г) новелла;
  - д) эссе.
2. Кичик эпик жанрлар тараққиёти ва уларнинг синтезлашуви.

Сўз санъати шундай сехрли ва қутилмаган жараёнки, санъаткор тафаккури ва қалбида туғилган фикр ўз шакли-шамойили билан дунёга келади. Бу жараённи аёлнинг тўлғоқ пайтидаги ҳолатига ўхшаши мумкин: у 9 ой мобайнида ардоқлаб вояга етказган фарзанди қизми ёки ўғил бола бўладими; ўзига ёки умр йўлдошига ўхшайдими, соғми ёки носоғми - олдиндан билолмайди. Аслида унинг орзуси анча эрта бошланганини, аёл оналика жуда ёшлигидан тайёргарлик қўрганини хам ёддан чиқармаслигимиз керак.

Адаб ижод жараёнида жанрни белгилай олмайди ва табиийки, ёзиш пайтида бу асарим мана шу жанр қоидаларига тўғри келсин деб ўйламайди. Агар санъаткор жанр қоидалари қолипига ўралашиб қолса, ўйлаган ғояси, танлаган воқеа ва персонажлари ўзи истагандек чиқмаслиги мумкин. Буни жуда кўп ижодкорлар тан олишган (А. Мухтор, О. Мухтор, Ф. Усмон). Гап ёзувчининг айтмоқчи бўлган ғоясида, уни ифода қила билиш маҳоратида.

Ёзувчи Н. Эшонқулнинг айтишича, “жанр – нисбий тушунча. Ёзувчи ўз фикрини қайси шаклда эплаб айта олса, ўша унинг жанридир”. (“Тафаккур” жур., № 2, 2009, 77-бет.) Океанин бутун жонзорлари билан аквариумга сиғдириш мумкинми? Бу санъаткорнинг қўлидан келади. Бугунги сұхбатимиз катта муаммоларни кичик идишга сиғдиришдек мураккаб ижод маҳсули бўлган кичик эпик тур жанрлари тўғрисида бўлади.

**1. Памфлет** – италянча сўз бўлиб, маъноси турли манбаларда турлича берилган. Масалан, “Краткий словарь литературоведческих терминов” китобида “пан” ёки “пам” – ҳаммаси (всё), “плечо” – куйдирман, аланголатаман, “ЎзМЭ” ҳамда “Адабиётшунослик терминларининг русча-ўзбекча изоҳли луғати”да “қўлдаги варак”, “Адабиётшунослик луғати”да французчадан олинган сўз бўлиб, “учар варака” деган маънони билдириши айтилган. Жанринг моҳиятини очувчи маъноси “куйдирман, алангада ёқаман” деган ибораларда ўз ифодасини топади. Чунки памфлет қисқа ҳажмдаги ҳажвий асар бўлиб, бирор бир сиёсий тузум, ижтимоий воқелик, у ёки бу тўда ёхуд гурухлар фаолиятини, уларнинг программ мақсади ва вазифаларини кучли сатира воситасида фош этувчи публицистик асардир. Памфлет кенг халқ оммасининг манфаатларини ҳимоя қиласиди. Памфлетда у ёки бу тузум, ижтимоий воқелик ёки бирорта партиянинг аниқ намояндлари устидан шафқатсиз кулинади ва ҳукм чиқарилади. Шу хусусиятига кўра памфлет бошқа жанрлардан бадиий тўқиманинг нисбатан озлиги, унинг аниқ ҳужжатлар ва тарихий фактларга асосланганлиги билан фарқ қиласиди. Памфлетда танқид қилинаётган жамият, воқеа-ҳодисалар ва унда муҳим ўрин тутган турли шахслар характеристи аччиқ киноя, кучли сарказм воситалари асосида фош этилади.

Памфлет жанрига хос илк намуналар дастлаб антик адабиётда яратилган. Кейинчалик Европа адабиётида ривожланди. Эразм Роттердамский, М.Лютер, Гуттен, Ж.Свифт, Вольтер, В.Гюго, Д.Дидро, Э.Золя, Мопассан, А.Несин памфлет устаси сифатида тилга олинадилар. Рус ёзувчиларидан М.Горький, Л.Леонов, И.Эренбург, М.Зощенко, ўзбек адиларидан А.Қодирий (“Совинак қори билан Мағзава қори” (1 бет), “Маҳкамай шаръияда ҳолва-талқон масаласи” (2 б.), “Мочалов” (1 б.), Ф.Ғулом (“Ҳожибобойи гулфуруш” (1 б.), “Порахўрлар” (1 б.), А.Қаҳҳор (“Барон фон Ринг”, “Бос тепкини!”) памфлетлар яратишган.

Памфетлар кўтарилган мавзусига кўра:

1. Сиёсий памфетлар
2. Бадиий памфетлар
3. Ахлоқий памфетлар
4. Тарихий памфетлар
5. Шахсий памфетлар (якка шахс иллатлари фош этилади)
6. Психологик памфетларга бўлинади.

**2. Фельетон** - барча манбаларда бир хил: французча сўз бўлиб, варак, варака маъносини билдиради. Фельетон бадиий публицистик жанрлардан бири бўлиб, у вактили матбуот билан узвий боғланган. Фельетон номи билан ёзилган асар дастлаб Францияда XVIII аср охири XIX аср бошларида пайдо бўлган. Аслида бу атама остида газетада берилган модалар намойиши, театр тамошаси ва бошқа кўргазмалар ҳақидаги кичик рекламалар тушунилган. Кейинчалик фельетон ўз ҳажми ва моҳиятини ўзгартириб борди. Театр асарлари, адабий ҳодисалар тўғрисида ёзилган жиддий танқидий мақолалар фельетон деб атала бошланди. Уларга газеталардан маҳсус жойлар, подваллар ажратилди.

Фельетон – жанр сифатида ўзига хос хусусиятларга эга. У ҳар доим аниқ тарихий ёки замонавий воқелик, шахс, фактларга асосланади. Фельетон ўз табиатига кўра ижобий ва салбий бўлиши ҳам мумкин. Бироқ давр ўтиши билан унда салбий ҳодисаларга ўткир сатирик муҳит муҳим ўрин эгаллади. Ўзбек адабиётида фельетон XX аср бошларида дунёга келган бўлиб, унда ҳаётда учраб турадиган нуқсон ва етишмовчиликлар ўткир киноя билан фош этилади. Фельетоннинг дастлабки намуналари А.Қодирий, Чўлпон, А.Қаҳҳор, Ф.Ғулом каби ўзбек адилари томонидан яратилди. Кейин бу жанрда С.Аҳмад, Н.Сафаров, Х.Тўхтабоев, М.Худойқулов, О.Юнусовлар самарали ижод қилишди. Ўтган асрнинг 60-йилларидан бошлаб фельетон жанри партиянинг адабиётдаги асосий танқидий қуролига айлантирилди. Фельетон қилинган ташкилот ва унинг раҳбари партияи жазо олишдан то жиноий жавобгарликка тортилишгача маҳкум эди. Бу фельетонни бирёклама тушунишга олиб келди.

Фельетон жанрининг асосий вазифаси жамият ҳаётидаги ижтимоий-сиёсий, иқтисодий, маънавий-ахлоқий томонларини қамраб олиш ва акс эттиришдан иборатдир. Унда кўпроқ мазкур соҳаларда учраётган камчилик, ижтимоий иллатлар, тўрачилик, лаганбардорлик, порахўрлик, ўзибўларчилик сингари нуқсонларни фош этиш билан жамият тараққиётига ижобий таъсир кўрсатиш нияти устивор бўлади. Фельетоннинг бошқа жанрлардан фарқи унинг ҳажвий публицистика қоидаларига асосланishi, ижтимоий кулгининг устунлиги, сатира ва юмор воситаларига таянишидадир.

Фельетон тузилишига кўра шеърий ва насрый йўлда ёзилиши мумкин. Шеърий усулда ёзилган фельетонга Муқимийнинг “Танобчилар”, “Кўр Ашурбой хожи ҳақида ҳажв”, F.Фуломнинг “Кўлтиқланган калла тўғрисида қофияли ваъз”, А.Мухторнинг “Каттамиз”, “Мини юбка ва паранжи” асарлари мисол бўла олади. Насрий фельетонлар эса жуда кўп учрайди (А.Қодирий, Чўлпон, F.Фулом, А.Қаҳхор, С.Аҳмад, X.Тўхтабоев, М.Худойқулов, Н.Аминов, Я.Қурбон...).

Фельетон ўз олдига қўйган мақсади ва вазифасига кўра:

1. Маълум фактга, шахс фаолиятига, обьектга, воқеа-ходисага;
2. Умумий масалаларга асосланган бўлади.

Биринчи турдаги фельетонларда ҳаётдан олинган аниқ фактлар, танқид қилинаётган шахс фаолиятидаги ижтимоий, маънавий-ахлоқий иллатлар аниқ кўрсатилади. Уларда фош этиш руҳи кучли бўлиб, баён сатирага асосланади. Иккинчи турида умумлаштириш устун туради. Ҳар иккисида ҳам асосий мақсад жамият тараққиётига, унинг умумий манфаатларига халақит бераётган иллатларга барҳам беришдир. Демак, фельетон адабиёт учун ҳар доим керак жанрdir.

**3. Очерк** – бу жанр ҳақидаги маълумотни “ЎзМЭ”нинг 6-жилдида берилган Й.Солижоновнинг мақоласидан оласиз (нусха кўчириб олинг).

**4. Новелла** – италянча бўлиб, “янги сўз” деган маънони англатади. Ҳажми ҳикоядан ҳам кичикроқ жанр. Ҳажмнинг кичикилиги мазмуннинг кенглигига таъсир этмайди. Оз сўз билан кўп маънога эришилади. Оз сўз билан соз фикр билдириш ҳамма санъаткорнинг ҳам қўлидан келавермайди. Шу боис жаҳон адабиётида новеллист ёзувчилар сони оз. Манбаларда новелла ҳикоянинг бир тури сифатида тилга олинган. Ҳатто “Краткий словарь литературоведческих терминов”да “рассказ и новелла” бир жойда берилган. Уларнинг фарқи кўрсатилмаган. “Адабиётшунослик терминларнинг русча-ўзбекча изоҳли луғати”да новеллага кенгроқ таъриф берилади. Д.Қуронов ва б.ларнинг “Адабиётшунослик луғати”да ҳам “Адабиётшуносликда новелла масаласида яқдил тўхтамга келинган эмас: “ҳикоя” ва “новелла” атамаларини синоним деб билувчилар ҳам, уларни кескин фарқловчилар ҳам бор. Яна бир тоифа новеллани ҳикоянинг бир кўриниши деб хисоблайди. Биз ўзимизни ҳикоя жанри билан новеллани кескин фарқловчилар қаторида деб биламиз. Новелла мустақил жанр сифатида Италияда Ўйғониш даврида юзага келган. Унинг илк намуналарини Бокаччо, Саккетти, Мазуччолар яратишган. Новелла сюжет қурилишининг кескин ривожланиши ва ўзгарувчанлиги билан фарқланади.

Жанр сифатида новелла қўйидаги хусусиятларга эга бўлиши керак:

1. Конкремт шахс ҳаётига оид воқеалар ихчам, бадиий жиҳатдан мукаммал ва тугалланган шаклда акс эттирилиши;
2. Новелланинг якуний хулосаси ўқувчи қалбида портлаш ходисасини вужудга келтириши;
3. Новеллада иштирок этувчи персонажлар миқдори ўта чегаралangan бўлиши, эпик баённинг битта персонаж ҳаёти билан боғлиқ бўлиши;
4. Новелланинг сюжети кутилмаган бошлама ва кескин ечимга, ўткир драматик тарангликка эга бўлиши;
5. Кичик ҳажмга катта даврга хос асосий хусусиятларни сифдира олиш ва шунга мос ҳолда воқеани лўнда, ихчам баён этишга эришиши;

6. Новеллада сюжет кўпинча битта муҳим деталь асосига қурилиши билан ажралиб туради.

Шу 6 та талабга жавоб бера оладиган новелла А.Қахҳорнинг “Ўғри”, “Анор”, “Бемор”, С.Аҳмаднинг “Қоплон”, “Карнай”, Ш.Холмирзаевнинг “Нотаниш одам”, “Олма емадим”, “Кўк кўл” кабилардир. Улар ҳажман 3-4 бетдан ошмайди. Жаҳон адабиётида Гиде Мопассан, В.Скотт, Э.Хемингуей, А.П.Чеховлар новеллист сифатида шухрат қозонганлар. Булар шуни исботлайдики, новелла мустақил жанр сифатида адабиётда яшаш хуқуқига эга. Ҳозирги ёзувчилардан Х.Дўстмуҳаммад, Х.Султонов, А.Йўлдошев, Н.Жалолиддин, З.Куролбой қизи кабиларнинг айрим асарларини новелла сифатида баҳолаш мумкин.

4. **Эссе** – французча уриниш, синаш, очерк маъноларида бўлиб, ўзбек адабиётига XX асрнинг сўнгги ўн ийлигига кириб келди. Шу сабабли мавжуд луғатларда у ҳақида маълумот учрамайди. Эссе тўғрисида тўлароқ маълумотни сиз Д.Куронов, З.Мамажонов, М.Шералиеваларнинг “Адабиётшунослик луғати” китобидан олишингиз мумкин.

Эссени тадқиқот очерк дейиш тўғрирок бўлади. Унда мен билган нарса, ҳодиса, муаммонинг билмаган томонларим очиб берилади. Тузилишига кўра 1. Бадий эсселар; 2. Илмий эсселарга бўлиниши мумкин. Эссе жанри эркин композиция қурилишига эгалиги билан ажралиб туради. Ш.Холмирзаев эсселари (4-т.) бадий, О.Шарафиддинов эсселари илмий йўналишга мос.

#### **Назорат саволлари:**

1. Памфлет нима:
2. Фельетон қачон, қаерда пайдо бўлган?
3. Очерк жанрининг ўзига хослиги ҳақида гапиринг.
4. Новелла қандай асар? Унинг ҳикоядан фарқи нимада?
5. Эссе жанри ҳақида маълумот беринг.

## **9-МАВЗУ: ҲИКОЯ ЖАНРИ**

#### **АДАБИЁТЛАР:**

1. Адабиёт назарияси. 2 томлик. Т., “Фан”, 1978-1979.
2. Адабий тур ва жанрлар. 3 томлик. 1 том. Т., “Фан”, 1991.
3. Аристотель. Поэтика. Ахлоқи кабир. Т., “Янги аср авлоди”, 2004.
4. Норматов У. Ижод сеҳри. “Шарқ”, НМАК, 2007.
5. Норматов У. Янги ўзбек адабиёти. Т., “Университет”, 2007.
6. Норматов У. Тафаккур ёғдуси. Т., 2005.
7. Расулов А. Бадийлик - безавол янгилик. Т., “Шарқ”, НМАК, 2007.
8. Солижонов Й. Ҳақиқатнинг синчков кўзлари. Т., 2009.
9. Мустақиллик даври ўзбек адабиёти. Т., АСН, 2006.
10. ЎзМУ. X1 том. Т., 2005, 330-331-бетлар.
11. Д.Куронов ва б. Адабиётшунослик луғати. Т., 2010.

#### **РЕЖА:**

1. Ҳикоянинг жанр хусусиятлари.
2. Ҳикоянинг шакл ва мазмунидаги ўзгаришлар.
3. Ҳозирги ўзбек ҳикоячилигига мавзу, муаммо ва ечим.

Ҳикоя эпик турнинг кичик ҳажмга эга бўлган жанрларидан бири бўлиб, ўзига хос имконият ва қамровга, бадий тасвир воситаларига эга эканлиги билан аввалги дарсда ўрганганимиз кичик жанрлар – памфлет, фельетон, очерк, новелладан фарқ қиласди. Бу фарқ биринчи галда асарнинг юксак бадийлигига, инсон ҳаётига оид қисқа воқеликни кўримли тарзда ифодалай олишида намоён бўлади. “Краткий словарь”да айтилишича,

ҳикояда қисқа эпизодда инсон ҳаётининг энг муҳим, типик кўриниши очиб берилади ва бу ҳолат унинг бутун ҳаётига тегишли қўзгу бўлиб қолади (масалан, “Ўғри”, Ш.Холмирзаевнинг “Ўзбек характери”). Ҳикоя, қисса, роман каби жанрлардан шу билан фарқ қиласиди, унда тасвиirlанган воқеагача нима бўлган, қандай бўлган, ким бўлганлиги тўғрисида маълумот берилмаслиги ҳам, айrim деталлар орқали ишора қилиниши ҳам мумкин.

Ҳикоя тасвир кўлами, сюжети ва композицион қурилишининг нисбатан соддалиги, баённинг одатда битта шахс томонидан (автор ёки ҳикоячи) олиб борилиши жиҳатидан фарқ қиласиди. Ҳикоя шаклий томондан асосан насрой байдига асосланади. Шу билан бирга айrim воқеалар шеърий усулда ҳикоя қилиниши ҳам мумкин. Воқеликнинг шеърий йўл билан ҳикоя қилишнинг ilk намуналарини А.Навоий, Турди, Махмур, Гулханий, Ҳамза Ҳакимзодалар ижодида учратамиз. XX асрнинг 60-йилларига келиб А.Мухтор томонидан “шеърий новеллалар” ҳам яратилди.

“Ҳикоя” атама сифатида кенгроқ маънода бирор воқеани гапириб беришни ҳам англатади. Сўзлаб берилган бундай ҳаётий воқелик қамровининг кенглиги, муаммонинг муҳимлиги, ҳажми, унда иштирок этувчиларнинг салмоғи жиҳатидан ҳатто қисса ёки романга хос бўлиши ҳам мумкин. Бундай ҳолларда “ҳикоя” термини “жанр” маъносида тушунилмайди. Масалан, Навоийнинг “Сабъаи сайёр” достонидаги 7 нафар мусофирининг ҳикояти ҳар бири қисса жанри даражасига кўтарилиган. Ёки А.Мухторнинг “Чинор” романи “ривоятлар, ҳикоятлар, қиссалар” дан ташкил топган яхлит асардир. Ў.Ҳошимовнинг “Дунёнинг ишлари” қиссаси, “Икки эшик ораси” романни ҳам ўзига хос ҳикоялардан ташкил топган. Ёзувчи Ш.Холмирзаев эса ўзининг “Олабўжи” асарининг жанрини “романдан катта ҳикоя” деб белгилайдики, бунда ҳам ҳикоянинг “сўзлаб бериш”, “гапириш” маънолари устун туради.

“Менинг назаримда, ҳикоя романдан ҳам қийин ва масъулиятли жанрdir, - деб ёзади Хуан Рульфо (Норвегия адабиётшуноси). –Чунки, ҳикояда жуда катта воқеаларни ҳам лўнда тарзда баён этиш, ўзингни чегаралаб, қисқаликка интилиш керак бўлади. Бошқалар 200 сахифада айтмоқчи бўлганини ҳикоячи 5-6, нари борса 10 сахифага сиғдириши керак. Бунинг учун ёзувчидан жуда катта маҳорат талаб қилинади. Ҳикояда аниқ мақсад қиска; лўнда баён қилинади. Ёзувчи ҳар қанча интелектуал салоҳият эгаси бўлмасин, ўқувчига ўз ҳукмини ўтказишга, уларни ўзи истагандек яшашга мажбур қилишга ҳаққи йўқ. Ижодкор буни англаб етса, шунинг ўзи катта гап”.

Ҳар бир жанр сингари ҳикоя ҳам ўзига хос тараққиёт босқичларига эга бўлиб, у муттасил равишда ўзгариб, янгиланиб бормоқда. Бу ҳикоячиликдаги бадиий шакл ва услуб борасидаги изланишлар самарасидир. Ўзбек ҳикоячилигининг шаклан ва мазмунан ўзгаришни унинг мумтоз намуналари билан XX аср бошларидағи Чўлпон, Фитрат, Қодирий ҳикояларини, бу адилларнинг 20-йилларда яратган ҳикоялари билан 30-йилларда F.Гулом, А.Қаҳҳор, Ойдин кабилар томонидан ёзилган айrim ҳикояларни таққослаш ўринлидир. Маълумки, мумтоз адабиётда яратилган ҳикоя(т)ларда характер турғун, тайёр ҳолда олиб кирилган бўлса, кейинроқ (XX аср бошларида) қаҳрамонлар характеристи динамикасига эътибор берила бошланди. Аммо бу ҳикояларда қаҳрамонлар ҳаракатда, доимий фаолиятда берилса ҳам уларнинг ички дунёси чукур очилмас, персонажнинг сурати ва сийрати мукаммал ва параллел ҳолатда тасвиirlанмасди. Бундай кўриниш ўтган асрнинг 60-йилларигача давом этди.

Энди F.Гулом, А.Қаҳҳор, Ойдин сингари ҳикоянависларнинг асарларини Ў.Ҳошимов, Ш.Холмирзаев, У.Назаров, Э.Аъзам, Х.Султоновларнинг ҳикоялари билан таққослаб кўринг! Улар орасида нафақат шаклан, балки мазмунан, кўтарилиган муаммоси, характеристлар тасвири, ифода усуллари, оҳангги, маҳорат даражаси жиҳатидан ер билан осмонча фарқ бор. Албатта, бундан ўша классик ёзувчиларимиз маҳорат нуқтаи назаридан кейинги адиллардан пастроқ экан-да, деган хулосага келманг-да, ижодкорлар яшаган даврни, шарт-шароитни, ижодий мактаблар мавжуд ёки мавжуд эмаслигини, ўрганиш ва ифодалаш учун имкониятларнинг тор ёхуд кенглигини хисобга олинг. Бу ерда гап

ёзувчининг ижодий индивидуаллиги устида эмас, балки жанр эволюцияси – тараққиёти хусусида кетаётир. Шу хусусиятлардан келиб чиқиб, ҳикоячилик тараққиётини қуидаги босқичларга бўлиб ўрганиш мумкин:

1. XII-XV асрлар (Рабғузий ҳикояларидан Навоий ҳикояларигача);
2. XVI асрдан XX асргача (Пошшохўжанинг насрий баёнга асосланган ҳикояларидан);
3. XX аср бошларидан 20-йилларгача (Фитрат, Қодирий, Чўлпон, Авлоний).
4. XX асрнинг 30-40 йиллари (F.Улом, А.Қаҳҳор, Ойдин);
5. XX асрнинг 40-60 йиллари (С.Аҳмад, А.Мухтор, П.Қодиров, О.Ёқубов);
6. XX асрнинг 60-90 йиллари (Ш.Холмираев, Ў.Ҳошимов, У.Назаров, Э.Аъзамов, З.Аълам, Х.Султонов, М.М.Дўстлар);
7. XX асрнинг 90-йилларидан XXI асрнинг дастлабки ўн йиллиги (Х.Дўстмуҳаммад, А.Йўлдошев, Н.Жалолиддин, З.Қуролбой қизи, С.Вафо қизи, У.Ҳамдам кабилар).

Бу босқичлар орасидаги муддатлар қисқа бўлса-да, ҳикоя жанри воқеликни бадиий акс эттириш, характер яратиш, адабиётнинг бош обьекти билан инсонни тушуниш, унинг сурати ва сийратини тўлақонли тасвирилашдаги янгиликлар, ўзгаришлар муттасил рўй берганини кузатиш мумкин. Янгиланиш ҳар бир жанрнинг доимий ва қонуний хусусиятидир.

Ҳикоя жанрининг тўла маънодаги дунёга келишини ўтган асрнинг бошларидан деб ҳисобласак, ўтган юз йиллик даврдаги тараққиёти бу халқимизнинг маънавий-маданий эврилиш, тафаккурининг кенгайиши, кечинмалар дунёсининг батафсилроқ очилишга эришишига олиб келди. Шу билан бирга сўнгги босқичда ўзбек адабиётига бемалол кириб келган жаҳон адабиётига хос усуллар ҳам ҳикоячилик имкониятларининг кенгайиши ва янгиланишига ёрдам берди.

Ҳикоя жанрининг ўзига хос хусусиятлари қуидагилардир:

1. Материал танлай билиш. Кичик бир эпизод билан катта ҳаётий воқеани бера олиш қобилияти. Ў.Ҳошимовнинг “Дехқоннинг бир куни”, “Урушнинг сўнгги қурбони”, А.Йўлдошнинг “Бўладиган бола”, “Ҳаёт энди бошланади”, “Қизил тилла, қип-қизил тилла” ҳикоялари.

2. Турғун характердан ҳаракатдаги (динамик) характер тасвирига ўтиш. З.Қуролбой қизининг “Тафаккур” ҳикояси. “Қаҳрамони – қишлоқ тегирмончисининг тўнғичи Тангриберди” деган бола. Тегирмончи Довулбой, колхоз раиси Эшбоев. Унинг уйида “дилбузар” бор. Қизиқиб, кўргани келган Тангриберди “Шахмат деган балони телевизорда кўриб” девона бўлиб қолади. У шахматни пухта ўрганиб, ўз вактида ўқувчисининг ноёб истеъодини пайқаган, уни рўёбга чиқариш учун отасига ялиниб-ёлворган ўқитувчи Шовқи муаллим ёрдамида, туман, вилоят, республика мусобақаларида қатнашади ва ғолиблик шоҳсуппасига кўтарилади. Афсуски, отаси кутганидек, уйига пул эмас, диплом ва Фахрий ёрлиқ қофзларини кўтариб келган ўғил тегирмончи Довулбойнинг қаршилигига учрайди. Отасидан калтак еганига қарамай 6-синф ўқувчиси Тангриберди ўқувчилараро мусобақада ғолиб чиқсан бўлса, кейинроқ катта мусобақаларда қатнашди. Аммо, яна пул ўрнига... Бола эса ана шу ёрликлар, дипломлари билан фахрланар, ўқитувчиси Шовқи муаллим “отангга бер” деб чўнтағига пул солиб қўйса ҳам “Пулни яхши кўради”ган отасига 1-ўринни олган бўлса ҳам бир тийин беришмаганини айтиб, “қўйқисдан юзига тушган тарсаки зарбидан девор ёнига учиб тушди”.

Ота қанчалик золим, қаҳри қаттиқ бўлмасин, адiba ота ва бола ўртасидаги миллий колоритни унутмайди: ўғил отага тик боқмайди, қўл кўтармайди, гап қайтармайди. Ички бир руҳият исён кўтарса ҳам отасининг айтганини қиласди. Натижада ўзининг порлоқ келажагини қабрга дағн қиласди. Тангриберди раис Эшбоевни фош қилмоқчи бўлгани учун унинг одамлари томонидан майиб-мажруҳ ҳолга келганида ҳам тафаккури сўнмайди. Ҳикоя тафаккур қудратининг бокийлигини кўрсатиш билан оптимилик руҳда тугайди. Бу ҳикоянинг юксак бадиий фазилатларини йирик адабиётшунос У.Норматов пайқади ва

З.Куролбой қизига очиқ хат йўллаб, “ҳикоя учун мақбул хотима топишнинг ўзи улкан кашфиёт” эканлигини таъкидлаб, адабани “ана шу жиддий муваффақият билан чин дилдан қутлай”ди. Мажрух бўлса ҳам Тангрибердининг характери тинимсиз ўсиб боради ва ўқувчидаги унга нисбатан ҳам ачиниш, ҳам фахрланиш туйғусини, отасига, раис Эшбоевга, унинг тимсолида эса бутун бир тоталитар диктатура жамиятига нафрат ўйғонади.

3. Ҳикояни деталлар асосига қуриш. Маълумки, ижод қилишдан асосий мақсад ўқувчини муаллиф фикри ва ҳис-туйғуси билан ошно қилишдан иборатдир. Бадиий асар мукаммаллигига воқеликни батафсил тасвирлаш орқали эришилади. Бироқ батафсил тасвирлаш кўпроқ роман жанрига хос бўлиб, ҳикоя ҳажман кичик бўлганидан автор ўз ниятини кўпроқ деталларга юклашга ҳаракат қиласи. Деталлаштириш ихчамликка олиб келади. М.Горький айтганидек, ҳикояда муҳими детални топишдир. Агар уни топа олсангиз, - дейди ёзувчи, - у Сизга бутун характерларни ёритиб беради, ундан сюжет ҳам, фикр ҳам, ғоя ҳам ўсиб чиқаверади. Деталнинг кучи ва мазмуни шундаки, томчидаги қўёш акс этганидек, энг кичик деталь ўзида асарнинг бутун ғоясини ўзида мужассам этади. Чунки “деталь санъатнинг минатюр моделидир” (Е.Добин). Бу фикрни яхшироқ тушуниб олиш учун Сиз менинг китобимдаги “Деталлар тилга кирганда” ва “Эркаги бор уй”нинг фазилатлари” сарлавҳали мақолаларим билан танишиб чиқинг.

4. Абсурд ҳикояларнинг пайдо бўлиши. Кейинги ўн йилликда Н.Эшонқул, Э.Шукур, У.Ҳамдам ҳикояларида шундай хусусиятга эга ҳикоялар яратилди. Масалан, Н.Эшонқулнинг “Маймун етаклаган одам”, “Хаёл тузоғи”, “Муолажа”, Э.Шукурнинг “Пул санаётган одам”, У.Ҳамдамнинг “Лола”, “Тош” кабилар Камюонинг “Сизиф ҳақидаги афсона” асарини эсга солади. Агар Сизиф тинимсиз равишда тошни тепаликка олиб чиқишига беҳуда уринса, “Пул санаётган одам” (исмсиз) бир меъёрдаги пулни қайта-қайта кўшиб санаш орқали миллионер бойга айланади. Икковининг мақсади ҳам абсурд (аммо умид бор).

5. Баъзи ҳикоялар учун бош қаҳрамон характерини очишга ёрдам берувчи 2-даражали-орқа планда тасвирланган персонаж муҳимроқ хисобланади. Масалан, Н.Жалолиддиннинг “Байроқ”, У.Ҳамдамнинг “Узокдаги Дилнур” ҳикояларида шундай.

Хуллас, ҳозирги ўзбек ҳикоя жанрининг шакли ва мазмунига хос бу фазилатлар шу билангина чекланмайди. Ўқиган ва тушунган ўқувчи янги-янги хусусиятларни кашф этиши мумкин. Шу йўлда Сизга муваффақият тилайман.

#### **Назорат саволлари:**

1. Ҳикоя жанрининг тарихи.
2. Ҳикояни атама ва жанр сифатида таърифланг.
3. Ҳикоя жанрининг тараққиёт босқичларини сананг.
4. Ҳикоянинг жанр хусусиятлари айтинг.
5. З.Куролбой қизининг “Тафаккур” ҳикоясини таҳлил қилинг.
6. Ўзбек адабиётидаги модерн, абсурд ҳикоялар ҳақида гапиринг.

### **10-МАВЗУ: ҲОЗИРГИ ЎЗБЕК АДАБИЁТИДА ҚИССА ЖАНРИ**

#### **АДАБИЁТЛАР:**

1. Адабиёт назарияси. 2 томлик. Т., “Фан”, 1978-1979.
2. Адабий турлар ва жанрлар. 3 томлик. Т., “Фан”, 1991. (1-т).
3. А.Холмуродов. Қисса поэтикаси. Т., “Фан”, 2007.
4. ЎзМУ 11-т. Т., 2005. 22-23-бетлар.
5. Мустақиллик даври ўзбек адабиёти. Т., АСН, 2006.
6. И.Султон. Адабиёт назарияси. Дарслик. Т., “Ўқитувчи”, 2005.
7. Й.Солижонов. Ҳақиқатнинг синчков қўзлари. Т., 2009.
8. Д.Куронов ва б. Адабиётшунослик луғати. Т., “Академнашр”, 2010.

## РЕЖА:

1. Қисса жанри. Повесть атамаси ҳақида.
2. Ҳозирги ўзбек қиссаларининг жанр хусусиятлари.

Қисса – эпик тур жанрларидан бири бўлиб, воқеаларни баён қилиб беришга асосланган. Ғарбий Европа ва Америка адабиётида “қисса” (повесть) тушунчаси йўқ. Уларда романдан бошқа барча насрый асарлар “новелла” номи билан аталган. Рус адабиётида “повесть, повествование” атамаси мавжуд бўлиб, бирор воқеани кенгроқ планда ҳикоя қилиб бериш тушунилган. Рус адабиётшуноси Л.Тимофеев “ўрта эпик шакл” (“средняя эпическая форма”) деб атайди. Унинг ёзишича, повесть асосий персонаж атрофига уюшган бир неча эпизодларни тасвирлаш орқали унинг ҳаётидаги алоҳида даврни қамраб олади.

Биронта ҳам манбада “қисса” (повесть) атамасига жанр сифатида аниқ таъриф берилмаган. Л.Тимофеев ва Н.Венгронинг “Краткий словарь литературоведческих терминов” китобида айтилишича, “повесть (қисса) ҳикоядан фарқли ўлароқ, одатда унда иштирок этувчи асосий қаҳрамоннинг ҳаётига оид бир неча воқеалар ифодаланади”. Унда бир неча персонаж қатнашади, улар асосий қаҳрамон атрофига уюштирилади. Шунингдек, повесть (қисса) ҳикояга қараганда ҳаёт мураккабликларини кенгроқ, романга нисбатан характер ҳамда воқелик кўламини озроқ акс эттиради. Буни англаб етиш учун Сиз А.Қаҳхорнинг “Даҳшат” ҳикояси билан “Синчалак” қиссанини таққосланг. Н.Хотамов, Б.Саримсоқовнинг “Адабиётшунослик терминларининг русча-ўзбекча изоҳли луғати”да айтилишича, “повесть (қисса) ҳаётий воқеа-ҳодисалар қамрови жиҳатдан романга нисбатан кичик, ҳикояга нисбатан каттароқ ва мураккаброқ баён шаклига эга бўлган жанрdir. Повестда у ёки бу шахс ҳаётининг маълум даври хроникал баён этилади”. “Адабиётшунослик луғати”да (муаллиф Д.Қуронов ва б.) ёзишича, қисса “эпик турнинг ҳикоя ва роман қаторидаги учта асосий жанридан бири, повесть. Ўзининг жанр хусусиятлари билан Қ. ҳикоя ва роман оралиғидаги ҳодисадир: ҳикояда қаҳрамон ҳаётидан биргина воқеа, романда қаҳрамон ҳаётининг мураккаб ижтимоий муносабатлар тизимидаги катта бир даври, Қ.да қаҳрамон ҳаётининг бир босқичи қаламга олинади”.

Албатта, бу таърифлар нисбий ва умумий тарзда бўлиб, ҳанузгача қисса (повесть) ўзининг жанр сифатидаги аниқ ва мукаммал баҳосини олган эмас. Ҳатто қисса жанрининг хусусиятлари ва поэтикаси муаммоларига бағишлиланган махсус тадқиқот муаллифи А.Холмуродов ҳам ўзининг докторлик диссертациясида бу соҳани четлаб ўтади. Ким бўлса ҳам қисса – повесть хусусиятини роман билан ҳикояга нисбатан ҳажмига қараб белгилайди. Шундай бўлса, Ш.Холмирзаевнинг “Ўзбек бобо”, “Озодлик”, “Булут тўйсан ой” ҳикояларини ҳажмига кўра бемалол қисса деб қабул қиласак бўлаверар экан-да! (Бу ҳақда менинг китобимга қаранг).

Ҳатто, Белинскийдек улкан танқидчи ҳам “Поэзиянинг тур ва хилларга бўлиниши” номли мақоласида “Повесть ҳам романнинг ўзгинасидир, факат кичик ҳажмдадир. Асарнинг ҳажми мазмуннинг ҳажми ва моҳиятига қараб белгиланади” деб ёзади. Яна бир мақоласини “Рус повести ва Гоголь повестлари”да “повесть – бўлакларга бўлинган роман – романдан олинган бир бобдир” дейди. Яна бир рус адабиётшуноси Г.Абрамовичнинг фикрича, повесть ўрта эпик форма бўлиб, мураккаб ижтимоий муаммоларни очища бир қанча ҳодиса ва воқеаларни ўзига бирлаштиради, унда қатнашувчи персонажлар сони ҳам ҳикоядагидан кўпроқ бўлади. Л.Шепилованинг ёзишича, повесть ҳаётнинг кўп томонларини қамраб олса ҳам ўз ҳажмининг кичиклиги, мазмуннинг ихчамлиги билан романдан фарқланади. Ҳикоядан эса сюжетининг мураккаблиги, воқеалар ва персонажларнинг кўплиги билан ажralиб туради. Бироқ Шепилова қисса ҳажмининг кичиклиги, мазмуннинг ихчамлиги, сюжетининг мураккаблиги нималар эвазига рўй бериши лозимлиги тўғрисида тўхталмайди.

Қиссанинг жанр хусусиятларига доир номзодлик диссертацияси ёзган тадқиқотчи Ф.Ражабова ҳам унинг ҳикоя ва романдан фарқи ҳақида тўхталиб, қисса “бир шахснинг кечмиши ва саргузаштларига асослан”иши, лирик талқинга мойил воқеалар танлаб

олиниши, уни ҳажм жиҳатдан чегаралаш илмий мезон бўйламаслигини тўғри қайд этгач, шундай хулоса чиқаради: “Қисса ягона қаҳрамон саргузаштининг хроникал изчилликдаги тасвири билан роман ва бошқа эпик жанрлардан фарқ қиласди”. 2 жилдлик “Адабиёт назарияси” китобининг “Эпос” турига бағишлиланган бобида қисса – повесть тўғрисида умуман тўхталинмаган. “Адабий турлар ва жанрлар” китобининг 1-жилдидаги повесть – қисса жанри ҳақида фикр юритган олим Э.Каримов жанрнинг ўзига хос хусусиятлари, бошқалардан фарқи тўғрисида эмас, кўпроқ унинг тарихига тўхталади. Муаллиф келтирган мисолларнинг кўпи адабиётшуносликда ҳикоя ва роман деб тан олинган (масалан, “Доктор Мұхаммадёр”, “Янги саодат”, “Туркий Гулистон ёхуд ахлоқ” каби) асарларини ҳам қисса атаб, таҳлилга тортади. Унда қисса – повесть жанри ҳақидағи илмий-назарий қарашлар эмас, асосан асарларнинг қайта баёни ўрин олган.

Академик И.Султон дарслигига “Бир киши ва у билан ҳаёти боғлиқ бўлган бир неча кишининг тақдирни ўртача ҳажмда тасвир этилган, аммо ҳаётнинг кенг манзарасини чизиб беришни ўз олдига вазифа қилиб қўймайдиган асарлар повесть жанрига мансубдир. Қиссада (домла повесть деб айтган. Зоро, совет даврида терминлар интернационал тилда айтилган) одатда, лиризм ҳикоя ва романга нисбатан кучлироқ бўлади”. Менимча, юқоридаги таърифлар орасида энг тўғриси мана шудир. Чунки бошқа таърифларнинг биронтасида ҳам лиризм тўғрисида айтилмаган эди. Ваҳоланки, лиризм – қисса вужудини қон билан таъминлаб туручи томир ҳисобланади. Лиризм воқеликда ҳам, оҳангда ҳам, баёнда ҳам, мавзуда ҳам (хатто ижтимоий мавзу бўлса ҳам) устивор ўринни эгаллади. Шунингдек, И.Султон домла повесть билан қисса атамаси орасидаги фарққа ҳам нозиккина ишора қилиб ўтадилар. Олимнинг таъкидлашича, “қисса кўпинча ишқий мазмунга эга, хозирги замон повестида эса ишқий линиянинг бўлиши шарт эмас”.

Энди биз юқоридаги манбалардан олган таассуротларимизга асосланиб, ҳамда ўз тажрибамиз ва қарашларимиздан келиб чиқиб, қиссанинг қуйидаги хусусиятларини тавсия этамиз:

1. Ўзбек адабиётида “қисса” атамаси рус тилидаги “повесть”, “повествование” атамаларининг маъносини ўзида тўла мужассам этади. Ота – боболаримизнинг “қиссаҳонлик, қиссагўйлик” деган ибораларини эсланг.

2. Қисса жанрини аниқлашда бир қанча “шартли” белгиларга ҳам эътибор бериш зарур. Жумладан:

а) асарнинг ички ҳажми (ташқи, яъни саҳифасининг оз ёки кўплиги эмас, балки мазмун-муаммонинг қамраб олиниши);

б) сюжетнинг кўп планли бўлиши (романда эса кўп тармоқли бўлади), бир воқеа икки йўналишда ҳал қилиниши мумкин (О.Ёкубовнинг “Қанот жуфт бўлади”, Ў.Хошимовнинг “Баҳор қайтмайди”, Н.Жалолиддиннинг “Болалар” қиссалари);

в) ягона сюжет линиясининг устиворлиги;

г) асосий қаҳрамон атрофига бирлашган бир неча персонажларнинг мавжудлиги;

д) бош қаҳрамон ҳаётида рўй берган барча воқеаларни батафсил тасвиrlаш шарт эмаслиги (батафсиллик роман жанрига хос);

3. Қисса роман жанри сингари мураккаб ҳаётий жараённи, кенг қамровли воқеаларни узлуксиз ривожланишда, тар.ётда кўламли тасвиrlай олишга қодир эмас.

4. Қисса қаламга олинган ижтимоий мазмуннинг кенглиги ва чуқурлиги билан ҳикоядан фарқ қиласди.

5. Қисса жанри ўзининг ички тузилишига кўра турлича бўлиши мумкин. Айрим қиссаларда ягона сюжет линияси ҳукмрон бўлиб, ана шу сюжет марказига биргина қаҳрамоннинг ҳаёти, тақдирни, унинг шу ҳаёти доирасида рўй берган асосий воқеалар – қўйилади (“Синчалак”, “Шайтанат”).

6. Шундай қиссалар ҳам бўладики, унда асосий қаҳрамоннинг ҳаёти, тақдирни мустақил новеллаларга сочиб юборилади. Ҳамма новеллаларда ҳаётнинг маълум бир томони, ҳар хил персонажлар ҳаётида юз берган воқеалар – ҳикоя қилиниши мумкин.

Бирок уларни асардаги марказ – бош қаҳрамон бирлаштириб туради (масалан, “Дунёнинг ишлари”).

7. Ички тузилишга кўра бир неча ҳикоялардан ташкил топган қиссалар ҳам бўлади (А.Қаҳхорнинг “Ўтмишдан эртаклар”).

Ўтган асрнинг 80-йилларидан ўзбек қиссачилиги ҳам шакл, ҳам мазмун жиҳатдан янгиланди. Агар Ў.Хошимов қисса жанрига юксак бадиийлик ва чукур лиризм фазилатларини олиб кирган бўлса, Э.Аъзам билан М.М.Дўстлар янги қаҳрамон концепциясини олиб кириш билан янада юқори босқичга кўтардилар. Э.Аъзам “Отойининг туғилган йили” қиссасидаги беғараз бетгачопар, шартаки талаба Аскар, М.М.Дўстнинг “Галатепага қайтиш” қиссасидаги диншунос Тошпўлат Файбиров, Н.Жалолиддиннинг “Болалар” асаридаги ўқитувчи Отажон aka ана шундай янгича қиёфадаги инсонлардир.

Ўзбек қиссачилигига лиризмнинг кучайишида Т.Муроднинг хизмати бекиёсdir. Унинг “Момо ер қўшиғи”, “Юлдузлар мангу ёнади”, “От кишинаган оқшом” қиссаларининг номланиши ҳам, оҳангидан ҳам, баён усули ҳам лирикдир. У ёзмайди, балки куйлади.

Қисса ҳам романлар сингари мавзу ва муаммоси, йўналишига кўра қуидаги турларда ёзилади:

1. Автобиографик (М.Муҳаммаджонов, С.Айний, Ойбек, Н.Сафаров, И.Рахим).
2. Биографик (Ғ.Ғулом, А.Қаҳхор, Ҳ.Ғулом).
3. Тарихий (М.Осим, Ж.Илёсов, Мирмуҳсин, Ҳ.Султонов).
4. Фантастик (Т.Малик, Ҳ.Ислом шайх, М.Маҳмудов).
5. Ахлоқий (Ҳ.Дўстмуҳаммад, А.Йўлдош, Н.Жалолиддин).
6. Ҳужжатли қиссалар.

Мустақиллик йилларида Ғарбий Европа адабиёти таъсирида талай қиссалар яратилди. Булар орасида Н.Эшонқулнинг “Уруш одамлари”, “Тун панжаралари”, “Кора китоб”, У.Ҳамдамнинг “Ёлғизлик”, Т.Жўраевнинг “Йиқилган ой” қиссалари характерлидир. Мавзу жиҳатдан янгиланиш кечаги кунимизга қарашда ҳам аён бўлди. Совет даврида 20-йиллардаги ўзаро фуқаролар урушида миллий – озодлик учун курашган ватанпарвар ота-боболаримиз “босмачи” деб аталди. Бундай номуносиб қарашларга ҳам бадиий адабиёт, хусусан, қисса жанри биринчи бўлиб жавоб берди. М.Алининг “Кўк тўнлилар”, М.Маҳмудовнинг “Боғдон қашқири”, Т.Маликнинг “Сўнгги ўқ”, “Чорраҳада қолган одамлар” номли қиссаларида ўша давр кишилари фаолияти хаққоний тасвирланди. Айниқса, М.Маҳмудовнинг “Боғдон қашқири” қиссасида кўтарилигдан муаммо ва яратилган қаҳрамон характерлидир. Унда Завлод тақдири кўрсатилганю боғдон қишлоғида вояга етган Қиличбек чор русияси аскарларига қарши курашади. Ўзи амалга оширолмаган ниятини ўғли Юсуфбекка васият қилиб колдиради. У ўрта жангари, қўрс, ахлоқсиз, ҳеч нарсадан тафт тортмайдиган, ҳеч кимдан кўркмайдиган, одамларга нафрат билан қарайдиган (отаси ўргатган) киши бўлиб ўсади. У қишлоғининг энг гўзали Гавҳарни хоҳишига қарши опқочиб кетади. Аҳмадбек исмли ўғил кўради. Бу 3-авлод вакили инқилобчи бўлиб етишади. Отаси ўз жонини асрар қолиш учун ўғлини кизилларга сотади. Юсуфбек ўзи ва отаси орзу қилган эркка эришолмай ўлиб кетади. Унинг вахший қашқир қиёфасига киришига рус истилоси сабаб бўлди.

Хуллас, ҳозирги ўзбек қиссалари том маънодаги янгиланиш жараёнини бошидан кечирди. Бу айниқса, модерн йўналишида ёзилган қиссалар табиатида аниқ кўринди. У.Ҳамдамнинг “Ёлғизлик” ва Н.Эшонқулнинг барча қиссалари таҳлил қилинади.

#### **Назорат саволлари:**

1. Қисса ва повесть атамасининг мазмун – моҳияти.
2. Ўзбек адабиётида қисса жанрининг тарихий тараққиёти.
3. Қисса жанрининг асосий хусусиятларини айтиб беринг.

4. Мавзу ва муаммоси жиҳатидан қиссаларни қандай гурухларга бўлиб ўрганиш мумкин?
5. Ўзбек адабиётида лирик қисса қачон пайдо бўлди? Кимлар кўпроқ ижод қилди?
6. Ўзбек модерн қиссалари ҳақида гапиринг.

## **11-МАВЗУ: ҲОЗИРГИ ЎЗБЕК АДАБИЁТИДА ЙИРИК ЭПИК ЖАНРЛАР**

### **АДАБИЁТЛАР:**

1. Адабиёт назарияси. 2 томлик. Т., “Фан”, 1978-1979.
2. Адабий турлар ва жанрлар. 3 томлик. 1-том Т., “Фан”, 1991.
3. Аристотель. Поэтика. Ахлоқи кабир. Т., “Янги аср авлоди”, 2004.
4. С.Мирвалиев. Ўзбек романи. Т., “Фан”, 1969.
5. ЎзМЭ. 7-т., Т., 2004.
6. И.Султон. Адабиёт назарияси. Дарслик. Т., “Ўқитувчи”, 1981, 1985, 2005.
7. У.Норматов. Ижод сехри. Т., “Шарқ” НМАК. 2007.
8. Қ.Йўлдошев. Ёник сўз. Т., “Янги аср авлоди”, 2006.
9. А.Расулов. Бадиийлик – безавол янгилик. Т., “Шарқ” НМАК. 2007.
10. Й.Солижонов. Ҳақиқатнинг синчков кўзлари. Т., 2009.
11. Д.Куронов ва б. Адабиётшунослик лугати. Т., “Академнашр”, 2010.

### **РЕЖА:**

1. Роман ва унинг тараққиёт йўли.
2. Роман – эпик турнинг йирик жанри.
3. Роман шакли ва мазмунидаги ўзгаришлар. Роман – дилогия: роман-трилогия; роман-эпопея.
4. Ҳозирги ўзбек адабиётида полифоник романлар.

Роман (французча роман) – ўзигача пайдо бўлган кўплаб адабий асарларнинг юғиндиси, синтези хисобланади. Шу фазилатига кўра роман қомусий хусусиятга эгалиги, имкониятларининг ғоят кенглиги билан ажralиб туради. Роман эпик тур жанрларидан бири бўлиб, бу атама дастлаб XII-XIII асрларда Фарбий Европада пайдо бўлди. Роман тилларида (ҳинд-европа тиллари оиласига мансуб қардош тиллар гурухи) яратилган шеърий ва насрый асарлар ана шу ном билан аталган. XV асрдан бошлаб бу атама ҳикоя, баён қилиш деган маънода ишлатила бошланди ва эпик турнинг энг катта ҳажмли жанри роман деб номланди. Романда шахс ва жамият ҳаёти бир-бирини инкор этмайдиган, маълум маънодаги мустақил олам сифатида таҳлил этилади. Айнан шу хусусият роман жанри мундарижасининг ўзига хос табиатини белгилаб беради.

XVII асрга келиб Европада “рицарлик романлари” пайдо бўлди. Сервантеснинг “Дон Кихот” романи рицарлик саргузаштларига пародия асар сифатида шухрат қозонди. Бора-бора романлар ижтимоий-сиёсий ҳаёт, шахс ва жамият ўртасидаги мураккаб муносабатларни қамраб ола бошлади ва жанрнинг ғоявий-бадиий мавқеи ошди. Унда мураккаб турмуш жараёни, ҳаётдаги зиддиятли ҳодисалар доираси кенгайиб, инсон ва жамият тақдири етакчи ўринни эгаллади.

Роман қамрови ғоятда кенг жанрdir. Шунинг учун ҳам мен уни океан (уммон)га қиёслаганман ва ёзувчи-ғаввос унинг бағрига ўйнғиб, ҳовучига яраша дуру гавҳарларни олиб чиқишига ўхшатганман. Бошқа жанрлардан фарқли ўлароқ, роман ҳаётни энг майдада “икир-чикирлари”гача батафсил тасвирилаш имкониятига эга. В.Г.Белинский айтганидек, роман “миниатюрадаги олам”дир.

Роман жанри марказида бош қаҳрамон инсон образи туради ва унинг ҳаёти акс этади. Бу бош қаҳрамон тақдири унинг жамиятда эгаллаган мавқеи, ўрни билан ҳар доим ҳам боғлиқ бўлавермаслиги мумкин. Баъзан, айтайлик, бош қаҳрамон учун танланган инсон жамиятда рўй бераётган воқеа-ҳодисалар олдида катта ёки кичик бўлиши мумкин. Бинобарин, унинг мавқеи ёки тақдири ўртасида зиддият рўй беради ва бу асарнинг

конфликтини белгилаб, сюжет линияларини ҳаракатлантиради (З.Қуролбой қизининг “Армон асираси” романы айнан шунга мисол бўла олади).

Ўзбек адабиётида роман жанрининг пайдо бўлиши Ҳ.Ҳ.Ниёзий, Мирмуҳсин Шермуҳаммедов, А.Қодирийлар номи билан боғлиқ. Агар Ҳамза “роман” атамасини биринчи бўлиб алдабиётга олиб кирган бўлса, “Ўткан кунлар” том маънодаги роман жанри сифатида пайдо бўлди ва унинг муаллифи А.Қодирий дунёдаги олтинчи романчилик мактабининг асосчиси сифатида тан олинди. Шундан сўнг роман жанри ўзбек адабиётида ҳам ривожланишнинг кенг йўлига чиқиб олди. А.Қодирий бошлаб берган тарихий мавзу кейинроқ Ойбек (“Навоий”), О.Ёқубов (“Улуғбек хазинаси”, “Кўхна дунё”), П.Қодиров (“Юлдузли тунлар”, “Авлодлар довони”, “Она лочин видоси”), Мирмуҳсин (“Меъмор”, “Турон маликаси”), 90-йилларга келиб, М.Али (“Сарбадорлар” дилогия, “Улуғ салтанат” трилогия), С.Сиёев (“Яссавийнинг сўнгги сафари” дилогия), А.Дилмурод (“Маҳмуд Таробий”, “Паҳлавон Маҳмуд”), Т.Ҳайит (“Вафо маликаси”), Ж.Фозил (“Айрилиқ остонаси”) ва бошқа кўплаб ёзувчилар томонидан давом эттирилди.

60-йиллардан бошлаб ўзбек адабиётида роман-дилогия (М.Исмоилийнинг “Фарғона тонг отгунча”, Ҳ.Ғуломнинг “Машъял”, А.Иброҳимовнинг “Уйқу келмас кечалар”, О.Мухтор “Навоий ва рассом Абулхайр”, А.Дилмуроднинг “Фано даштидаги қуш”), роман-трилогия (“Уфқ”, “Жудолик диёри”), роман-эпопея (Ж.Шарипов “Хоразм”лар ҳам вужудга келди. Шунингдек, адабиётимиз сўнгти йилларда бу жанрининг роман-хикоя (“Икки эшик ораси”, “Олабўжи”, “Навоий ва рассом Абулхайр”), роман-монолог (Н.Қобил “Унтилган соҳиллар”), роман-хроника (Б.Аҳмедов “Амир Темур”), мистик-фантастик (Ҳ.Ислом Шайх “Телба дунё”, “Туташ оламлар”), мифологик сингари янги шакллари ҳам ривож топмоқда. Роман аслида жанр сифатида ягона бўлиб, тарихий, тарихий-биографик, автобиографик, саргузашт-фантастик каби атамалар романнинг ё мавзу ёки муаммоси билан боғлиқ шакллариридир холос.

Мавзуси, ҳажми, сюжетининг мураккаблиги, композицион қурилишининг мукаммаллик даражаси жиҳатдан ва тасвир усусларининг ранг-баранглиги билан роман жанри баъзи бир бадиият унсурларининг (сюжет турлари, конфликт, ечим, баён қилиниш усули) қўлланишга қараб турлича бўлиши мумкин. Бу жиҳатдан О.Мухтор, М.М.Дўст, Ҳ.Дўстмуҳаммад, Т.Жўраевларнинг романлари характерлидир. Жанр имкониятларининг кенглиги романнависларнинг турлича бадиият унсурлари, бадиий тасвирнинг ҳар хил шакли ҳамда воситаларидан эркин фойдаланиш ҳуқуқини беради.

Мустақиллик туфайли ўзбек адабиётида 70 йил ҳукмронлик қилган социалистик реализм методининг барҳам топиши роман жанрининг эркин нафас олиши ва янада ривожланишга туртки берди. Бу йилларда юз берган энг муҳим янгилик ўзбек адабиётига, хусусан, роман жанрига Европа адабиётига мос модерн йўналишининг эмин-эркин кириб келиши билан Жойс, Кафка, Камю, Нитше, Маркес ва бошқа моҳир санъаткорларнинг ижодий анъаналари асосида яратилган романлар кўпайди. Энг муҳими, бундай романлар ўзбек китобхонининг ҳам ўқиш ва уқиш борасидаги малакаси ҳамда қобилиятини тарбиялади. О.Мухтор, М.М.Дўст, Ҳ.Дўстмуҳаммад, Т.Жўраев кабиларнинг романларини ўқиганингизда улардаги анъанавий сюжет ва композиция ўрнини, қаҳрамоннинг сурати ва сийратини автор томонидан анъанавий тасвирлаш усулини кўпроқ ассоциатив, авантюристик сюжет турлари, персонажларнинг хатти-харакатидан кўра руҳий драмаси, онг оқими эгаллаганига гувоҳ бўламиз. Демак, роман сюjetи, композицияси, баён қилиш усуслари жиҳатидан мутлақо янгиланди ва янги тараққиёт босқичига кўтарилди.

Ҳозирги адабий жараёндаги энг катта янгилик насримизда кўповозли (полифоник) романларнинг пайдо бўлишидир. Полифоник аслида бизнинг адабиётимиз учун йўқдан бор бўлган, тўсатдан четдан кириб келган ҳодиса эмас. У аслида бизнинг кўп асрлик лирик меросимизда, XX аср бошларидаги наср ва драматик асарларда у ёки бу даражада учрайди. Фақат бу адабий ҳодисанинг қадимиyllигини, ўзбек адабиётига хос кўринишлари ва хусусиятларини биз, адабиётшунослар, ўз вақтида тадқиқ қилиб, исботлаб беролмаганмиз холос. Полифоник роман яратган адаб Достоевский бўлиб, бу атамани

фанга олиб кирган ва кенг миқёсда тадқиқ қилган олим М.М.Бахтиндир. Олимнинг Достоевский асрлари юзасидан чиқарган хуласаларига кўра полифоник роман ўзининг:

1) сюжети; 2) композицияси; 3) қаҳрамоннинг танланиши ва китобхонга тақдим этилиши; 4) баён усули ва бадиий нутқ типларнинг қўлланиши жиҳатидан ҳам, 5) қаҳрамонларнинг руҳий драмасини тасвирилаш томонидан ҳам анъанавий романлар қолипига тушмайди. Ўзбек адабиётида О.Мухторнинг барча, М.М.Дўстнинг “Лолазор”, Х.Дўстмуҳаммаднинг “Бозор”, Т.Жўраевнинг “Арвоҳлар тунда изғийди” романларида ана шундай фазилатлар учрайди. Полифоник романларнинг ўзига хослиги шундаки, оддий типдаги романлардан фарқли ўлароқ, уларнинг қаҳрамонлари овози автор овозига тенг хуқуқли оҳанг қурилишига эга бўлади. Полифоник романга хос нутқи структураси монологик нутқдан қаҳрамонларнинг мустақил ва ўзига хос фикрлаши, ички эркинликка эга бўлиши, баъзи пайтларда ўзини яратган автор баҳоларига ҳам қўшилавермаслиги, саркашлиги билан ажralиб туради. Шу жиҳатдан М.М.Дўстнинг “Лолазор” романига мурожаат қилиб кўрайли.

Романнинг ҳар икки қаҳрамони – Назар Яхшибоев ҳам, Сайдкул Мардон ҳам ижодкор шахс бўлғанликларидан худди автор сингари ўзининг мустақил нутқи структураси ва оҳангига эга. Шу хусусиятига кўра улар бир-бирига ҳам, автор нутқи оҳангига ҳам қўшилиб кетмайди. Бу қаҳрамонлар романнинг бошидан охиригача ўзларининг тўлақонли овози ва сезгиси билан мустақил равишда иштирок этадилар. Улар мустақиллигининг биринчи белгиси шундаки, Н.Яхшибоев билан С.Мардон асарнинг “Бемор” бобида бирон марта ҳам учрашмайди. С.Мардон Н.Яхшибоевнинг ташқи ҳаётидаги фаолиятини акс эттирувчи кўзгудир. “Қиссанавис” бобларида С.Мардон Н.Яхшибоевнинг амалий фаолияти, ёзувчи ва жамоат арбоби сифатидаги фазилат ҳамда қусурларини, инсон сифатидаги ўқинчлари, армонини батафсил тасвирилади. Шифохонада кечган 5-10 кунлик ички ҳаётидан асосан Н.Яхшибоевнинг онг оқими, хотиралар тизими орқали хабардор бўламиз.

Полифоник романларнинг муҳим белгиларидан яна бири воқеаларнинг бошдан охиригача диалог асосига қурилишидир. Чунки диалог қўповозлиликнинг муҳим шартларидан бири ҳисобланади. Диалог қурилиши жиҳатидан ҳам “Лолазор” романни полифоник асар олдига қўйилган талабларга жавоб бера олади. Масалан, Н.Яхшибоев палатада ётиб ҳам, ўтириб ҳам, даволаниб туриб ҳам, ташқарида юриб ҳам узлуксиз равишда кимлар биландир доимий мулоқотда бўлади. Гоҳ даволовчи шифокор, гоҳ марҳум дўсти Шариф Валломат, гоҳо хотини Мухсина хоним ёки “оқпадар, сўтак” ўғли Аввалбек, гоҳида шогирдлари, баъзан дўсти Ошно билан тинимсиз мулоқотда бўлади. Бу мулоқот хаёлий диалог тури орқали намоён бўлади. Қиссанавис Сайдкул Мардон эса хикоясининг бошидан охиригача ўқувчи билан сұхбат қуради, унга мурожаат қиласи, савол беради, узр сўрайди ва ҳаказо.

Полифоник романда ёзувчи ўз қаҳрамонининг ички дунёсини худди оптик кўзгу билан кўраётгандек энг майда икир-чикиригача очиб бера олади. М.М.Дўст ҳам Н.Яхшибоев қалбига ана шундай оптик кўзгу билан қарайди. Шу боисдан “Бемор” бобларида унинг ичи гўё ағдарилиб кўрсатилаётгандек туйилади. Яъни ўқувчи унинг ўз ўй-фикрлари (онг оқими) орқали худбинлигидан тортиб қайсарлигигача, обрў талаблигию, мақтанчоқ эканлигигача, қай даражадаги ёзувчилигидан бошлаб унинг жамиятда, муҳитда эгаллаган мавқеигача – барча-барчасини беш кўлдай билиб олади. Шуниси борки, бу қусуру фазилатларни асосан унинг ўз тилидан эшитамиз ёки ички нутқи орқали билиб оламиз ва бу бизга эриш туйилмайди. Яъни ўқувчи Н.Яхшибоевни нокамтар, мақтанчоқ одам сифатида қабул қилмайди, негаки, полифоник роман талабига кўра Яхшибоев характери сюжет ичида туғилмаган, балки сюжетта ана шундай шаклланган ҳолда олиб кирилган.

Мен бу ерда биргина полифоник романнинг ўзбек адабиётидаги биринчи намунаси “Лолазор” романни хусусида тўхталдим холос. Сиз ўзингиз мана шу фикрлардан келиб чиқиб, мустақил ўқиш учун берилган ва полифоник романнинг қарийб барча талабларига

тұла жавоб бера оладиган Омон Мухтор асарлари мисолида янада чуқурроқ билиб оласиз деб умид қиласан.

Модернизм миллий рамкалар-қолиплар қобиғини ёриб чиқишига ҳаракат қиласады. Модерн ёзувчининг дикқат марказида ташқи нарсалардан күра күпроқ ички нарсаларга эътибор бериш истаги устун туради. Яъни санъаткорнинг вазифаси “объектив воқеликни таърифлаш, тавсифлаш ёки акс эттириш эмас, балки ўзининг бадиий оламидан келиб чиқиб, ана шу воқелик билан муносабатга киришиш ва шу тарзда соф субъектив санъат яратмоқдир”. Модернчи санъаткорлар воқеликни қандай яратилған бўлса, шундайлигича қотиб қолган ва ўзгармас нарса деб билмайди, оламдаги турфа хил рангларни “онг кислотасида жўнлик қўйқаларидан” тозалаб, соф ҳолда тасвиirlайдилар.

Хозирги замон модерн асарида тасвиirlанаётган воқелик объектив воқеликка мувофиқ келиши талаб қилинмайди. Модерн асарга нисбатан ҳаққонийлик талабини қўллаб бўлмайди. Асар ҳақиқатсимон бўлиши ҳам, ҳаққоний бўлиши ҳам, бўлмаслиги ҳам мумкин. О.Мухторнинг “Афлотун”, “Тепаликдаги хароба” романларини эсланг. Уларнинг қаҳрамонлари бошидан кечираётган воқеалар реал ҳаётда юз бермайди.

### **НАЗОРАТ САВОЛЛАРИ:**

1. Роман қачон, қаерда пайдо бўлди?
2. Ўзбек адабиётида роман атамаси қачон ва ким томонидан қўлланилди?
3. Ўзбек адабиётида роман жанрининг 1-намунасини ким яратди?
4. Роман – дилогия.
5. Роман – трилогия.
6. Роман – Эпопея.
7. Полифоник романлар ҳақида гапиринг.

## **12- МАВЗУ: ҲОЗИРГИ ЎЗБЕК РОМАНЛАРИНИНГ ЎЗИГА ХОС ТОМОНЛАРИ**

### **РЕЖА :**

1. Ўзбек адабиётида тарихий романлар эволюцияси.
2. Прозада замонавий мавзу ва ёзувчи дунёқараши.

Бирон бир миллатни адабиётсиз тасаввур қилиб бўлмаганидек, ҳар қандай миллий адабиётни жанрсиз тасаввур қилиш ҳам мумкин эмас. Жанр бадиий адабиётнинг конкрет кўринишидир. Ана шундай жанрлардан бири роман бўлиб, унинг тарихий тараққиёти, ўзига хос хусусиятининг айрим томонлари тўғрисида ўтган дарсда сухбатлашдик. Аммо роман эпик турнинг энг йириқ, имкониятлари ғоят кенг жанри бўлганлигидан унинг поэтик оламига чуқурроқ кириб борганимиз сари ҳали кашф этилмаган фазилатларини англаб бораверамиз.

Роман, энг аввало, эпик образ яратувчи прозаик баёндир. Ана шу эпик образ ёзувчининг дунёқарашини, романнинг ғоявий-эстетик табиатини белгилаб беради. Эпик образни ифодалаш жараёнида ҳаёт ҳақиқатига қатъий амал қилиш талаб этилади. Зоро, раелизм (яъни ҳаётийлик) романнинг асосий қон томиридир. Роман қандай шаклда, қайси усуlda ёзилмасин, яъни у фантастик-саргузашт бўладими, ривоят ёки миф ва афсоналарга асосланадими, охир оқибатда реалликка интилади. Асарнинг жанр табиати унда акс эттирилган ғоявий ниятнинг қайси ёки қандай бадиий шаклда, услугуда берилиши билан белгиланади.

Романнинг энг мухим хусусиятлари:

1. Эпик образ;
2. Прозаик баён;
3. Ёзма услуб.

Романда ўқувчининг эсида қоладиган яхлит, кўламли, ўз қиёфасига эга бўлган эпик образларни кўп учратганимиз. Булар: Юсуфбек ҳожи, Отабек, Йўлчи, Мирзакаримбой,

Навоий, Очил бува, Ориф оқсоқол, Назар Яхшибоев, Мирза Голиб, Юсуф, Фозилбек ва ҳоказо. Чунки уларни эслашимиз билан кўз олдимизда яшаган даври, шарт-шароит, ўзаро тўқнашувлар намоён бўлади. Атрофидаги барча персонажлар у ёки бу даражада ана шу эпик образлар билан боғланганигини ҳис қиласиз.

Ҳозирги пайтда прозаик баёнсиз романни тасаввур этиб бўлмайди. Рус адабиётшуноси В.Кожинов ўзининг “Происхождение романа” (“Романнинг келиб чиқиши”) китобида ёзишича, “Шу нарса эътироф қилинганки, роман, биринчидан, кишиларнинг, нарса-ходисаларнинг, кечинмаларнинг ўзаро боғланган ҳолдаги мустақил реаллигини тўла-тўкис кўз олдимизда гавдалантирувчи, эпик образни яратувчи баён-ҳикояидир. Иккинчидан, роман “эпик” сўзининг иккинчи маъносига яқин асардир. Янада аниқроқ қилиб айтганда, у ҳаётий ҳақиқатни кенгроқ қамраб олишга, ўз ичига сингдиришга интилувчи эпопея руҳидаги баёндир. Ва ниҳоят, учинчидан, роман прозаик баёндир. Романнинг бу хусусияти унда нутқнинг ташқи шаклланиши билангина тўла-тўкис характерланмайди, албатта. Балки бу хусусият роман жанрининг бир қатор хоссаларини – прозанинг умумий эстетик колоритидан тортиб то унинг ёзма табиатигача бўлган ҳамма хоссаларини белгилаб беради”.

Энди ана шу нуқтаи назардан ўзбек адабиётида сўнгти йилларда яратилган тарихий ва замонавий мавзудаги романларга назар ташлайлик. Ўтган дарсимизда тарихий романлар тараққиёти, унинг бир аср давомида қанча тўлқини (босқичи) дунёга келганлиги ҳакида айтиб ўтгандик. Бугунги дарсимизда асосан тарихнавис адибларнинг 4, 5 – авлоди яратган асарлар ва уларнинг ўзига хос хусусиятлари тўғрисида тўхталамиз. Биз фикр юритмоқчи бўлган бу авлод вакилларидан М.Али, С.Сиёев, А.Дилмурод, З.Бегматов, С.Вафо кабилардир. Албатта, уларнинг ҳар бири тўғрисида тўхталишга вақт етмайди, шунинг учун уларнинг айримларига мурожаат қиласиз, холос.

Энг муҳими, мустақиллик ўзбек адиблари учун тарихий мавзулардаги чекланганликка барҳам берди. Ёзувчи энди хоҳлаган тарихий шахс, тарихий мавзу, воқелик ҳакида эмин-эркин ёзиш имкониятига эга бўлди. Тўғри, совет даврида ҳам тарихий мавзуда хоҳлаганча асар яратиш мумкин эди. Фақат шарти шуки, тарихий роман ғояси коммунистик мафкура, совет воқелиги нуқтаи назаридан ёритилсан. Ана шу принципга амал қилишга мажбур бўлган тарихнавис адибларнинг 2, 3-авлоди вакиллари – Ойбек, О.Ёқубов, Мирмуҳсин, П.Қодировлар айрим тарихий фактларни “буздилар”, ўзгартирилар, тарихий шахсларнинг қиёфасига қора бўёқни мўлроқ чапладилар. Биргина П.Қодировнинг “Юлдузли тунлар” тарихий романни бошидан кечирган кўргуликлар унинг кейинги “Авлодлар довони” романни структурасига, баён усулларига салбий таъсир кўрсатганини эслаш кифоя.

Ёки Амир Темур мавзусининг ишланишини олиб кўрайлик. Совет даврида у жоҳил, золим, босқинчи, қонхўр, саводсиз, ахлоқсиз шахс сифатида тасвиранган бўлса (масалан, С.Бородиннинг “Самарқанд осмонида юлдузлар” дилогияси), энди бутунлай бунинг акси. Қисқа фурсатда Амир Темур ҳакида ўнлаб достонлар (А.Орипов, М.Жалил, О.Бўриев) драмалар, романлар дунёга келди. Булар орасида Ўзбекистон халқ ёзувчиси Муҳаммад Али ғоят изчил ва самарали ижод қилмоқда. У дастлаб “Сарбадорлар” романни билан улкан ва туганмас мавзу даргоҳига қадам қўйди. Кейин “Улуғ салтанат” деган умумий ном остида романлар ёзишга киришди. Амир Темур ва унинг авлоди тўғрисида тетралогия яратишни ният қилган адиб ҳозир унинг учинчи китобини ёзиб тутатди. “Улуғ салтанат” тетралогиясининг 1-китоби Соҳибқироннинг энг суюкли фарзандига бағишлиланган бўлиб, “Жаҳонгир Мирзо” деб аталган. 23 бобдан иборат бўлган бу роман Амир Темурнинг раҳбарлик ва лашкарбошилик салоҳияти, оиласига, фарзандларига ғоят меҳрибон ота эканлигига бағишлиланади. Романда Амир Темурнинг долғали, кескин курашларга бой ҳаёти Амир Мусо, Амир Хусайн, шоир табиат Ахий Жаббор (“Сарбадорлар” ни эсланг), Жаҳонгир Мирзо ва бошқа беклар билан муносабатларида тўла очила боради.

Романда Жаҳонгир Мирзо 13-14 ёшларидан қўринади, у ғоят жасоратли, ботир йигит эди. Афсуски, 20 ёшида оғир хасталик туфайли оламдан ўтади ва бу мусибат Амир

Темурнинг қаддини буқади. Тетралогиянинг 2-китоби “Умаршайх Мирзо”, 3-китоби “Мироншоҳ Мирзо” деб номланган. М.Алиниңг ютуғи шундаки, бу асарларида шу номлари битилган темурийзодалар ҳаёти ва фаолияти тўғрисида ўқувчилар кам биларди. М.Али бу тетралогияси билан қарийб уч асрдан кўпроқ турли ҳудудларда ҳукмронлик қилган Темурийлар сулоласининг мукаммал бадиий солномасини яратиб бера олади деб умид қиласиз. Мустақиллик яна X11 асрда яшаб ўтган машойихлар сарвари “шайхулраис” Аҳмад Яссавий тўғрисида ҳам эркин фикр билдириш имконини берди. Ёзувчи Саъдулла Сиёев бу улуғ зот тўғрисида “Яссавийнинг сўнгги сафари” деб номланган асар яратди. Роман 2 китобдан иборат. Уларда ҳазрат Яссавийнинг ўз муридлари, саҳобалари, шогирдлари, Самарқанд подшоси Султон Маҳмуд, амиру беклар, оддий фуқаролар билан учрашувлари, муомаласи, авлиё сифат қобилияти, кароматлари ҳақида ҳикоя қилинади. Мана, шайх ул-машойихнинг кароматларидан бири: Яссавийнинг содик муридларидан бири Шаҳобиддин ҳожи бора-бора очқўзлик, бойлик, шуҳрат ортидан қувиб, пирига хиёнат қила бошлади. Кечира-кечира сабри тугаган ҳазрат бир йигинда унинг айбларини очиб ташлайди, халойиқ олдида уни фош қиласи. Аммо ҳожи айбларини тан олмайди. Шунда шайх ул-раис унинг қўлига Қуръон бериб онт ичишни сўрайди. Ҳожи тап тортмай, уялмай-нетмай Қуръони Каримни қўксига босиб қасам ичади. Орадан кўп ўтмай жазосини олади: Эшакдан йиқилиб, оёғи синади, оғзи қийшайиб қолади. Ҳазратнинг кароматпешалиги шундаки, Шаҳобиддин ҳожи пиридан узр сўраш ниятида йўлга тушади ва ярим йўлда жағи тўғриланиб, ортига қайтади. Уйига келгач, яна оғзи қийшайиб қолаверади.

Ёки Самарқанд ҳокими Султон Маҳмуднинг якка-ю ягона ўғли Қутбиддин отасининг таҳтидан, чексиз бойлик, шон-шуҳратдан воз кечиб дарвешликни, шайх Яссавийга хизмат қилишни афзал кўради ва камолга етади. 1-китоб ҳаж сафарига отланган Яссавийнинг Самарқандга қўниши, Султон Маҳмуд билан учрашуви, Қутбиддин тақдирининг ҳал этилиши билан тугайди. 2-китобда Самарқанддан ҳажга бориши йўлидаги воқеалар, оддий ҳалқ оммасининг Яссавийга иззат-хурматини ифодалашга бағишлиланган.

Ёзувчи А.Дилмурод “Маҳмуд Таробий”, “Паҳлавон Муҳаммад” номли тарихий романларини яратди. Икки қисмдан иборат “Маҳмуд Таробий” романида Мўғул босқинчиларига қарши Чигатой улусини исёнга бошлаган ватанпарвар шахснинг фаолияти асос қилиб олинган. Унинг паҳлавонлиги, ҳалқпарварлиги, одамохунлиги, табиблиги, ҳунарманд инсон эканлиги ишонарли кўрсатилган. Унинг атрофига уюшган пири Шамсуддин Маҳмудий, шайх Иброҳим, жасур укалари Муҳаммад, Али, ҳалқ қаҳрамонлари Вафо Ҳўжандий, Наврўз полvon кабилар ҳам эсда қоларлидир. Кейинги романи Навоийнинг дўсти, ҳамкори, ихлосманди Паҳлавон Муҳаммадга бағишлиланган. У орқали ёш Алишернинг ўзига хос характеристи ҳам очилади.

Ниҳоят, тарихимизнинг яна бир ёргу ўлдузи Алишер Навоий ҳақида ҳам янги тарихий роман дунёга келди. Қарийб ярим асрдан сўнг истеъододли ёзувчи Омон Мухтор Ойбек панжасига панжа уриб “Навоий ва рассом Абулхайр” деб аталган роман-дилогиясини (1. “Ишқ ахли”, 2. “Буюк фаррош”) яратди ва бу асари учун 2009 йилда мустақилликнинг 19 йиллиги муносабати билан Ўзбекистон Республикаси Давлат мукофотига сазовор бўлди. Бу асарида адид ўзига хос янги йўлдан боради, Ойбекдан фарқли ўлароқ О.Мухтор Алишер Навоийнинг ҳаёт йўлини, амалий-ижтимоий фаолиятини тасвирлаш йўлидан бормади. Асар марказига ўқувчига таниш бўлган, улуғ мутафаккир шоир Навоийни англаш масаласи қўйилади. Бу гоявий ниятини ифодалаш учун ёзувчи баённинг янгича усувларини, сюжет ва композициянинг ўзгача шаклларини қўллайди.


Романда рассом Абулхайрнинг Навоий портретини яратиш олдидан унинг мукаммал қиёфасини ифодалаш учун олиб борган изланишлари, изтироблари, англаш қийинчиликлари қундаликлари орқали очилади. Рассом Абулхайр шоир Навоийнинг суратини унинг сийратини англамай туриб чизолмаслигига ақли етади ва мутафаккир шоирнинг лирик меросини чуқур ўрганишга киришади. Хулоса шуки, “Навоий бу - тубсиз

осмон! Навоий бу – улкан уммон! Уни қамраб бўлмайди!”. Муаллиф ҳикоячи – қаҳрамони рассом Абулхайр нигоҳи орқали улуғ шоирнинг шеърияти қаърига чукур кириб боради ва шубҳасиз, унинг баёнига ҳам назм усули кириб келади. Насрий баёнда назм имкониятларидан фойдаланишнинг афзалликлари тўғрисида Въетнам адабиётшуноси То Хаой шундай ёзади: “Роман ўзга жанрларнинг энг яхши сифатлари ва имкониятларини ўзида қамраб олади. Биз пьеса, очерк, ҳикоя, повесть усулларини романга олиб кира оламиз. Бунда поэзиядан ҳам фойдаланиш, уни ҳар бир бобига, ҳар бир қисмига, ҳар бир жумласига сингдириш мумкин. Бу приёмлар (усуллар)дан бевосита ёки уларни роман персонажларининг фикр ва ҳаракатларини ифодалайдиган даражада ўзгартирган ҳолда фойдаланса ҳам бўлади”. Ажабки, О.Мухторнинг ушбу тарихий романигини эмас, балки кўплаб замонавий романлари ҳам назм билан қоришиқ усулда баён қилингани билан характеристерлидир.

Энди замонавий мавзудаги романлар хусусида гаплашсак. Аслини олганда, мавзуу ва муаммосидан қатъий назар барча адабий асарлар замонавий рух билан суғорилган бўлиши шарт. Масалан, ёзувчи тарихий мавзуга мурожаат қилас экан, шубҳасиз, ўзи яшаб турган замони нуқтаи-назаридан ёндашуви талаб этилади. Фақат асар замонасозликдан холи бўлса бас.

Истиқлол даври адабиётида кўплаб замонавий мавзуда яратилган асарлар адабий жамоатчиликнинг яхши баҳосини олди. Булар орасида У.Хамдамнинг “Мувозанат”, “Исён ва итоат”, “Сабо ва Самандар”, Л.Бўрихоннинг “Жазирамадаги одамлар”, Т.Муроднинг “Отамдан қолган далалар”, “Бу дунёда ўлиб бўлмайди”, Т.Жўраевнинг “Арвоҳлар тунда изғийди”, “Бозор дунё” романлари алоҳида ажralиб туради. Бундай деяётганимнинг сабаблари бор. Мустақиллик туфайли бадиий адабиётда ижодий эркинлик вужудга келгандан кейин уни суиистеъмол қилиб, енгил-елпи мавзуларда, олди-қочди, ур-йикит воқеаларига асосланган, ахлоқий бузуклик, фоҳишаболик, ўғриликка бағишлиланган “романлар” ниҳоятда кўпайиб кетди. Энг ёмони “бозор адабиёти” пайдо бўлди. Нуриддин Исмоилов, Мухаммад Исмоилов, Солиҳ Қаххор, Тўхтамурод Рустам, Ҳабиб Темиров кабиларнинг “усти ялтироқ, ичи қалтироқ” “роман”лари замондошларимизнинг фикрини чалғитди, адабиётнинг тарбиявий вазифасини четга суриб қўйди. Афсуски, аксар ўқувчилар ана шундай асарларни ўқиши билан оворалар. Яхшики, бундай асарлар адабиётнинг умумий савиясини белгиламайди.

Биз, яхшиси, Улуғбек.Хамдам, Луқмон Бўрихон, Тилаволди Жўраевларнинг юкорида тилга олинган романлари тўғрисида гаплаша қолайлик.



Сайднинг хотини – Ойгул – Миролимнинг хотини. Булар барчаси ҳаёт тарозисининг паллалари, мувозанатни талаб қиласди.

II. “Бозор дунё” Нозима ↔ Салима ↔ Каниза

Мансур ↔ Нозима ↔ Каниза  
 Канизанинг тракторчи эри ↔ Каниза ↔ Мансур  
 Акаси Зокир ↔ Мансур ↔ отаси  
 Мансур ↔ ҳоким Зокир ↔ прокурор Қодир Алиевич  
 Мансур ↔ Қ.Алиевич ↔ Нозима  
 Қишлоқ ↔ бозор ↔ шаҳар  
 Маънавият ↔ адолат ↔ савдо

“Жазирамадаги одамлар” романи билан ёзувчи бирданига адабий жамоатчиликнинг эътиборини тортди. Адабиётшуносларнинг давра сұхбатларида, китоб аннотациясида,

ёзувчи Э.Аъзам эса “ЎзАС”даги маҳсус мақоласида муаллиф Л.Бўрихон тўғрисида илиқ гаплар айтилди. Романга Тошиби чечанинг халқ топишмоқларида айтилган “Бир отим бор – ажабгина, Думлари гажаккина. Ҳали келса... Кула-кула ўласиз” деган сатрлар эпиграф қилиб олинган. Роман воқеалари олий ўқув юртининг руҳшунослик факультетида ўқийдиган талаба йигит тилидан ҳикоя қиласи. Унда Сафармурод чавандознинг ташвиқоти билан Мирзачўлга келиб, шаҳар қиёфасига ўхшаш посёлка бунёд қилган меҳнатсевар одамлар ҳаёти ифодаланади. Совхоз директори Чинор Менглиев, Сафармурод чавандоз, Улаш агроном, ҳикоячи талабанинг отаси Эргаш (булар учови синфдош), Файзулла буғолтир, унинг шаҳарлик келини Лолаҳон кабиларнинг ҳар бири ўзига хос тақдир ва тасвирга эгалиги билан ажралиб туради. Роман табиийлиги билан эътиборни тортади.

Сиз Саломат Вафонинг “Оворанинг кўрган-кечирганлари” номли романини мустақил равишда ўқийсиз ва амалий машғулотда таҳлил қиласиз. Шунинг учун бу ҳақда тўхтатмаймиз.

#### **Назорат саволлари:**

1. Романнинг энг муҳим хусусиятларини айтинг.
2. Мустақиллик йилларида тарихий мавзуда яратилган романлар ва уларнинг ўзига хослиги нимада?
3. Ҳозирги адабий жараёнда яратилган замонавий мавзудаги романлар хақида гапиринг.
4. Онг оқими асосида баён қилинган қандай романларни биласиз?
5. Мавзунинг замонавийлиги ва замонасозлик деганда нимани тушунасиз?

### **13-МАВЗУ: ҲОЗИРГИ ЎЗБЕК ДРАМАТУРГИЯСИ**

#### **Адабиётлар:**

1. Адабиёт назарияси. 2 томлик. Т., “Фан”, 1978-79.
2. Аристотель. Поэтика. Ахлоқи кабир. Т., “Янги аср авлоди”, 2004.
3. Абдусаматов Ҳ. Драма назарияси. Т., Ф.Ғулом номли АСН, 2000.
4. Имомов Б. ва б. Ўзбек драматургияси тарихи Т., “Ўқитувчи”, 1995.
5. Мустақиллик даври адабиёти. Т., Ф.Ғулом номли АСН, 2006.
6. Ризаев Ш. Жадид драмаси. Т., “Шарқ” НМАК, 1997.
7. Абдусаматов Ҳ. Қалб гавҳари. “Шарқ юлдузи” жур., № 5-6, 2006.
8. Й.Солижонов. Мен сиздан сабоқ олдим (адибларга мактублар). Т., 2007.

#### **РЕЖА:**

1. Драматик турнинг тараққиёт йўли.
2. XX аср охири ва XXI аср бошларидағи драмаларда инсон ва жамият муаммолари.
3. Трагикомедия жанрининг ўзига хос хусусиятлари.

Драматик тур ўзбек адабиётига кириб келганига бир аср бўлди. Илк драматик асар сифатида тан олинган Беҳбудийнинг “Падаркуш” асари 1911 йилда ёзилганди. Юз йиллик тарих ва тажрибага эга бўлган бу ўзбек драматургияси ўтган асрнинг боши ва иккинчи жаҳон уруши даврини ҳисобга олмагандан ҳар доим ҳам бошқа адабий турлардан сустроқ ривожланган. Бу сусайиш айниқса, ўтган асрнинг “турғунлик даври” деб аталган 70-80 ва мустақилликнинг дастлабки йилларида аниқ сезилди. Бундай сусткашликнинг муайян объектив ва субъектив сабаблари ҳам бор. Аввало, шуни ачиниш билан таъкидлаш ўринлики, адабиётимизда фақат драматургия билан шуғулланадиган маҳсус ижодкорлар жуда кам. Борлари ҳам тезда шухрат топиб, қашфиёт даражасидаги саҳна асарлари яратиб, театрларнинг доимий ҳамкорига айланиб кетавермайдилар. Иккинчидан, мабодо, шундай талантли драма яратилиб, саҳналаштирилса ҳам унга томошабинни жалб этиш муаммоси туғилади. Учинчидан, бозор иқтисодиёти туфайли драматург ўз асари билан бойиб кетаётгани йўқ.

Шунга қарамай, сўнгги 20 йил ичидаги драма яратилмай ҳам қолмади, саҳна бўшаб ҳам қолмади, озми-кўпми томошибин ҳам театрга кириб турди. Энг муҳими, сўнгги йиллар драматургияси шакл ва мазмун томонидан янгиланди, жанр имкониятлари кенгайди. Санъаткорлар жаҳон драматургиясининг барҳаёт тажрибаларидан унумли фойдалана бошладилар. Бу йиллар анъанага кўра кўплаб шеърий драмалар дунёга келди. Э.Воҳидовнинг “Истамбул фожиаси”, А.Ориповнинг “Соҳибқирон”, У.Қўчқорнинг “Расулуллоҳ котиби”, Р.Бобоҷоннинг “Юсуф ва Зулайҳо” каби асарлари ана шу усулда битилган.

Драматургиянинг ривожланиши ва янгиланиши мавзу кўламининг кенгайишида яққол кўринди. Бу борада айниқса, тарихий мавзудаги саҳна асарларнинг кўпайганлигини алоҳида таъкидлаш лозим. Тарихга муносабатнинг ўзгарганлиги, буюк аждодларимизнинг бадиий, илмий ва маънавий-маърифий меросини қадрлаш, тарихий манбаларни ўрганиш туфайли халқимиз ўзлигини англаш жараёнини бошидан кечирди. Айниқса, Амир Темур, Аҳмад ал-Фарғоний, Машраб сингари мураккаб тарихий шахслар ҳакида ранг-баранг жанрларда турли шаклдаги саҳна асарлари дунёга келди.

Булар орасида Ўзбекистон халқ ёзувчиси Одил Ёқубовнинг “Фотихи Музффар ёхуд бир париваш қиссаси” номли тарихий драмаси муҳим ўрин тутади. Шуни алоҳида таъкидлаш ўринлики, О.Ёқубов драматургия борасида хийла тажрибали адиб. 60-йиллардаёқ “Айтсам тилим куяди, айтмасам дилим”, “Юрак ёнмоғи керак”, “Чин муҳаббат”, “Олма гуллаганд”, “Бир кошона сирлари” деб аталган драмалари билан шуҳрат қозонган эди. Мана шу тажриба ва маҳорат санъаткорнинг сўнгги драмасида ўзининг яхши самарасини берган.

Аввало, шуни айтиш керакки, тарихий мавзудаги ушбу драма соҳибқирон Амир Темурга бағишлиланган. Муаллиф улуғ Амир ҳаётига оид тарихий фактдан унумли фойдаланиб, бадиий тўқимага асосланган жиддий тарбиявий саҳна асари яратади. Драма марказида сарлавҳада ургу берилганидек, “Фотихи Музффар” – Соҳибқирон Амир Темур билан унинг “энг сўнгги ва энг суюкли рафиқаси” Сулувқўз исмли аёл туради. Тарихдан маълумки, Амир Темур ўз никоҳига олган аёллар орасида энг гўзали, энг машҳури, энг оқиласи, энг вафодори, энг суюклиси, маслаҳатгўйи, энг ишонгани Чифатой улусига мансуб мўғул хонларидан бири Қозонхоннинг қизи Сароймулхоним (уни саройда Бибихоним деб аташган) бўлган. Бу аёл аввал Амир Хусайннинг хотини бўлган. Уни енгиб, қатл этган Соҳибқирон маликалар орасидан Сароймулхонимни танлаб олади. Аёл хон авлодига мансуб бўлганлигидан ақли-фаросати, дидининг юксаклиги, иродалиги, сарой муҳити ва идора усулларини яхши билғанлиги, фикрлаш доирасининг кенглиги, тадбиркорлиги билан бошқа маликалардан ажralиб турган. Бундан ташқари Сароймулхоним хусн-латофатда, назокатда, эрга нисбатан хотинлик муносабатида, хулқатворида беназир бўлиб, тез орада Амир Темурнинг муҳаббатини қозонади. Сароймулхоним айни чоғда мамлакатнинг ижтимоий-сиёсий, маданий-маърифий ҳаётидан яхши хабардор бўлган, Ватанини жон-дилидан севган, адолат учун курашган халқининг фаровон, юртининг обод бўлишини орзу қилган. Бу фазилатлари Амир Темурнинг ниятлари билан мос келганлигидан Соҳибқирон маликага бошқарувнинг сиёсий, ижтимоий, иқтисодий, маданий ҳаётига оид масалаларни ҳал этишда фаол қатнашувига изн берган, унинг доно маслаҳатларидан фойдаланган. Ҳарбий юришларида ҳам ҳар доим унинг ёнида бўлган. Амир Темур ўз никоҳига олганида Сароймулк 29 ёшда эди. Улар бир-бирига чексиз муҳаббат билан 35 йил яшадилар.

Тарихий манбаларда кўрсатилишича, Амир Темур суюкли рафиқаси Бибихоним шарафига маҳобатли обида қурдирмоқчи бўлади. Минора қурилишига маликанинг ўзини масъул қилиб қўяди. Тенги йўқ меъмор ишни бошлайди. Албатта, масъул шахс сифатида Сароймулхоним қурилиш майдонига тез-тез келиб туради. Усталар билан қурилиш лойиҳаси бўйича маслаҳатлашади. Айтишларича, меъмор маликага ошиғу шайдо бўлиб қолади. Ривоятни айтиб бераман: (рўмол устидан ўпиш, юздаги доғ, устанинг тақдири, кушлар патидан қанот қилиб учиб кетиш...)

Хуллас, мана шу факт О.Ёкубов учун ўзининг Амир Темур ҳақидаги фикрларини ифодалашга асос бўлиб хизмат қиласди. Санъаткор бу ғоявий ниятини ўз ҳолича берганида маълум чекланишларга йўл қўйишга мажбур бўларди. Шунинг учун бадиий тўқимага мурожаат қиласди ва Амир Темурнинг ҳийла “қариганда” топган бу маҳбубасини (“Энг сўнгги ва энг суюкли”) Сулувкўз деб атайди. Умуман, муаллиф бу драмада персонажлар исмига катта маъно юклайди: Тарихий Бибихоним асарга Биби Сардор – қаттиқ қўл, жаҳлдор, золим, канизаклар Сарагул, Ақчагул, навкар Қалқонбек шулар жумласидандир.

Драмада муаллиф бир томондан чин муҳаббатни, гўзалликни улуғлайди. Иккинчи томондан, бевафолик ҳар қандай одамнинг юзини шувит, ўзини шарманда қиласди деган фикрни ифодалашни ният қиласди. Сулувкўз меъморнинг шартини ноилож адо этиб, юзида доғ қолади (Меъмор маликани севиб қолади. Унинг оёғи остига йиқилиб, “жамолингизни бир кўрай” деб илтимос қиласди. Сулувкўз унга юзини кўрсатади. Меъмор энди иккинчи шартини айтади: “битта бўса олай!”. У биладики, биринчи шартини бажарган аёл иккинчисини ҳам бажаради. Боз устига уста агар айтганимга унамасангиз “Курилишни тугатмай, масжиди жомеъ пештоқидан ўзимни ташлайман!” деб кўрқитади. Қурилиш битмай қолса, Сулувкўз Амир Темур олдида нима деган одам бўлади? Ахир, суюкли эри, Соҳибқирон бу курилиш тақдирини унга топширган-ку! Ноилож кўнади – парда устидан ўптиради. Аммо меъморнинг муҳаббати алангай оташ экан, ёноғини куйдирди! Доғ қолди. Бу шармандалик ўлим билан тугади).

Амир Темур ҳақида яна Т.Акбархўжаевнинг “Замон ўғли”, Қ.Абдуғаниевнинг “Амир Темур ва Йилдирим Боязид” сингари драмалари ҳам яратилди.

Тарихий мавзуда яна Аҳмад Фарғонийга бағишлиланган бир неча асар пайдо бўлади. Булар: Ҳ.Расулнинг “Пири коинот”, И.Рахимнинг “Алломанинг ёшлиги”, Ж.Жабборовнинг “Ал-Фарғоний”, Й.Сулаймоннинг “Осмонга сифмаган муҳаббат”, Нуруллоҳон ҳожининг “Башар аллома” драмалариридир. Яна бир аллома, Имом ал-Бухорий ҳақида Ж.Расултоевнинг “Муқаддас зиё”, С.Эҳсоннинг “Муҳаддис”, М.Эргашевнинг “Саодат йўли”, У.Қўчкорнинг “Расулуллоҳ котиби”, Р.Маъдиевнинг “Бир кечалик туш”, Т.Жуматовнинг “Имомал - Бухорий”, М.Ҳамидованинг “Бухорий муҳаббати” каби сахна асарлари дунёга келди. Булардан ташқари Й.Муқимовнинг “Мангу машъал” (Авесто ҳақида), Й.Муқимов ва Ҳ.Расуловнинг “Муқаддас Тахтизар” (Спитамен ҳақида), Р.Бобожоннинг “Юсуф ва Зулайҳо”, У.Азимнинг “Алпомишининг қайтиши”, Э.Самандарнинг “Жалолиддин Мангуберди”, “Аждодлар қиличи”, З.Муҳиддинов ва М.Ҳамидоваларнинг “Захириддин Муҳаммад Бобур”, Э.Хушвақтовнинг “Машраб”, Н.Қобилнинг “На малакман, на фаришта” (Машраб ҳақида), А.Суюннинг “Сарбадорлар” драмалари ҳам тарихий мавзудадир. Лекин уларнинг барчасини ҳам етуқ бадиий даражада ва кутилган ниятга эриша олган деб бўлмайди.

Бу даврда замонавий мавзуларда ҳам кўплаб драмалар дунёга келди. Бу борада Эркин Хушвақтов, Салоҳиддин Сироҗиддинов, Усмон Азим, Санжарали Имомов, Холиқ Хурсандов, Насрулло Қобил, Комил Аваз, Тоир Юнусовлар самарали ижод қилдилар. Улардан баъзиларининг асарлари театрларнинг доимий репертуарига айланди ва томошибинларнинг ташналигини қондириб, театрларга қизиқишини орттириди. Зеро, театрнинг халқни маънавий-маърифий руҳда тарбиялашнинг энг самарали ва жонли воситаси эканлиги азалдан маълум. Сахна реал ҳаётнинг бадиий кўзгусидир. Шу маънода юқорида номлари тилга олинган драматурглардан Э.Хушвақтов айниқса, улокда совринни олиб кетди. У кўпроқ халқ оғзаки ижоди материалларига, фольклор-этнографик мавзуларга, миллий урф-одатларимизда ўлиб бораётган удумларга мурожаат қилди.

Э.Хушвақтовнинг Ўзбекистон Миллий театрида бирин-кетин сахналаштирилган “Чимилдик”, “Қаллик ўйин”, “Кирмизи олма”, “Андишали келинчак” каби пьесаларига иложи борича ўзбек халқининг азалдан яшаб келган удумлари руҳини, моҳиятини сингдиришга, уларни янгича анъаналар билан бойитишга, ёш авлоднинг муносабатини очишга уринади. Кўп ўринларда бунга эришади ҳам. Аммо драматург ҳар доим ҳам ўз ниятини ифодалаш учун танлаган усул ва шаклларда ютуқقا эришавермайди. Масалан,

“Чимилдик”, “Қаллиқ ўйин” драмалари аввало, енгил-елпи воқеалар асосига курилгани, персонажлар ўртасидаги муносабатларнинг ўта сунъийлиги, урф-одатларимизнинг қадрини кўтариш ўрнига ўзига нафрат уйғотади. Бу драмаларда ечим ҳам тамошабинни қониқтирумайди.

**Назорат саволлари:**

1. Драматургиянинг ўзига хослиги нимада?
2. Драматик тур жанрларини айтинг.
3. Комедия жанри ва ҳозирги давр.
4. Трагедия ва унинг тараққиёти.
5. Ҳозирги даврдаги трагикомедиялар ва уларнинг долзарблиги.

